

本足  
蘇東坡全集

大東

行



蘇東坡內制集

卷一

賜正議大夫同知樞密院事安燾乞外郡不許批答（元祐元年十月八日）  
覽表具之，卿以應務之才，居本兵之地，綏靜中外，人無間言，何疑上章欲求去位？未喻厥意，聞之憮然。夫樂親莫大於功名，養志不專於甘旨，而况觀闕之下，父母之邦，退食問安，孰便於此？勉循其舊，以卒輔予。

賜安燾乞外郡不允批答（元祐元年十月八日）

省表具之，夫事親者不擇地而安之，孝之至也。而况艱難之際，一日萬幾，冰淵之懼，當務同濟，卿練達兵要，灼知邊情，寄託之深，義難引去，亟求自便，朕何賴焉？

賜正議大夫同知樞密院事安燾乞退不允批答口宣（元祐元年十月十日）  
有敕：卿被遇先帝，勤勞有年，逮于眇躬，倚注彌重，宜安厥位，毋重力詞。

雄州白溝驛賜大遼賀正旦人使御筵口宣（元祐元年十一月）  
有敕：卿等遠馳使節，來慶春朝，屬歲律之凝嚴，涉道塗之脩阻，宜頒宴衍，以勞勤劬。

趙州賜大遼賀興龍節人使茶藥口宣（元祐元年十月六日）  
有敕：卿等遠訪使輅，來陳慶幣，川塗甚阻，風霧可虞，特示至恩，往頒名劑。

賜正議大夫同知樞密院事安燾乞外郡不允斷來章批答口宣（元祐元年十一月十六日）  
有敕：卿職在樞要，表儀百官，進當以禮，退當以義，今茲求退，其義安在？亟還視事，毋復固詞！

雄州撫問大遼國賀興龍節使副口宣（元祐元年十月六日）  
有敕卿等遠犯風埃久勤輶傳入疆茲始授館少安申命撫存式昭眷獎

賜金紫光祿大夫守尙書右僕射兼中書侍郎呂公著生日詔（元祐元年十

月二十七日）

敕公著卿將相三世輔翼兩朝方斯千獻夢之辰有既醉太平之福宜膺慶賚永錫壽康今賜卿生日羊酒米麵等具知別錄至可領也

賜皇叔祖建雄軍節度觀察留後同知大宗正事宗景上表辭恩命不允詔（

元祐元年十月九日）

敕宗景省上所表辭免恩命事具悉朕初執珪幣祇見上帝嘉與百辟徵福文考大賚四海始于親賢皆神之休義不當避國有常典爾無固詞

賜皇叔祖宗景上表辭恩命不許詔（元祐元年十月九日）

敕宗景覽上所表辭免恩命事具悉國家有大祭祀必均慶賞邦甸侯衛輝炮翟闈無有遠邇畢蒙惠澤矧我懿親實維顯相祇率舊典毋須固詞

賜鎮江軍節度使檢校太傅開府儀同三司上柱國康國公判大名府韓絳上

表乞致仕不許詔（元祐元年十月二十日）

敕韓絳覽上所表陳乞致仕事具悉卿四世元老國之長城端笏垂紳不動聲氣風采所及自然折衝軒冕丘園其實何異矧今艱難之際自有冰淵之虞黃髮之廷未敢言病豈宜獨善遠欲卽安尙分北顧之憂勿起退歸之念強食自輔體我至誠

賜韓絳上表乞致仕不允詔（元祐元年十月二十日）

敕韓絳省上所上表陳乞致仕事具悉功成身退入臣之常壽考康強有不得謝卿出入將相垂三十年豈以小物尚勤元老徒得君重臥護一方使吏民瞻師尹之儀刑蠻夷識漢相之風采丘園之請朕未欲聞其省思慮時寢食親近藥餌以副中外之望

趙州賜大遼賀興龍節大使茶藥詔

敕卿肅將慶幣遠涉川途風埃浩然徒馭勤止宜加寵錫以示眷懷

趙州賜大遼賀興龍節副使茶藥詔（元祐元年十月六日）

敕卿將命夙興犯寒遠涉駕言未息軫念殊深特致恩頒以嘉勤瘁

冬至福寧殿作水陸道場資薦神宗皇帝齋文

伏以聖神陟降釋梵後先適更來復之辰茂薦往生之福虔脩淨供仰導真游

趙州賜大遼賀正旦副使茶藥詔（元祐元年十月十九日）

敕卿抗旌出境夙駕在塗眷言跋涉之勞宜適與居之節式頒良劑以輔至和

趙州賜大使茶藥詔（元祐元年十月十九日）

敕卿遠飭使軺講脩隣好蒙犯風霧跋履山川宜頒錫於珍芳庶輔安於寢食

趙州賜大遼國賀太皇太后正旦大使茶藥詔（元祐元年十月十九日）

敕卿恭講隣歡遠勤軺馭言念驅馳之久適丁寒沍之辰宜錫珍良式昭眷寵

趙州賜副使茶藥詔（元祐元年十月十九日）

敕卿遠持使節來慶春朝方此沍寒良勤啓處宣示眷懷之具式頒劑和之良

趙州賜大遼國賀太皇太后正旦使副茶藥口宣（元祐元年十月二十八日）  
有敕：卿等奉將邦幣，馳會歲元，眷言風駕之勤，方丈中塗之館，宜頒靈劑，以喻至懷。

趙州賜大遼國賀皇帝正旦使副茶藥口宣（元祐元年十月二十八日）  
有敕：卿等逃脩隣好，方丈州封，言念沍寒，想勤跋履，特頒名劑，以示眷懷。

賜新除檢校太保依前河西軍節度使阿里骨加恩制告詔（元祐元年十月十五日）

敕阿里骨：朕涓選靈辰，奉承宗祀，肆均介福，徧暨多方，卿世撫侯封，夙虔朝命，特加寵渥，用獎志嘉。

賜新除依前交趾郡王李乾德加恩制告敕書（元祐元年十月十五日）  
敕：乾德朕躬執珪幣，大饗帝親，盼布湛恩，徧暨諸夏，卿世綏侯服，欽順朝廷，宜錫徽章，以昭異數。

太皇太后祭奠故夏國主祭文（元祐元年十一月十六日）

乃眷外臣，嗣守西服，夔累世之忠順，荷先朝之寵光，惟天難忱，錫命不永，訃音遽至，閔悼良深，特遣使車，往陳奠幣，庶此恩禮，貫于幽明。

太皇太后賜故夏國主嗣子乾順詔（元祐元年十一月十六日）

念爾守邦，藐然在疚，日月逾邁，祖葬有時，緬懷孝愛之深，想極攀號之戚，往助襄事，式昭異恩。

太皇太后賜故夏國主嗣子乾順詔（元祐元年十一月十六日）

惟我列聖，眷爾有邦，非徒極其寵榮，蓋亦同其憂患，念爾哀疚，惻然顧懷，臨遣行人，往喻至意，且致奠賻之禮，以爲存沒之光。

內中添蓋諸帝后神御殿告遷御容權奉安於慈氏殿祝文

於皇神考，肇啓闕祠，方增築之未寧，懼格思之有瀆，別嚴淨宇，祇奉辟容，式燕聖靈，永綏慈嘏。

集禧觀開啓祈雪道場青詞

伏以麥將覆塊，雪未掩塵，嗣歲之憂，下民安訴，具嚴法會，祇款闕宮，仰冀同雲，溥滋新臘！

內中慈氏殿告遷神御於新添脩殿奉安祝文

伏以增築告成，闕嚴有奐，儼衣冠之來復，愾歎息之疑聞，昭格穆清，永綏燕翼。

故贈太師追封溫國公司馬光安葬祭文

嗚呼！元豐之末，天步惟艱，社稷之衛，中外所屬，惟是一老，屏予一人，名高當世，行滿天下，措國於太山之安，下令於流水之源，歲月未周，綱紀略定，天若相之，又復奪之，殄瘁不哀，古今所共知之者，神考用之者，聖母，馴致其道，太平可期，長為宗臣，以表後世，往奠其葬，庶知予懷。

賜侍衛親軍馬軍都虞候劉昌祚進奉賀明堂禮畢馬敕書（元祐元年十一月二十日）

敕劉昌祚：大事告成，多方同慶，汝以分符之重，特脩效馬之儀，載念勤誠，不忘嘉數。

賜觀文殿大學士知穎昌府韓煥上表辭免恩命不允詔（元祐元年十一月二十五日）

敕韓煥：朕躬祀總章，始行嚴配，推廣帝親之澤，覃及中外之臣，惟我老成，逮受顧命，均此介福，非朕敢私，國之故常，毋煩謙避！

班荆館賜大遼賀興龍節人使到闕酒果口宣（元祐元年十二月初一日）  
有敕：卿等肅將信幣，來慶誕辰，眷言行李之勞，宜有燕休之賜，受茲芳旨，體我眷懷！

就驛賜大遼賀興龍節人使迴程酒果口宣（元祐元年十一月二十四日）  
有敕：卿等抗旌旋復，弭節少留，風埃浩然，徒馭勤止，宜有珍芳之賜，以昭眷寵之殊。

班荆館賜大遼賀正旦人使迴程酒果口宣（元祐元年十一月二十八日）  
有敕：卿等遠會春朝，恪修隣好，既卒聘事，豈無燕私，宜就錫於加籩，蓋式昭於異數。

正旦於福寧殿作水陸道場資薦神宗皇帝齋文

伏以棄黃屋以上賓，莫追風馭，抱烏號而永慕，再歷春朝，敢伏勝緣，式開淨供，仰頌義堯之德，永追堯釋之

游。

賜河東路諸軍來年春季銀鞋兼傳宣撫問臣寮將校口宣（元祐元年十二月七日）

有敕：汝卿等從來邊陲，服勤師律，方踐更於春令，諒率履於大和，特有匪頒，以昭眷遇。

雄州賜大遼賀正旦人使迴程御筵口宣（元祐元年十二月六日）

有敕：卿等出疆繼好，已事言還，跋履冰霜，憩休館舍，宜有燕私之寵，以旌來往之勤。

就驛賜大遼賀正旦人使銀鈔羅唾盂孟子錦被褥等口宣（元祐元年十二月十六日）

有敕：卿等遠持信幣，來慶春朝，眷言行李之勞，方茲舍館之定，宜加頒賚，用示寵嘉。

賜鎮江軍節度使判大名府韓絳詔書湯藥口宣（元祐元年十一月二十九日）

日）

有敕：卿德望之隆，中外所屬，誠請雖極，輿論未安，毋復懷歸，以勤北顧，特頒良劑，以輔至和。



賜鎮江軍節度使判大名府韓絳上第二表乞致仕不許詔（元祐元年十一月二十九日）

月二十九日）

敕韓絳爲國無強於得人，用人莫先於求舊，雖已挂冠而謝事，尙俾安車而造朝，豈有體力未衰，蕃宣所寄，亟圖自便，遂欲言歸，矧卿德望並隆，神人所相，焉有滿盈之懼？夫何倚伏之虞，尙體至懷，少安厥位！

賜韓絳上第二表乞致仕不允詔（元祐元年十一月四日）

敕韓絳朕以眇躬，求助諸老，皆以艱難之際，不詞中外之勞，胡爲累章，確守歸意，豈朕不善西伯之養，而無入子思之側乎？三復喟然，未喻厥指，朕意不易，卿其少安！

賜韓絳上第二表乞致仕不許斷來章詔（元祐元年十一月十四日）

敕韓絳君臣之義，愛樂同之，苟皆懷歸，誰任其事，卿之高識雅度，輕軒冕而樂丘園，天下所知也，獨不念先帝託付之重乎？勉徇大義，勿復以言！

賜韓絳上第二表乞致仕不允斷來章詔

敕韓絳功成身退，人臣之常禮，至於非常之遇，則必有無窮之報，朕待卿於形器之表，而卿自處於繩墨之內，未爲得也，朕意不易，卿無復辭！

賜正議大夫同知樞密院事安燾乞退不允詔（元祐元年七月十三日）

敕安燾卿才當其位，義不詞勞，內之樞機之謀，外之疆場之議，既當身任其責，難以家事爲詞，而况並奉君親，兩全忠孝，進無不得，退以何名，卿之所求，固非矯激，朕之不許，亦豈空文，亟還厥官，無煩朕命！

賜新除落致仕依前光祿大夫范鎮赴闕詔（元祐元年十月二十日）

敕范鎮夫有德君子，以精神折衝，譬之麟鳳，能服猛鷲，朕虛懷前席，以致諸老，非敢必以事諉也，苟得黃髮

之叟，幡然在位，則朝廷尊嚴，姦宄消伏，卿雖篤老，乃心王室，毋憚數舍之勞，以副中外之望！

賜外任臣察曆日詔敕書（元祐元年十一月二十八日）

敕韓絳朕申命日官，逆推嗣歲，眷子共理，頒此成書，勉劬農功，毋違時令！

賜新除依前中大夫守中書侍郎呂大防辭恩命不允詔（元祐元年十一月

四日）

；  
大防，卿敦大直方，任重道遠，擢貳西省，被自朕心。雖與聞政事，爲日未久，而歷試中外，勤勞百爲，蓋有年矣；德位惟允，人無間言，亟服新命，毋煩朕訓！

賜新除依前光祿大夫刑部尙書蘇頌辭恩命不允詔（元祐元年十月十七

日）

；  
蘇頌，卿篤於仁心，深於經術，用心司寇，期於無刑。朕惟孝處之深，三年不奪其志；又惟才難之故，千里以待其來，卿而不能，誰當能者？亟服乃事，毋煩力詞！

賜新除御史中丞傅堯俞辭免恩命不允詔（元祐元年十一月六日）

；  
堯俞詩云：「剛亦不吐，柔亦不茹。」朕以卿有樊仲之風，是以擢卿爲中執法，才難之歎，古今共之，豈以小嫌，而廢大任，與其拘文以自疑，不若直己而行義，亟服乃事，無煩固辭！

皇帝賜故夏國主嗣子乾順進奉賀正馬馳回詔（元祐元年十二月二十四

日）

詔故夏國主嗣子乾順遠奉王正，來歸時事，惟此充庭之寶，率皆任土之宜，乃眷忠勤，良深嘉歎！

太皇太后賜故夏國主嗣子乾順進奉賀正馬馳回詔（元祐元年十二月二

十四日

詔故夏國主嗣子乾順述職春朝歸誠宰旅修此效牽之視致其乘服之良再閱來章式嘉忠節

皇帝達太皇太后賀大遼正旦書（元祐元年十月）

肇易歲元發新榮於萬物仰遵慈誨修舊好於兩朝遠飭使輶肅將禮幣庶迎壽祉式副願言

皇帝賀大遼皇帝正旦書（元祐元年十月）

獻歲發春共講三朝之慶寶隣繼好茂膺五福之祥申飭使車往陳信幣永言欣頌曷罄論陳

奏告天地社稷宗廟宮觀寺院等處祈雨雪青詞齋祝文

伏以期年以來水旱作沴迨茲徂歲復苦常暘疾疫將興農末俱病方齋居而默禱庶精意之登聞敢祈春

臘之交沛然雨雪之賜願均介福敷錫羣生

五嶽四瀆等處祈雪祝文

伏以歷冬不雪兩歲之憂疾癘將興麥薌就稿分命守土告於有神下民其咨天聽不遠毋愛同雲之澤以

成盈尺之祥苟利於民敢忘其報

賜宰臣呂公著生日禮物口宣（元祐元年十月十六日）

有敕朕之元老生以茲辰實為邦國之華豈獨闔門之慶故命爾息往宣余懷仍分廐庫之良以助子孫之

壽！

相州賜大遼國賀興龍節使副御筵口宣（元祐元年十月十八日）

有敕卿等遠馳信幣來慶誕辰眷言四牡之勞宜享加籩之禮式頒寵數以示至恩

送伴正旦使副公路與賀北朝生辰并正旦使副相見傳宣撫問口宣（元祐

元年十二月九日

有敕：卿等方冬出使，涉春在塗，遠犯風埃，恩勤跋履，勉加鞭策，卽造會朝。

賜大遼賀正旦人使正月六日朝辭訖就驛御筵口宣（元祐元年十二月二

十五日）

有敕：卿等來脩舊好，克備多儀，既陞見以告辭，將駕言而反命，載嘉勤勤，宜錫燕私。

賜新除中大夫守尚書右丞劉摯辭恩命不許斷來章批答（元祐元年十一

月）

覽表具之道有行藏，時有用捨，歲不我與，難以智求；道之將行，豈容力避？大言大利，固當安而受之；小行小廉，非所望於卿者。成命不再，可無復辭！

賜劉摯辭免恩命不允斷來章批答（元祐元年十一月）

省表具之政如農耕，以旣穫爲能事；言如藥石，以愈疾爲成功。若耕不穫，疾不愈，朕何望焉？所以用卿者，非以富貴卿也。勉卒成業，何以辭爲？

相州賜大遼賀正旦人使却回御筵口宣（元祐元年十二月二十二日）

有敕：卿等歲首奉觴，禮成復命，改轅北道，再節近藩，宜錫宴私，以彰眷寵。

班荆館賜大遼賀正旦人使却回御筵口宣（元祐元年十二月十九日）

有敕：卿等遠達使辭，載嚴歸駟，方改轅於北道，暫再節於都門，益重眷懷，往伸燕餞。

賜大遼賀正旦人使正月一日入賀畢就驛御筵口宣（元祐元年十二月十

一日）

有敕：卿等遠飭使輶，來脩鄰好，屬此方春之旦，宜均既醉之歡，爰命燕胥，以昭眷寵。

皇帝遣太皇太后迴大遼皇帝賀正旦書（元祐二年正月五日）

百年之好，既講於春朝，萬壽之儀，兼陳於燿殿，恭因省侍，具述來音，感懌之懷，言宣莫罄。

皇帝迴大遼皇帝賀正旦書（元祐二年正月五日）

東風協應，感徂歲之更新，遠使交馳，崇歡言而講舊，粲然禮幣，申以書詞，欣懌之深，敷陳罔究。

賜鎮江軍節度使判大名府韓絳詔書，賜藥口宣（元祐元年十一月十日）

有敕：方面重寄，無逾老成，丘園歸休，難遂雅意，特頒珍劑，以示至懷，方此沍寒，益加調養。

賜新除依前中大夫守中書侍郎呂大防辭免恩命不允斷來章批答口宣（元祐元年十一月十一日）

元祐元年十一月十一日

有敕：大政所關，西臺爲重，朕難其選，無以易卿，宜卽欽承，毋煩退避。

賜新除中大夫守尙書右丞劉摯辭恩命不允斷來章批答口宣（元祐元年十一月十五日）

十一月十五日

有敕：卿嘉猷屢告，清議所歸，授受之間，臣主無愧，速起視事，副朕所期。

班荆館賜大遼國賀興龍節人使赴闕口宣（元祐元年十一月二十一日）

有敕：卿等抗旌遠道，弭節近郊，乃眷勤勞，良深軫念，特頒燕衍，以示惠慈。

## 卷二

皇帝爲冬節奏告永裕陵神宗皇帝表本

伏以歷紀天正，史書日至，謝舒長於測景，增忱惕於履霜，恭惟諡號皇帝，德邁堯仁，功恢禹迹，游衣冠於原廟，徒仰威神，望松柏於橋山，永懷悲慕。

皇太后殿夫人爲冬節往永裕陵酌獻神宗皇帝表本

伏以一陽來復，萬物懷生，空臨觀浸之辰，無復稱觴之慶，恭惟諡號皇帝，道齊覆載，德冒華夷，從南狩於蒼梧，神游已邈，望西陝於銅雀，涕慕空深。

皇帝爲十一月一日奏告永裕陵神宗皇帝日表本

伏以始饒於寒，復興嗣歲，寢園而增慕悼，日月之不留，恭惟諡號皇帝，道貫百王，澤涵萬宇，永瞻帝所之樂，坐起堯牆之悲，饋奠莫由，馳誠罔極。

皇太后殿夫人爲年節往永裕陵酌獻神宗皇帝表本

伏以葦桃在戶，徒講三朝之儀，椒柏稱觴，無復萬年之壽，恭惟諡號皇帝，功施無外，德洽有生，隨鼓漏於寢園，莫親饋奠，望衣冠於原廟，空極涕流。

皇帝爲三月一日奏告神宗皇帝日表本

伏以旣成春服，時方禊洛之初，砥諷寢園，古有薦鮪之禮，恭惟諡號皇帝，配天立極，如日載陽，仰餘澤之旁流，致羣生之遂茂，光靈愈遠，涕慕空深。

皇帝爲神宗皇帝大祥往永裕陵奏告表本

伏以寢廟告成，永動廓然之感，柏城森列，遽興拱矣之悲，恭惟諡號皇帝，澤浸函生，慶垂後裔，配天無極，奉謨訓以長存，示民有終，悵神游之安在，恭脩祥奠，莫訴哀誠。

皇帝爲神宗皇帝大祥內中奏告表本

伏以追號罔極，實抱終身之憂；祥禪有期，蓋追先王之禮；恭惟諡號皇帝，睿明照世，神智自天，雖清廟肅雍，瞻之莫見，而威顏咫尺，凜然常存，悲慕之深，華夷所共。

皇太后殿夫人為神宗皇帝大祥往永裕陵酌獻表本

伏以颯馭上賓，日以違矣；隙駒過邁，祥而廓然；恭惟諡號皇帝，道始家邦，化刑夷夏；天地之運，固代謝於陰陽；草木何知，徒興悲於霜露；莫親饋奠，惟極哀誠！

賜觀文殿學士正議大夫知河南府孫固乞致仕不許詔（元祐二年正月一日）

起之祠館，付以留籥，使士有所矜式，民有所依怙，屬任之意，豈輕也哉？釋位謀安，引年求避，此疎遠小臣之事，非所望於卿也，尚體至意，勿亟懷歸！

賜觀文殿學士正議大夫知河南府孫固乞致仕不允詔（元祐二年正月一日）

外服之歎，矧欲辭位而去，遂安丘園哉！三川重鎮，務舉大體，簿書期會，則有司存，優遊卒歲，可以忘老！

賜觀文殿學士正議大夫知河南府孫固再乞致仕不許詔（元祐二年正月一日）

遵前詔，以慰中外之望！  
敕孫固：廊廟之舊，歷事三朝，名德並隆，如卿者有幾？無故釋位，其謂朝廷何？卿既自為謀，亦為乃后謀之，勉

賜觀文殿學士正議大夫知河南府孫固再乞致仕不允詔（元祐二年正月二十五日）

教孫固朕永懷三宗，追用其人，所以尊禮慰藉其意者，自以爲無失矣。而卿浩然懷歸，若不可復留，何哉？勉徇大義，毋違朕志！

撫問熙河蘭會路臣寮口宣（元祐二年正月二十五日）  
有教卿等服勤疆場，賦政兵民，言念劬勞，實分憂顧，特加存問，以示眷懷。

在京諸宮觀開啓神宗皇帝大祥道場齋文

伏以密音如昨，新穀再升，望仙馭於帝鄉，陳法筵於淨宇。人天來會，共脩最勝之緣；梵釋同游，永錫無疆之慶！

撫問資政殿學士知揚州王安禮口宣（元祐二年正月二十七日）  
有教卿久去廊廟，出臨江淮，綏懷流亡，肅遏寇盜，遠惟勤瘁，特示撫存。

賜尙書左丞李清臣生日詔（元祐二年二月二十四日）  
教清臣春之方中，月後幾望，篤生王國之彥，蔚爲廊廟之華。神既聽於靖恭，民亦宜於愷悌。膺我慶賜，永綏

壽祺！

景靈宮奉安神宗皇帝御容祝文

伏以恭承仙馭，奄宅殊庭，罄海宇以駁奔，儼人天之景從。願同日月之照，少答神民之心。乃眷新官，永垂餘慶！

垂拱殿開啓神宗皇帝大祥道場齋文



伏以喪期有數，方敷於壑舟；法海無邊，聊資於岸棧；有嚴祕殿，恭啓淨筵；時御六龍，徘徊宮闕；永同千佛，陟降入天。

賜皇叔祖保信軍節度使安康郡王宗隱生日禮物口宣  
有敕：卿屬尊望重，德厚慶隆，方誕育之令辰，有匪頌之故事，克膺壽祉，永服寵光！

天章閣權奉安神宗皇帝御容祝文

伏以唐虞稽古，雖絕名言；文武重光，已新崇構；下慰華夷之望，仰慕天日之容。將住宅於靈宮，永懷攀慕；願少安於祕殿，無盡瞻依！

賜皇叔祖寧國軍節度使華原郡王宗愈生日禮物口宣（元祐二年二月二

十七日）

有敕：卿望重宗盟，德隆藩服，載協誨彌之旦，光膺積慶之餘；特示寵頒，永綏壽祉！

內中福寧殿下寒節爲神宗皇帝作水陸道場齋文

伏以甚雨疾風，感春律之將變；鑽燧改火，悼喪期之不留。爰啓淨筵，以資冥福；願登大覺，永濟函生！

賜皇叔祖昭信軍節度使懷東郡王宗瑗生日禮物口宣（元祐二年二月二日）

有敕：卿爵齒旣隆，德望斯稱；載更誕日，胥慶家庭；式侑燕私，以資壽祉！

內中神御殿張挂奉安神宗皇帝御容祝文

伏以祥祭告終，聖靈改御；優如在位，威不違顏；雖天日之光，固難形似；而神人之奉，永有瞻依；悲慕愈深，照臨無極！

神宗皇帝大祥祭訖撤饌除靈座時皇帝躬親扶神御別設一祭祝文  
伏以俛就終喪禮當卽遠永瞻陵廟將徹几筵攀慕若疑追懷罔極

寒節就驛賜于闐國進奉人御筵口宣（元祐二年二月）

有敕汝等觀光上國述職遐方屬茲改火之辰想有懷歸之念宜頒燕衍以示恩私

賜新除樞密直學士知定州韓忠彥乞改一偏州不允詔（元祐二年二月）  
救忠彥朕嘗覽閱古之圖觀宗臣之文俯仰今昔有概於心會中山闕守差擇人門卿庶幾焉勉副朕意何  
以辭爲

賜樞密直學士守兵部尚書王存乞知陳州不允詔

救王存卿出入四朝更涉夷嶮金石之節終始惟一六卿之長所以倡九牧而厚風俗也豈以職事煩簡爲  
輕重哉君子出處朝廷之大事而風雨寒暑膚理之微疾也姑安厥位以稱朕意

奉安神宗皇帝御容赴景靈宮導引歌詞

帝城父老三歲望堯心天遠玉樓深龍顏鬢髮蕭蕭遠腸斷屬車音離宮春色瑣瑤林雲闕海沉沉遺民猶  
嚮當時曲秋鴈起汾陰

景靈宮宣光殿奉安神宗皇帝御容畢皇太后親詣行禮祝文（元祐二年三

月十四日）

伏以奔奔祠宮巍巍天象聖靈雖遠哲命惟新仰瞻如在之威永錫無疆之慶敢祈昭鑒下燭微誠

景靈宮宣光殿奉安神宗皇帝御容日開啓道場青詞（元祐二年二月十四

日）

伏以天鑒不遠，誠感則通；方寶構之肇新，宜真游之降格；具嚴法席，高咏靈篇；內安清淨之居，外錫烝黎之福。

景靈宮宣光殿奉安神宗皇帝御容罷散朱表（元祐二年二月十四日）  
馭風雲闕，既參日月之光；弭節琳宮，尙答神民之望。爰開法會，庶款真庭；願推往聖之心，永錫函生之福！

景靈宮宣光殿奉安神宗皇帝御容日開啓道場齋文  
伏以祠宮風啓，真室告成；仗勝會於佛僧，導靈游於梵釋；更推餘祉，旁及含生。

賜朝散大夫試御史中丞傅堯俞乞外郡不允詔（元祐二年三月十三日）  
救堯俞負中外之望，居得言之地；朕方虛己，樂聞嘉猷。乃者水旱連歲，民流未止；賊盜將熾，財力靡敝。卿既欲圖實効，以酬恩朕，亦將考所言以責實。偃息藩郡，豈所望哉？

五嶽四瀆等處祈雨祝文（元祐二年三月十七日）

期年以來，水旱作沴，振廩同食，冠蓋相望。已責勸分公私，並竭惟待一熟之麥，以蘇垂死之民；而冬不雨，以徂春，苗將秀而不實，顧惟冲昧，有失政刑，感傷陰陽，延及鰥寡。既非下民之罪，亦豈上帝之心？惟神聰明，毋愛膏澤，則民有息肩之漸，神無乏祀之憂。

賜鎮江軍節度使充集禧觀使韓絳茶藥詔（元祐二年三月）

救韓絳春夏之交，寒澳相沴，起居之節，調適爲難。眷子元臣，久勞于外，宜加存問，且錫珍良，勉蹈至和，以符眷倚！

賜保寧軍節度使馮京告救茶藥（元祐二年三月二十一日）  
救馮京，卿以篤老，久勤外服，留籥之重，擁髦而東，蒙犯氛埃，徒御良苦。宜省思慮，近藥物，勉遵時令，以副眷

懷。

賜鎮江軍節度使充集禧觀使韓絳赴闕詔（元祐二年三月二十七日）  
救韓絳卿擢自祖宗輔翼先帝德望之重天下聳聞與其置之一方勞以民事不若歸安闕下式瞻儀刑詰老閒居固非所望嘉猷入告夫豈不能

賜鎮江軍節度使充集禧觀使韓絳赴闕詔（元祐二年三月二十七日）  
救韓絳爲天下計則賢者常勞爲人臣謀則老者當逸今朝廷待卿之意酌處其中奉朝請於琳宮所以系民望；釋負荷於留籥所以慰雅懷勉及清和亟還朝著

賜新除保寧軍節度使馮京告敕詔書茶藥口宣（元祐二年二月二十八日）  
有敕全魏之寄舊德爲宜勉卽征途以答民望往頒珍劑詔示眷懷

賜鎮江軍節度使充集禧觀使韓絳詔書茶藥口宣（元祐二年三月二十八日）  
有敕：卿德齒俱高，誠請彌確；重以民事，久勞元臣；旣飭還車，宜頒珍劑；尙加調養，以副眷懷！

大相國寺開啓祈雨道場齋文  
伏以旱暵旣久，麥禾將空；仰惟天人之師，宜專雲雨之施；庶幾慈愍，寬我憂危！

集禧觀開啓祈雨道場青詞

洞淵龍王水府聖衆饑饉之患，民流者甚年；吁嗟之求，詞窮於是日；乃眷陰靈之宅，實爲雲雨之司；涵濡之功，指顧而辦；罔吝天澤，以答民瞻。

賜故夏國主嗣子乾順進奉謝恩馬馳回詔（元祐二年四月十七日）

詔向遣行人往賻裏事，繼陳方物，來奉謝章，惟忠可以附民，惟禮可以定國，勉終誠節，以副眷懷。

諸宮觀寺院等處祈雨青詞齋文

饑饉之患，民流者期年，吁嗟之求，詞窮於是日，仰惟至道之助，推廣上天之仁，招呼羣龍，時賜霑澤，罔以德而廢其言。

天地社稷宗廟神廟等處祈雨祝文

惟德弗類，致常暘之災，斯民何辜，有若饑之懼，旬浹不雨，麥禾皆空，口省再三，夙夜祇慄，引領雲霓之望，援手溝壑之餘，既窮之詞，其忍弗聽！

賜太師文彥博乞致仕不許批答（元祐二年三月二十九日）

卿出入四世，師表萬民，無羨於功名，而有厭於富貴，其所以忘身徇國，捨逸就勞者，豈有求而然哉！凡以先帝之恩，生民之故也，卿之在朝，如玉在山，如珠在淵，光景不陳，而草木自遂，去就之際，損益非輕！昔西伯善養老，而太公自至，魯穆公無人子思之側，而長者去之，卿自為謀則善矣，獨不為朝廷惜乎！藥餌有間，時遊廟堂，家居之樂，何以異此？

賜太師文彥博乞致仕不允批答（元祐二年三月二十九日）

朕脩身以承六聖，虛己以聽四輔，而法度未定，陰陽未和，民未樂生，吏未稱職，中夜以思，方食而歎，雖不敢以事諉元老，實望其以身率百官，卿猶未即於安，孰敢不盡其力！此聖母冲入之本意，而天下有識之所望也。昔唐太宗以干戈之事，尚能起李靖於既老，而穆宗文宗以燕安之際，不能用裴度於未病，治亂之效，於斯可見，朕意如此，卿其少安！

賜宰相呂公著乞退不許批答（元祐二年三月二十九日）

卿才全而德備，積厚而施博，明亮篤誠，坐屈羣策；既以天下公議，而用於此矣；豈以卿之私意，而聽其去哉？水旱之災，不德所召，卿當助我，求所以消復之道，不當求去我也。詩不云乎：「大夫君子，昭假無贏，大命近止，無棄爾成。」勉思厥職，以答民望！

賜宰相呂公著乞退不允批答（元祐二年三月二十九日）

用賢之功，必要之久遠，日計不足，歲計有餘，朕之用卿，期於百姓之既富，卿之自信，亦豈一日而成功常賜之災，天以警朕，風夜祇懼，與卿同之。朕若歸過於股肱，何以答天戒？卿若釋政而安逸，何以塞民言？各思其憂，少安厥位！

賜太師文彥博乞致仕不允批答口宣（元祐二年三月二十九日）

有敕：卿德望冠於累世，風采聞於四夷，方茲仰成，倚以為重，退老之請，所未欲聞！

賜宰相呂公著乞退不允批答口宣（元祐二年三月二十九日）

有敕：卿柱石本朝，著龜當代，方茲注意，實所仰成，宜體朕心，姑安其位！

賜尚書刑部侍郎范百祿乞外任不允詔（元祐二年三月二十九日）

敕百祿：成王命陳商，民在辟，予曰辟，爾惟勿辟，予曰宥，爾惟勿宥，惟厥中。古之有司，與天子相可否，蓋如此，而况公卿之間，議有異同，而不盡其說哉？例在中書，與在有司，固宜審處，歸於至當，而卿遽欲以此去位，非古之道也。其益修厥官，以稱朕意！

賜交州進奉人朝見訖就驛御筵口宣（元祐二年四月五日）

有敕：汝等恭持方物，來款塞垣，冒涉修途，觀光上國，宜頌燕勞，以示恩私。

賜龍圖閣直學士新差知秦州呂公孺乞改授官觀小郡差遣不允詔（元祐

二年四月二日

敕公孺朕願懷西方思得賢守使邊有備而民無擾以卿耆老練達德宇淵靜秦又舊治吏士服習臥護諸將無以易卿

故聽宣劉氏堂祭文

奉侍有年肅雍靡懈今其亡矣良用惻然沒而有知來舉茲奠

故聽宣劉氏墳所祭文

盡瘁內職歸全近郊既掩諸幽往致斯奠責其窳窳極爾哀榮

五嶽四瀆等處祈雨祝文（元祐二年四月十日）

天人之交應若影響雨暘不順咎在親言失之戶庭害及寰宇求治雖切不當天意之中聽言雖多未聞民病之實刑罰有過賦役未平一人之愆百姓何罪避坐徹膳猶當許其自脩悔禍轉災庶或救之將鑒於神蓋反掌之易而民免擠壑之憂仰瞻雲霓待命旦夕

五嶽四瀆等處謝雨祝文（元祐二年四月十日）

乃者常暘為災歷時愈熾念咎責已寧丁我躬求哀籲天並走羣望果蒙膏澤之賜一拯流亡之餘我愧于民敢廢無災之懼神終其賜願必有年之祥

鄭州超化寺祈雨齋文（元祐二年四月九日）

伏以常暘為災歷時愈熾秋穀未栽夏苗將空天意未回佛慈所惑願以不思議智力大解脫神通時興法雲普賜甘澤

鄭州超化寺謝雨齋文（元祐二年四月九日）

等慈應物，不倦於禱求；神智無方，何難於膏澤？旱沴既弭，農民其康。仰惟不宰之功，豈待有爲之報？爰修淨供，少達純誠！

景靈宮罷散奉安神宗皇帝御容道場功德疏文（元祐二年四月七日）  
伏以肇新寶構，祇奉睟容。修妙供於珠庭，結勝緣於淨衆。真游永奠，法會告成。普冀含生，悉蒙餘祉。

賜外任臣寮進奉興龍節馬詔敕書（元祐二年四月十二日）  
敕韓縝誕彌之慶，遠邇攸同。眷惟外服之良，來效右牽之禮。言念誠恪，不忘數嘉。

賜彰化軍節度使開府儀同三司判大宗正事宗晟上表乞還職事不許詔（元祐二年四月十五日）

敕宗晟書云：「孝乎，惟孝友於兄弟，施於有政，是亦爲政。」卿以膝下之養，爲宗人之法；古之爲政，孰大於此？而欲以親辭職耶？其益修厥官，以稱吾意。

賜彰化軍節度使開府儀同三司判大宗正事宗晟上表乞還職事不允詔（元祐二年四月十五日）

敕宗晟古者庶子之官治，而邦國有倫所治雖簡，而所寄甚重。卿爲宗室祭酒，德度之美，刑于中外。朕方慶瓜瓞之茂，而欲觀麟趾之應，益勵厥職，無棄爾成。

永裕陵脩移角嶽門戶柏窠奏告神宗皇帝祝文  
園寢之奉，巡行以時；增植所宜，卜云其吉。先事而告，亦禮之常。

永裕陵脩移角嶽門戶柏窠祭告土地祝文  
寢園之奉，栽植以時。惟爾有神，實嚴所守。敢祈昭鑒，永底平寧。



白溝驛賜大遼賀坤成節人使御筵兼傳宣撫問口宣（元祐二年四月十七日）  
有敕卿等肅將慶幣遠涉脩塗風埃浩然徒馭勤止宜頌燕衍以示眷懷。

卷三

賜尙書左丞李清臣乞退不允批答（元祐二年四月十八日）

卿以方聞之舉擢自厚陵禁林之選用於神考逮受顧命弼子冲入義既同於戚休身豈輕於出處遽欲引去聞之惻然姑安厥常以助予治

賜尙書左丞李清臣乞退不許批答（元祐二年四月十八日）

祥除之初念我聖祖所與共政不忘舊人而卿博學多聞通練古今小心畏慎不見過失力引求去爲之惻然勉留輔子益祗厥服

賜文武百寮文彥博以下上第一表請皇帝御正殿復常膳不允批答（元祐二年四月二十二日）

朕卽位二年水旱繼作致災之故實惟冲人旣延及於無辜復貽憂於文母是以坐不安席食不甘味實欲深念厥咎豈徒見之空言而雨不崇朝農猶告病欲徇來請惕然未寧其一乃心勉正厥事毋重朕之不德以答天之深戒

賜文武百寮文彥博已下上第一表請太皇太后復常膳不許批答（元祐二年四月二十二日）

旱暵之罰，自冬及夏，天之降災，如此其久，則夫致災之道，豈一日而然哉？雖力行罪己之文，尙恐非應天之實，而卿等以膚寸之澤，遽欲卽安，覽之惕然，未敢自赦，其交修不逮，務盡厥誠，期茲歲於有秋，雖復常其未晚。

集禧觀洪福殿等處罷散謝雨道場青詞齋文

德有愧於動天，敢辭屢請，道無私而應物，豈間微誠，霽一雨以咸周，起三農於旣病，仰承靈貺，莫報深仁！

集禧觀洪福殿罷散謝雨道場朱表

旱暵爲災，禱求屢瀆，賴神之賜，霽澤以時，蓋至道之無私，豈不德之能致，載陳謝懇，少答靈休！

賜尙書左丞李清臣乞退不允批答口宣（元祐二年四月二十七日）

有敕：卿綜轄樞機，雍容廊廟，義當體國，謀豈先身，往喻至懷，少安舊服！

賜溪洞蠻人彭允宗等進奉端午布敕書（元祐二年五月十日）

敕彭允宗族居裔壤，心慕華風，來脩任土之儀，遠效充庭之實，較惟勤悃，良用數嘉！

賜集禧觀使鎮江軍節度使開府儀同三司韓絳到闕生饋口宣（元祐二年

五月十二日）

有敕：卿力辭繁劇，歸卽燕安，想見老成，渴聞嘉話，特頒牢醴，以勞駉駉！

神宗皇帝禪祭太皇太后親行祝文

寒暑之變，忽焉再昇，練祥之餘，復將三月，勉從卽吉之典，莫遂無窮之哀！

神宗皇帝禪祭皇帝親行祝文

旣祥之餘，徙月而吉，迫於先王之禮，徒有終身之憂，瞻仰聖靈，伏深感慕！

神宗皇帝禪祭皇太后親行祝文

喪期有數，禫月告終，哀雖未忘，禮弗敢過，追慕之至，中外所同！

賜文武百寮文彥博已下上第五表請皇帝御正殿復常膳允批答（元祐二年五月二十九日）

朕以寡昧，膺受多福，常欲損上益下，畏天之威，矧茲旱災，咎在不德，而卿等以雨澤既至，封章屢上，勉從其意，甚媿于中，夫天之有風雷雨霓，猶朕之有號令賞罰，朕不脩明其事，何以責應于天，永思其終，無忘訥諷！

賜文武百寮文彥博已下上第五表請太皇太后復常膳允批答（元祐二年五月二十九日）

德積無素，民罹其災，精誠莫通，禱不時應，雖蒙膏澤之報，僅救焦枯之餘，勉徇來衷，猶虞後患，其謹視盜賊，勦邛流亡，益務交脩，以裨不逮！

景靈宮天興殿開陶井眼祭告里域真官祝文

神游之庭，井泥不食，日辰之吉，浚治以時，諗爾明靈，庶無悔咎！

賜新除尙書左丞劉摯辭免恩命不允詔

敕劉摯：朕昔聞卿言，今任以政，已試之效，見於事功，廊廟闕人，以次選用，宜其右不宜其左，能於昔不能於今，豈有是哉！

賜新除中大夫守尙書右丞王存辭免恩命不允詔（元祐二年五月二十六日）

敕王存：朕歷選百辟，試之以事，惇厚而文，剛毅而和，更涉變故，德守不移，無逾卿者，夫享天下之利者，任天下之患，居天下之樂者，同天下之憂，朕非以是富貴卿也，其何以辭！

賜皇伯祖彰化軍節度使高密郡王宗晟生日禮物口宣（元祐二年六月一

日）

有敕：卿德茂宗枝，望隆公衮，推本流長之慶，有嘉震肅之辰，宜是寵頒，以綏壽祉。

班荆館賜大遼國賀坤成節人使到闕御筵口宣（元祐二年六月二日）

有敕：卿等肅將慶幣，垂及都門，遠涉暑塗，想懃行季式，頒燕衍以示恩私。

賜新除吏部侍郎傅堯俞辭免恩命乞知陳州不允詔（元祐二年六月十二

日）

敕堯俞連蹇三黜，栝遲十年，士無賢愚，爲國太息！如珠玉之在泥土，麟鳳之在網羅，朕所以拔卿於久廢之中，用卿於期年之內，天下拭目，欲觀所爲，而乃引微疾以自言，指便郡而去，豈獨於卿有報國未遂之歎，亦將使朕獲用賢不終之譏，勉復舊曹，以全大節！

賜護國軍節度使檢校太師濟陽郡王曹佺生日禮物口宣（元祐二年六月

九日）

有敕：卿世濟勳勞，德隆藩戚，屬此誕彌之日，豈無燕喜之私？膺我寵頒，永增壽祉！

賜新除中大夫守尚書右丞王存辭免恩命不允斷來章批答（元祐二年六

月十一日）

士有品目，定於僉言器之廟堂，蔽自朕志，豈有僉言既穆，朕志不移，而用過謙之詞，反已成之命，亟服乃事，宜無復云！

賜新除中大夫守尚書右丞王存辭免恩命不許斷來章批答

爲國不患於無人，有人而不用之爲患。事君非難於辭寵，居寵而無愧之爲難。吾之用卿，計已審矣！卿之自信，又何疑哉？

賜文武百寮太師文彥博已下上第一表請舉樂不許批答（元祐二年六月一日）

先王之禮樂，因情而立文。君子之哀樂，自中而形外。夫有莫大之戚，則有無窮之悲。先皇帝天覆四方，子養萬物，至今窮髮之表，尚餘流涕之民。而况宮庭之間，母子之愛，粗畢三年之制，遂講八音之和，所未忍聞，非不欲作。卿等謹於率禮，篤於愛君，徒欲亟舉舊章，顧未深明吾意，三復太息，難於黽從！

賜文武百寮太師文彥博已下上第一表請舉樂不允批答（元祐二年六月一日）

禮之至者無文，哀之深者無飾，故禫而不樂，古人非以求名，琴不成聲，君子以爲知禮。朕以宗廟之重，勉蹈先帝之餘，履其位，惕然而自驚，用其物，潛焉而出涕，未報昊天罔極之德，常懷終身不忘之憂，欲從衆言，亟舉備樂，而金石絲竹，乃悽耳之聲，干戚羽旄，皆眩目之具，哀旣未泯，樂何從生，再閱來章，徒增感慕！

賜文武百寮太師文彥博已下上第二表請舉樂不許批答（元祐二年六月一日）

遏密之制，雖盡於三年，追懷之私，豈論於徒月。金石在御，側然未寧，吾不以一身之憂，廢天下之樂，今施之郊廟，用之軍旅，州閭之會，絃歌相聞，獨盡餘哀，止於中禁，以爲於義未害，是故行之不疑。

賜文武百寮太師文彥博已下上第二表請舉樂不允批答（元祐二年六月一日）

朕少遭閔凶，僅畢祥禫，雖俛就企及，非以過制爲賢，而創巨痛深，不能以禮自克，觀過其黨，聖人許之禮曰：「喪三年以爲極，亡則弗之忘矣！」誠重違國老之忠告，姑欲盡人子之至情。

賜太師文彥博等請太皇太后受冊第一表不許批答（元祐二年六月四日）  
吾聞聖人以天下爲憂，未聞以位號爲樂也，損己裕物，畏天檢身，此吾平日之本心，非獨遇災而一發也。孔子曰：「以約失之者鮮矣。」卿等以是輔我，顧不美哉？

賜集禧觀使鎮江軍節度使開府儀同三司韓絳乞致仕不允詔（元祐二年六月四日）

韓絳向以宏才，臥護化道，凡斯民之利病，蓋一方之安危，朕方虛懷以待元老，冀疾病之有間，得雍容而造朝，時聞嘉言，以輔不逮，告老之請，殊非朕心！

賜韓絳乞致仕不允詔（元祐二年六月四日）

元老在位，邦之榮華，徒以精神折衝，非以筋力爲禮，游神道館，擁節家庭，於卿同告老之安，而國有貢賢之美，勉自輔養，期於少留！

賜同知樞密院事范純仁生日詔（元祐二年六月十八日）  
純仁卿天資文武，世濟勳勞，載嘉誕日之臨，豈獨私門之喜，宜膺慶賜，以介壽期！

賜文武百寮太師文彥博已下上第四表請舉樂不許批答（元祐二年六月

九日）

吾之本性，以清淨寂寞爲樂，雖在平日，無游觀聲技之念，矧艱難之後，哀疚之餘，中夜以興，方食而歎，將不堪其憂者，豈有意於樂哉？雖欲勉從，未能自克，忠告屢却，愧歎兼深。

賜文武百寮太師文彥博已下上第四表請舉樂不允批答（元祐二年六月九日）

鐘鼓以導和，羽籥以飾喜，饗之飲食之節，適於口體之宜。今衰麻之除，莫敢逾制；而琴瑟之御，則有未安。卿等忠誠確然，開喻至矣。惟反求諸心，而弗得，故欲行其言，而未能。推之人情，當識朕意。

賜太師文彥博等上第二表請太皇太后受冊許批答（元祐二年六月九日）  
吾上順帝則，下酌民言，處以無心，期於寡過。卿等以為協氣既應，羣謀僉同，若固違典禮之常，恐莫慰天人之望。遇災而懼，昔者非以為謙，聞義則遷，吾亦豈敢自必。勉從故事，以副嘉言。

就驛賜大遼賀坤成節使副銀鈔羅錦被褥等口宣（元祐二年六月二十八日）

有敕：卿等遠持慶幣，來講鄰歡，徒馭少休，舍館既定，首膺寵錫，當體眷懷！

賜新除試吏部侍郎范百祿辭免恩命不允詔（元祐二年六月十二日）

夫以天官之貳，治夏卿之選，簿書繁重，條格紛委，苟非其人，則士之失職而無告者多矣。朕難其材，不以輕授；卿有應務之敏，而行之以勤，有守官之亮，而濟之以通，往行其志，何以辭為？

賜皇叔楊王顯生日禮物口宣（元祐二年七月十九日）

有敕：卿屬尊魯，衛德重閭，平每臨載育之辰，永錫無窮之慶，宜膺寵數，以介壽祺！

相州賜大遼賀坤成節人使却迴御筵口宣（元祐二年七月八日）

有敕：卿等遠涉歸途，再離秋暑，駕言近郡，少憩旋車，宜示眷懷，往頌燕俎。

賜外任臣寮進奉坤成節銀敕書（元祐二年七月二十八日）

敕劉昌祚汝承流外服雅意本朝爰因載誕之辰遠致同寅之禮眷惟忠盡良極歎嘉

雄州撫問大遠使副賀坤成節口宣（元祐二年七月十二日）

有敕卿等抗旃脩好馳傳及疆遠涉暑途實勞驂馭特加存撫式示眷懷

賜新除知樞密院安燾辭免恩命不允詔（元祐二年六月二十四日）

敕安燾人才之難從古所歎圖任以舊爲國之常卿以瓌異之資荷艱難之寄勲勞靡懈望實愈隆雖云超陞不改疇昔徒以任之既久則責之宜專知無不爲乃所望於卿者卑以自牧亦何補於國哉

賜皇弟山南東道節度使開府儀同三司傑生日禮物口宣（元祐二年六月

十八日）

有敕卿以棣華之親襲瓜瓞之慶載臨誕日宜厚寵頒服我異恩永膺介福

賜新除知樞密院安燾辭免恩命不許斷來章批答（元祐二年六月二十四

日）

覽表具之論材考德聖人所以公天下難進易退君子所以善一身權之以義孰爲輕重訓兵論將威懷戎狄卿以是事上豈不賢於遠巡退避也哉

賜新除知樞密院安燾辭免恩命不允斷來章批答（元祐二年六月二十四

日）

覽表具之德稱其服臣主俱榮食浮於人上下交病朕之爲天下慮甚於卿之自爲謀也思而後行有出無反成命不再卿毋復辭

賜安燾辭免恩命不允斷來章批答口宣（元祐二年八月五日）



有敕：卿以舊德，簡在朕心。成命既孚，僉言咸穆。宜卽祇受，毋煩固辭。

賜權陝府西路轉運判官孫路銀絹獎諭敕書（元祐二年六月二十八日爲築蘭州西荆堡成下同）

有敕：孫路宣力計臺，悉心邊政，相視衿要，繕完保障。訖用有成，不愆於素。使虜無可乘之便，民有足恃之安。乃眷忠勤，不忘嘉歎。

賜知蘭州王文郁銀絹獎諭敕書（元祐二年六月二十八日）

有敕：王文郁汝以禦侮之才，當專城之寄，百堵皆作，三月而成。非威服民夷，身先士卒，則安能以一時之役，成無窮之利。達於朕聽，良用歎嘉。

賜新除檢校太尉守司空依前開府儀同三司致仕韓絳辭免恩命不允批答（元祐二年七月七日）

國家尊異耆老，砥礪廉隅，凡致爲臣，必厚其禮。而况卿出入四世，師表萬民，身任安危，位兼將相，永惟三宗眷遇之重，宜極一品褒崇之榮。成命既孚，僉言惟允。宜從中外之望，罔徇謙冲之私。

賜韓絳辭免恩命不允批答（元祐二年七月七日）

有敕：惟耆老成人，雖或謝事，耄期稱道，終不忘君。其在丘園，豈殊廊廟。嘉猷入告，卿其不易此心。大事就訪，朕亦敢忘斯義。命秩之數，典冊之文，不如此無以慰朕心而答民望。國有常典，卿毋復辭。

瀛州賜大遼賀坤成節人使回程御筵口宣（元祐二年七月十日）

有敕：卿等抗旌來聘，已事言還。方次邊城，少休候館。宜頌宴俎，以勞歸轡。

賜知樞密院事安燾已下罷散坤成節御筵口宣

有敕：卿等忠存體國，義切戴君，結妙果於三乘，祝慈闈之萬壽，宜膺寵錫，以示眷存。

玉律圍賜大遼賀坤成節，人使射弓例物口宣（元祐二年七月八日）

有敕：卿等致命寶隣，出游禁藥，爰敦射事，以佐賓歡，宜旌審固之能，式厚珍良之賜。

賜大遼賀坤成節，人使生鱸口宣（元祐二年七月八日）

有敕：卿等遠涉脩塗，來陳慶幣，舍館初定，徒馭寶勞，宜錫餼牽，以昭寵數。

賜大遼賀坤成節，人使內中酒果口宣（元祐二年七月十一日）

有敕：卿等遠馳使傳，申請隣歡，既執贄以造廷，亦展幣而成禮，宜加寵錫，以示眷存。

賜太師文彥博已下罷散坤成節道場香酒果口宣（元祐二年七月十一日）

有敕：卿翊績大猷，倡先多士，方慈闈之獻壽，嚴法會以薦誠，宜有寵頒，以昭殊眷。

賜知樞密院事安燾已下罷散坤成節道場香酒果口宣（元祐二年七月十

一日）

有敕：卿等同竭忠嘉，助成孝治，方慈闈之獻壽，嚴法會以荐誠，宜有寵頒，以昭殊眷。

坤成節就驛賜于闐國進奉人御筵口宣（元祐二年七月十一日）

有敕：汝等款塞觀光，趨庭效貢，屬誕彌之稱慶，均燕衍以示慈，祗服寵嘉，式旌忠恪。

賜殿前都指揮使燕達已下罷散坤成節道場香酒果口宣（元祐二年七月

十一日）

有敕：卿等同罄純忠，力脩勝果，用祈慈壽，既徹梵筵，宜有寵頒，以昭眷遇。

賜皇伯祖鎮南軍節度使開府儀同三司宗暉已下罷散坤成節道場香酒果

口宣（元祐二年七月十二日）

有敕：卿表率宗盟，助成孝治，祝延慈壽，仰扣佛乘，既畢梵筵，宜加寵賚。

賜平海軍節度使駙馬都尉李瑋已下罷散坤成節道場香酒果口宣（元祐二年七月十二日）

二年七月十二日）

有敕：卿等乃心王室，同輸欲報之誠，稽首佛乘，共祝無疆之壽，既成法會，宜示寵頒。

賜皇叔揚王荆王禮泉觀罷散坤成節道場香酒果口宣（元祐二年七月十二日）

二日）

有敕：卿等德冠邦家，義兼臣子，脩勝緣於西竺，祈壽嘏於南山，宜有寵頒，以成法會。

賜新除依前靜海軍節度使進封南平王李乾德制誥敕書（元祐二年七月八日）

八日）

敕：朕子養兆姓，囊括四方，譽之於天，豈吝膏澤？卿守藩滋久，事上益虔，高爵隆名，極其榮顯，庶緣大寵，以服民心，其思盡忠，以稱恩禮！

班荆館賜大遼賀坤成節人使回程酒果口宣（元祐二年七月十六日）

有敕：卿等講成聘禮，歸次都門，復此少留，逝將言邁，宜頒餞罍，以寵行驂。

皇帝達太皇太后迴大遼皇帝賀坤成節書（元祐二年七月）

嘉月令辰，篤生壽母，珍函重幣，交慶寶鄰，已恭致於德音，復欽傳於慈旨，其為感懌，未易名言！

皇帝迴大遼皇帝問候書（元祐二年七月）

四牡載馳，遠勤於使介，尺書為問，申講於鄰，歡方履素，秋克膺純福，益祈保護，式副願言！

太皇太后皇太后皇太妃受冊奏告太廟并諸陵祝文 (元祐二年六月十九日)

日

伏以祇事親闈，庶幾孝治；配德祖考，既務極於推崇；篤生眇冲，亦敢忘於褻顯。將奉寶冊，率循舊章；涓日甚良，先期以告。

太皇太后皇太后皇太妃受冊奏告景靈宮等處青詞 (元祐二年七月十九日)

日

伏以祇事親闈，庶幾孝治；配德祖考，既務極於推崇；篤生眇冲，亦敢忘於褻顯。將事寶冊，率循舊章；徽福于神，先期以告。

賜前兩府并待制已上知州初冬衣襖詔 (元祐二年九月七日)

敕元發歲將墜戶工告始衰，宜頌在笥之珍，以示維藩之寵服之安煖，體我眷懷。

賜諸路知州職司等并總管鈐轄至使臣初冬衣襖敕書

敕馮潔已王事靡盬，日月其除，屬霜露之戒寒，待衣裘而卒歲，宜加寵錫，以示眷懷。

賜諸路蕃官并溪洞蠻人初冬衣襖敕書

敕瞻旣職在捍邊，志常面內，屬此嚴凝之候，宜均輕煖之恩，服我寵頌，益思忠報。

賜諸路屯駐駐泊就糧本城諸員寮等初冬衣襖都敕

敕汝等久勤外服，屬戒祈寒，爰念捍城之勞，普均挾纊之惠。

西京應天禪院會聖宮脩神御帳座畢功告遷諸神御祝文 (元祐二年八月

二日)

頃詔有司，恭脩幄座，暫安別殿，以作庶工，既匠事之告成，宜真游之來復，願垂昭鑒，及此良辰。

西京應天禪院會聖宮脩神御帳座畢工奉安諸神御祝文（元祐二年八月

二日）

幄坐告成，允協歲時之吉，靈游永奠，復瞻天日之光，庶俾後人，仰蒙餘慶。

賜西南羅蕃進奉敕書（元祐二年九月三日）

敕：汝世爲要服時款塞垣，志慕華風，來脩職貢，載惟忠恪，良用歎咨！

## 卷四

賜熙河秦鳳路帥臣并沿邊知州軍臣察茶銀合兼傳宣撫問口宣（元祐二

年八月十日）

有敕：卿等風分邊寄，深識虜情，屬此盛秋，勞於警備，宜加寵賚，以示眷懷。

賜熙河秦鳳路提刑轉運茶銀合兼傳宣撫問口宣（元祐二年八月十日）

有敕：卿持節宣風，久分憂寄，調兵足食，想極賢勞，宜有寵頒，以彰眷遇。

賜觀文殿大學士光祿大夫知永興軍韓縝茶銀合兼傳宣撫問口宣（元祐

二年八月十日）

有敕：卿釋政廟堂，均勞方面，兵民之重，綏御實勞，往諭至懷，仍加寵賚。

賜皇弟武成軍節度使祁國公偁生日禮物口宣（元祐二年八月十六日）

有敕：卿棟華襲慶，桐葉分封，載臨震肅之辰，特致壽康之祝，其膺寵錫，以介神休。

賜朝議大夫試戶部尚書李常乞除公邊一州不允詔（元祐二年八月二十

二日）

救李常在泮獻馘，亦儒者之常；挺劍疾鬪，蓋孔門之事。雖然，義有輕重，理有後先；與其自請捍邊，治癘疥之疾；曷若盡瘁事國，軫心膂之憂？苟推是心，何往非報？雖願受長纆而往者，卿之本心；然自以尺箠而鞭之，吾有餘力，尙體此意，姑安厥官！

賜太師平章軍國重事文彥博宰相呂公著自今後入朝凡有拜禮宜並特與免拜詔（元祐二年八月二十五日）

救彥博：朕聞凡杖以優賢，著之典禮；畫老無下拜，書於春秋；魏太傅鍾繇以足疾，乘車就坐，自爾三公有疾，以爲故事，而唐司徒馬燧亦以老病，自力對於延英，詔使毋拜。今吾耆老大臣，四朝之舊，德隆而望重，任大而憂深者，惟卿與公著而已。（呂公著詔即改云：惟彥博與卿而已。）方資其著龜之告，豈責以筋力之禮？今後入朝，凡有拜禮，宜並特免，卿其專有爲之報略，無益之儀，毋或固詞，以稱朕意。

賜宰相呂公著乞罷相位除一外任不許批答（元祐二年八月二十八日）

夫以才御物，才有盡而物無窮；以道應物，道無窮而物有盡。凡今之患，所乏非才，以卿篤於愛君，必能建長久之策，澹然無我，可以寄枉直之權。二年于茲，百度惟正，事既就緒，民亦小康，至於微疾之屢攻，此亦高年之常理，卿其良食自輔，爲國少安，譬如止水之在槃，豈復勞心於鑿物，心且不勞，而况於力乎？

賜宰相呂公著乞罷相位除一外任不允批答（元祐二年八月二十五日）

朕以天下之大，知爲君之難，有朽索馭六馬之憂，有抱火措積薪之懼，正賴多士協爲一心，朝夕以思，彌縫其闕。凡今中外執事，膂力之畢陳，視吾一二老臣，進退以爲節，卿若無事而引去，人將相顧而自疑，而况邊鄙未

寧兵民多故；而予左右之老，先自求於便安，則夫疎遠之臣，何以責其盡瘁？勉輔不逮，期於有成。

賜宰相呂公著乞外任，不允。批答口宣：「元祐二年八月二十三日。」  
有敕：全德之老，朕所仰成。大義未安，卿當畏去。純忠所激，微疾自除。

賜新除兼侍讀依前光祿大夫吏部尚書蘇頌辭免恩命，不允詔。〔元祐二年〕

八月二十七日

救蘇頌：朕惟左右正人之求，甚難其選；以爲直亮多聞之益，宜莫如卿。方虛懷於至言，豈曲從於遜避？亟服  
乃事，毋煩固辭！

迎奉神宗皇帝御容赴西京會聖宮，應天禪院奉安，導引歌詞。

經文緯武，十有九年。中遺烈震羌戎，循橋夾道，千君長。猶是建元功，西瞻溫洛，與神崧。蓮宇照瓊宮，人間俛  
仰成。今古流澤，自無窮！

荀子〔元祐二年〕

臣近奉聖旨，撰賜文彥博呂公著今後入朝免拜詔書。今又準內降指麾，撰不允彥博辭避免拜批答。臣謹  
按禮經：「八十拜君命，一座再至。」所謂拜君命者，傳命而拜，非朝見也。然且不免。周天子賜齊桓公胙，曰：「伯  
父，耄老無下拜。」公曰：「天威不遠，顏咫尺。」下拜登受。所謂無下拜者，拜於堂上，非不拜也。然且不敢。鍾繇以  
足疾乘車就坐，疑若不拜，然亦無明文。君前乘車，豈足爲法？而馬燧延英不拜，蓋是臨時優禮。無今後遂不復拜  
之文。祖宗舊例，如呂端之流，以老病進對，亦止於臨時傳宣不拜。今來彥博公著今後免拜指麾，自是朝廷優賢  
貴老，度越古今，無可議者。但臣是有司，合守典禮，兼恐彥博公著終不敢當，以臣愚見，不若允其所請。若聖恩優  
閔老臣，眷眷不已，過其朝見間，或傳宣不拜，足以爲非常之恩。臣忝備侍從，懷有所見，不敢不盡。所有不允批答，

臣未敢撰取進止御寶批依奏脩撰，允所請批答進入。

賜太師文彥博辭免不拜恩命許批答（元祐二年八月二十七日）

卿義重股肱，望隆堂陛，陸廉遠則堂皇峻，股肱逸而元首安，故出異恩，特鑄苛禮，而卿深執恭異，力守典刑，確然自陳，義不可奪，勉從其意，愧歎于中。

賜太師文彥博辭免不拜恩命允批答（元祐二年八月二十七日）

朕優禮師傅，達德齒之尊，以亟拜為可略，古之道也。卿謹嚴朝廷，明君臣之分，以不拜為未安，禮之節也。道並行而不悖，義有重而難移，勉徇所陳，不忘嘉歎。

賜宰相呂公著乞罷相位不許斷來章批答（元祐二年八月二十七日）

孔子曰：「苟有用我者，朞月而已可也，三年有成。」夫以聖人，猶待三年而後成功，況其下者？今卿助我為治，自以為既成矣乎？其未也，譬如玉人雕琢玉，中道而易之，豈復成器哉？

賜宰相呂公著乞罷相位不允斷來章批答（元祐二年八月二十七日）

古者君臣之間，率常千載一遇，今聖母在位，正身虛己，仰成輔弼，雖疎遠小臣，猶欲畢命自效，而卿乃以小疾求去，縱無意於功名，獨不惜此時乎？勉卒乃事，使百姓富足，四夷乂安，然後謝事歸老，豈不臣主俱榮哉？

賜宰相呂公著乞罷相位不允斷來章批答口宣（元祐二年八月二十八日）

有敕：卿之在位，為德與民，朕意不移，徒煩屢請，速起視事，毋復固辭。

賜守司空開府儀同三司致仕韓絳乞受冊禮畢隨班稱賀免赴詔（元祐二年八月二十七日）

韓絳：卿脫展軒冕，頤神丘園，不為絕俗之高，愈篤愛君之意，喜聞冊號，請觀內廷，在臣子之誠心，卿為盡



飾願筋骸之未禮，吾所未安。

賜宰相呂公著乞罷免相位不允詔（元祐二年八月二十八日）

敕宰相之責綏靖四方，羌人既俘，士氣益振，長轡遠馭，方資老謀，卿不強起，孰卒吾事，近以二者之故，削亟拜之禮，而彥博執謙不同，朕既從其請矣，卿起就位，復何疑哉。

賜皇弟定武軍節度使開府儀同三司咸寧郡王俱生日禮物口宣（元祐二年八月二十八日）

有敕：眷予母弟，誕慶茲辰，載詠斯千之祥，宜均既醉之福，祇膺寵數，永錫壽祺。

賜太師平章軍國重事文彥博辭免入朝拜禮允批答口宣（元祐二年八月二十八日）

有敕：卿勳德愈高，謙恭不伐，盡事君之禮，忘屈身之勞，重建嘉言，特寢前命。

生獲鬼章文武百寮稱賀宣答詞（元祐二年八月二十八日）

太皇太后

種羌叛換，西鄙繹騷，首出偏師，遂擒元惡，安邊之喜，與卿等同之。

皇帝

凶狡就俘，羌戎一震，既增吏士之氣，亦寬戍守之勞，靖寇息民，與卿等同喜。

八月二十八日入內高班蔡克明傳宣取批答宰臣以下賀生獲鬼章表

太皇太后

國家偃兵息民，函養中外，鬼章無故犯順，神人棄之，雖廟社無疆之休，亦將相一心之助，封章來上，嘉歎不

忘！

皇帝

朕上承慈訓，下盡羣策，務漸寬於民力，本無意於邊功。既狂狡之就擒，知休息之有日。再開來奏，嘉歎於中！

賜皇叔成德、荆南等軍節度使守太尉開府儀同三司荆王顯生日禮物口宣

（元祐二年八月二十日）

有敕：卿以名世之傑，居叔父之親，乃眷良辰，實鍾餘慶。宜膺異數之禮，永錫無疆之休！

賜宰相呂公著辭免不拜恩命允批答（元祐二年九月一日）

卿執德惟一，守禮不回，不以坐論為安，而以拜上為泰。使朕不盡養老之意，而卿得畏威之道，勉從其志，嘉

歎不忘！

賜宰相呂公著辭免不拜恩命許批答（元祐二年九月一日）

君之視臣，譬之手足，方責其大，不強所難。而卿深執謙恭，力求避免，深惟孔子事君盡禮之義，曲從其請，以

傲情殫。

熙河蘭會路賜种誼已下銀合茶藥及撫問犒設漢蕃將校以下口宣（元祐

二年九月二日）

有敕：汝等受成元帥，問罪種羌，既俘凶渠，備見忠力，各加犒賜，用示眷俸！

賜保靜軍節度使檢校司空開府儀同三司建安郡王宗綽生日禮物口宣（

元祐二年九月二日）

有敕：位隆將相，德重宗藩，方秋律之既深，紀門弧之多慶，宜膺寵錫，以介壽祺。

撫問劉舜卿兼賜銀合茶藥口宣（元祐二年九月二日）

有敕：卿翰屏西服，威懷種羌，嚴兵盛秋，得雋戎落，特遣勞問，仍示寵頒。

賜陝府西路轉運判官孫路銀合茶藥口宣（元祐二年九月五日）

有敕：汝以職事出按邊防，屬此軍興，想勞心計，宜加寵錫，以示眷懷。

賜陝府西路轉運司勾當公事游師雄銀合茶藥口宣（元祐二年九月五日）

有敕：汝以儒臣，習知疆政，王事靡盬，周爰咨謀，宜有寵頒，以旌勤瘁。

西京會聖宮應天禪院奉安神宗皇帝御容奏告諸帝祝文（元祐二年九月

六日）

於穆神考，陟配在天，有嚴祠宮，從祀我祖，時日協吉，聖靈其安，寵綏後人，永錫純嘏。

西京應天禪院會聖宮奉安神宗皇帝神御祝文（元祐二年九月六日）

於皇在天，丕冒下土，矧此山陵之近，顧瞻兩都，宅於蒿洛之間，上聯五聖，有嚴淨宇，（會聖宮改為真館）

祇奉睟顏，願追梵釋之遊，（會聖宮改為仙聖之遊）永答人天之望！

生擒西蕃鬼章奏告永裕陵祝文（元祐二年九月五日）

大綱獲禽，必有指蹤之自，豐年高廩，孰知耘耔之勞，憬彼西戎，古稱右臂，自嘉祐末，木征擾邊，至熙寧中，董  
[斲]方命於赫聖考，恭行天誅，非貪尺寸之疆，蓋為民除蝨蟻，遂建長久之策，不以賊遺子孫，而西蕃大首領鬼章  
首犯南川，北連拓拔，申命諸將，擇利而行，旋聞偏師，無往不克，吏士用命，爭酬未報之恩，聖靈在天，難逃不漏之  
網，已於八月戊戌，生獲鬼章，頡利成擒，初無涸水之恥，郵支授首，聊報谷吉之寃，謹當推本聖心，益脩戎略，務在  
服近而來遠，期於偃革以息民，仰冀威神，曲垂昭鑒！

賜太師文彥博上第一表乞致仕不允批答（元祐二年九月八日）

省表具之，卿之求去蓋數矣，言不爲不切，而朕終莫之從，朕之留卿亦至矣，禮不爲不盡，而卿終莫之亮，君臣之際，情不相喻，朕甚疑之。夫樂丘園而厭軒冕，亦古人之一節，而非聖賢之高致，尊者老以重朝廷，蓋天下之大計，而非沖人之私欲，與其使朕屈公議以從卿，曷若卿少貶其私意，以徇天下乎？

賜太師文彥博上第一表乞致仕不許批答（元祐二年九月八日）

覽表具之，卿之所以欲去者二：疲於朝會，勞於應物一也；功成身退，欲享其樂二也。而吾之所以必留者三：卿以傑人之資，開物成務，世不可闕一也；弼亮四朝，更涉變故，謀無遺策二也；名冠天下，進退之間，爲國休戚三也。吾方盡養老之道，殺禮以優賢，廟堂之上，猶有足樂，則夫卿之欲去者可回，而吾之必留者，蓋不可易也。

賜太師文彥博乞致仕第一表不允批答口宣（元祐二年九月九日）

有敕：朕上承慈訓，下酌民言，秉國之成，非卿莫可。來請雖切，朕意不移。

賜太師文彥博乞致仕不許斷來章批答（元祐二年九月十一日）

覽表具之，爲君難，爲臣不易，非吾推誠無疑，不能起卿於安佚，非卿忘身徇國，不能從我於艱難。召用之初，中外相慶，搢紳莫不競勸，父老至於涕流，中道而歸，其義安在？宜思一身之樂，輕於社稷，毋使庶人之議及於朝廷！

賜太師文彥博乞致仕不允斷來章批答（元祐二年九月十一日）

省表具之，君子安身業德，如山嶽之鎮，開物成務，如江河之流。若山嶽之鎮，動搖不安；江河之流，行止自便，則物將交病，人亦何觀？朕之望卿，無以異此。宜守不移之志，以成可大之功。

賜太師文彥博乞致仕不允斷來章批答口宣（元祐二年九月十一日）

有敕：卿望重百辟，威聞四夷；進退之間，輕重所寄；毋煩屢請，朕命不移！

賜太師文彥博乞致仕不允詔（元祐二年九月十日）

敕彥博：卿求退之意，著於士民；執謙之心，信於天地；勉當委重之託，初無懷祿之嫌；大義苟安，細故可略；朕命不再，卿其少安！

賜太師文彥博乞致仕不許詔

敕彥博：論道則忘年，卿不可以年既高而為請；稱德則鄙力，卿不可以力不足而為詞；斷之於中，義有不易；豈以屢請之故而廢將成之功？體君至懷，以慰公議。

十月一日永裕陵下宮開啓資薦神宗皇帝道場齋文（元祐二年九月十一日）

橋山永望，莫瞻弓劍之餘；陽月載臨，徒增霜露之感；招延淨衆，崇建梵筵；庶集勝因，仰資真馭。

撫問秦鳳等路臣寮口宣（元祐二年九月十八日）

有敕：卿等綏馭兵民，布宣條教，眷惟忠藎，想極劬勞；屬此早寒，各宜厚愛！

西京會聖宮應天禪院奉安神宗皇帝御容禮畢開啓道場齋文（元祐二年九月十七日）

原廟告成，神游既奠；雖聖靈之無礙，對越在天；從世法之有為，歸依於佛；普願幽明之域，悉登淨妙之庭；集此勝因，以賞仙馭。

白溝驛傳宣撫問大遼賀興龍節人使及賜御筵口宣（元祐二年九月十二日）

有敕：卿等遠馳信幣，來慶誕辰，念此脩塗，喜於入境，宜加燕勞，以示眷存。

西京會聖宮應天禪院奉安神宗皇帝御容前一日奏告永裕陵祝文（元祐二年九月三日）

國家推本漢儀，立郡國之廟，參用唐制，就佛老之祠，乃眷洛都，載瞻園寢，並興靈宇，以奉神嬉，閔惟冲人，恭蹈成憲，謹擇良日，臨遣近臣，庶回日月之光，少答人天之望。

沿路撫問奉安神宗御容禮儀使呂大防已下口宣（元祐二年九月十二日）

鄭州

有敕：卿等恭持使節，祇事祠官，遠涉郵途，實勞啓處，特加存問，以示眷懷。

鞏縣

有敕：卿等出使別都，展儀原廟，衝涉微凜，勤勞遠途，體此眷懷，宜加調衛。

西京

有敕：卿等暫去闕庭，服勲郵傳，奉祠之重，率禮爲勞，已事遄歸，式符眷遇。

賜嗣濮王宗暉生日禮物口宣（元祐二年九月二十二日）

有敕：流澤之深，積慶之厚，嘉此良日，薦生賢王，受茲多儀，永錫難老。

永裕陵十月日表

戒寒墮戶，倏及於秦，正前晦行陵，祇循於漢禮，恭惟謚號皇帝，懿文緯世，厚德載時，休老勞農，追述養民之政，厲兵講武，敢忘經國之謀，永望寢園，益增感慕。

西京會聖宮應天禪院奉安神宗御容禮畢押賜禮儀使已下御筵口宣（元

祐二年九月二十一日

有敕卿等既成原廟復奠神游乃眷元臣往嚴盛禮宜均燕衍以示眷存

賜龍圖閣直學士尙書工部侍郎蔡延慶乞知應天府不允詔（元祐二年九月十六日）

月十六日

敕延慶入侍禁近出殿藩服已試之效藹然有聲今若子工宜有餘力夫游刃肯綮尙不辭難退食委蛇豈當告病庸理微疾行當自痊勉安厥官以稱朕意

賜外任臣寮等進奉坤成節功德疏詔敕書（元祐二年九月二十四日）

敕馮京職雖在外忠不忘君集勝妙之良因致壽康之善禱眷言誠盡良極歎嘉

賜朝奉郎通判梓州趙君爽進奉坤成節無量壽佛敕書（元祐二年九月二十四日）

十四日

敕趙君爽相好妙嚴衷誠傾盡汝期乃后享無量之年吾欲斯民同極樂之世永言忠愛良用歎咨

趙州賜大遠皇帝賀興龍節大使茶藥詔（元祐二年九月二十七日）

敕隣歡載講使節甚華永言郵傳之勤適此風霜之候宜加寵賚以示眷存

趙州賜大遠皇帝賀興龍節副使茶藥詔（元祐二年九月二十七日）

敕卿載馳遠道良苦祁寒豈無藥物之嘉以輔寢興之節宜膺寵錫尙體至懷

神宗皇帝御容至會聖宮井應天禪院前一日奏告諸帝祝文

三靈眷命六聖在天崧洛之間仙釋所館惟茲吉禘之始當祔出游之庭念彼元臣昔皆侑食一新惟肖之像永陪如在之神敢冀威靈曲垂昭鑒

十月朔本殿夫人往永裕陵酌獻神宗皇帝表本

雨霜隕籙感閉塞於天時收濟滌場思艱難於王業恭惟尊諡皇帝禹功紀地堯則惟天威加四夷尚餘肅物之凜仁及萬彙永同挾纊之溫省奉無期瞻懷靡極

賜熙河路副總管姚兕等銀合茶藥口宣（元祐二年九月十四日）  
有敕卿以武略過人忠義思報焚蕩虜境宣明國威特示寵頒以觀來效

賜尚書左丞劉摯生日詔（元祐二年九月二十一日）  
敕劉摯律協應鐘辰集析木實生俊輔休有令名膺我寵章以介眉壽

卷五

神宗皇帝御容進發前一日奏告諸宮觀等處青詞（元祐二年九月二十五日）

嵩洛之間山陵所在嚴道釋之淨宇奉衣冠之別祠恭擇良辰啓行仙馭敢微福於羣聖庶流祉於含生仰叩真靈冀垂昭鑒

神宗皇帝御容進發前一日奏告天地社稷宗廟等處祝文

祇畏天明率循祖武進衣冠之原廟鎮崧洛之靈祠恭擇良辰啓行仙馭分遣執事並告有神

賜涇原路經略使并應守城禦賊漢蕃使臣已下銀合茶藥兼傳宣撫問口宣

（元祐二年九月五日）

有敕戎虜逆天無故犯順忠義所激戰守有方犄角相望示以形勢犬羊自遁亭候無虞爰念勤勞不忘嘉



款！

賜太師文彥博生日詔（元祐二年九月二十九日）

敕彥博陽月載臨，剛辰協吉，篤生元老，弼亮四朝，允為廊廟之華，豈獨闔門之慶？往膺寵數，永錫壽祺！

賜大遼賀正旦人使白溝驛御筵并撫問口宣（元祐二年九月七日）

有敕：卿等遠馳華節，冒履薄寒，眷言郵傳之勤，少樂燕嘉之賜，往申寵問，式示眷存。

賜資政殿學士太中大夫新知成都府王安禮乞知陳穎等一郡不允詔（元祐二年十月一日）

祐二年十月一日

敕安禮：朕惟西蜀地狹而賦重，人儒而吏肆，徭役新定，農民在官，馭之無方，將不勝弊。惟朕左右信臣，明而不苛，寬而有斷，必能肅遏慢吏，扶養小弱，卿雖微疾，強為朕行，時近藥石，勉事道路，稱朕意焉。

皇帝達太皇太后賀大遼皇帝生辰書（元祐二年）

寒律既周，誕辰載紀，恭被慈闈之誨，俾脩慶幣之儀，永介壽康，式符頌禱，更祈調衛，以副願言！

皇帝賀大遼皇帝生辰書（元祐二年）

大呂還宮攝提正丑，載協誕彌之慶，永膺壽考之祥，臨遣使軺，往陳信幣，其為欣禱，莫盡名言！

公路賜奉安神宗御容禮儀使呂大防銀合茶藥詔（元祐二年十月七日）

敕：大防於赫神考，如日在天，雖光明無所不臨，而躔次必有所舍，肆予命爾，祇奉此行，禮既告成，勤亦良至，

感慕之外，嘉歎不忘！

公路賜奉安神宗御容押班馮宗道并內臣等銀合茶藥敕書（元祐二年十月七日）

月七日

敕馮宗道：逮事有年，追遠不懈，屬祠宮之告具，驂日馭以邁征，往復之間，忠勞亦至，特加存問，尙體至懷！

公路賜奉安神宗御容禮儀使呂大防押班馮宗道并使臣已下銀合茶藥兼

傳宣撫問口宣（元祐二年十月七日）

有敕汝（卿）祇率官常，往嚴像設，屬此寒凝之候，眷言往返之勞，式示寵綏，特加優錫！

太皇太后皇太后皇太妃受冊禮畢，奏謝天地社稷宗廟諸宮觀并諸陵青詞

齋祝文（元祐二年九月二十七日）

至哉坤元政必先於治內，養以天下，孝莫大於尊親，昔首正於號名，今復嚴於典冊，禮樂既具，神人允諧，分命邇臣（諸陵改「分命邇臣」字作「分命有司」）恭致成事，仰祈昭鑒，永錫鴻休，無任懇禱之至！

太皇太后皇太后皇太妃受冊禮畢祭諸神廟祝文（元祐二年九月二十七日）

日）

至哉坤元政必先於治內，養以天下，孝莫大於尊親，昔首正於號名，今復嚴於典冊，禮樂既具，神人允諧，分命有司，往告成事，庶祈靈祐，永保鴻休！

隆祐宮設慶宮醮青詞

伏以長樂告成，光動紫宮之象，清都下照，誠通絳闕之僊，祇卒多儀，肅陳菲薦，永惟慈孝之本，既享天人之心，介萬壽之無疆，錫五福之純備，無任懇禱之至！

賜太師文彥博生日禮物口宣（元祐二年十月五日）

有敕卿勳在廟社，名聞華夷，允儲河嶽之靈，宜享喬松之壽，往頒寵數，以慶佳辰。

賜南平王李乾德歷日敕書（元祐元年十月八日）

敕乾德眷彼海隅，被予聲教，宜有王正之賜，以爲農事之祥，動卹遠民，以問嗣歲。

永裕陵十一月旦表本

伏以商正紀曆，大呂旋宮，論時令以待來歲之宜，獻民力以共宗廟之祀，恭惟諡號皇帝，至仁無外，全德難名，文物聲明，但觀乘時之迹，昆蟲草木，孰知成歲之功，急景易遷，永懷何極！

皇帝建太皇太后賀大遼皇帝正旦書（元祐二年）

歲聿肇新，鄰歡載講，恭被慈闈之誨，遠通慶幣之誠，益冀保頤，永綏壽嘏！

皇帝賀大遼皇帝正旦書

三陽朋來，慶二儀之交泰，兩朝繼好，納萬民於阜昌，申救使車，肅將禮幣，願符善禱，永介純釐！

冬季傳宣撫問諸路公邊臣寮口宣（元祐二年十月十八日）

有敕：卿等守禦邊疆，憂勞夙夜，屬茲寒江，想各康強，特示眷存，往申勞問。

賜新除龍圖閣直學士依前中散大夫陳安石辭免恩命不允詔（元祐二年）

十月十八日

敕安石：士出身從仕，少壯陳力，耆老守節，朕必有以寵綏之。卿逮事四朝，敷歷中外，號稱良能，不見過失，書閣之拜，衆以爲宜，無復固辭，以遂成命。

賜資政殿學士太中大夫新差知成都府王安禮銀合茶藥詔（元祐二年十月）

月八日

敕安禮：朕求治如不及，用人惟恐失之，矧余良臣，惟自神考，出入中外，厥聲藹然，朕豈欲其遠去哉？特以全蜀之寄，甚難其選，知卿篤於忠義，當不以遠近爲意也。勉事道路，慎疾自愛，往安吾民，以稱朕意！

撫問知河南府張彥知永興軍韓鎮口宣（元祐二年十月十八日）  
有敕卿輟自廟堂出爲師帥勞於綏御寬我顧憂屬此寒凝勉加頤養

冬季撫問陝西轉運使副口宣（元祐二年十月十八日）

有卿卿等歲事將畢農工旣休永言乘傳之勞未遑退食之佚勉加輔養尙副眷懷

賜資政殿學士新差知成都府王安禮詔書銀合茶藥傳宣撫問口宣（元祐二年十月二十七日）

有敕卿西南之寄古今所難蓋自祖宗以來或輟鈞衡之舊與衆同樂非卿孰宜

賜皇弟鎮寧軍節度使開府儀同三司遂寧郡王佖生日禮物口宣（元祐二

年十月一日）

有敕乃眷賢王惟予介弟篤生茲日流慶方來往致予言以爲爾壽

趙州賜大遼賀興龍節使副茶藥口宣（元祐二年十月一日）

有敕卿等久勩輶傳遠涉風埃旣漸邇於中邦方少安於候館往頒珍劑以示眷懷

雄州撫問大遼賀興龍節使副口宣（元祐二年十月十七日）

有敕卿等恭修鄰好遠慶誕辰眷惟授館之初益喜造朝之近往申問勞式示眷存

雄州撫問大遼賀正日使副口宣（元祐二年十月十八日）

有敕卿等遠會春朝篤脩鄰好言念乘輶之久欣聞入境之初式示眷存往申問勞

元祐二年春貼子詞

其一（五言）

蕩蕩龍旂色，琅琅木鐸音。數行寬大詔，四海發生心。

其二

賜谷賓初日，清臺告協風。願如風有信，長與日俱中。

其三

草木漸知春，萌芽處處新。從今八千歲，合抱是靈椿。

其四（七言）

聖主憂民未解顏，天教瑞雪報豐年。蒼龍掛闕農祥正，父老相呼看藉田。

其五

昨夜東風入律新，玉關知有受降人。聖恩與解河湟凍，得共中原草木春。

其六

翰林職在明光裏，行樂詩成拜舞中。不待驚開小桃杏，始知天子是天公。

太皇太后閣六首

其一（五言）

珮刻春何力，欣榮物自知。發生雖有象，覆載本無私。

其二

小殿黃金榜，朱簾白玉鈎。一聲雙日蹕，春色滿皇州。

其三

仗下春朝散，宮中晝漏稀；兩廂休侍衛，應下讀書幃。

其四（七言）

五日占雲十日風，憂勤終歲爲三農；春來有喜何人見，好學神孫類祖宗。

其五

共道十年無臘雪，且欣三白壓春田；盡驅南畝扶犁手，稍發中都朽貫錢。

其六

不獨清心能省事，應緣克己自消兵；傳聞塞外千君長，欲趁新年賀太平。

皇太后閣六首

其一（五言）

寶冊瓊瑤重，新庭松桂香；雪消春未動，碧瓦麗朝陽。

其二

瑞日明天伏，仙雲擁壽山；倚欄春晝永，金母在人間。

其三

朝罷金鋪掩，人閑寶瑟塵；欲知慈儉德，書史樂青春。

其四（七言）

仙家日月本長閑，送臘迎春豈亦然；翠管銀罌傳故事，金花綵勝作新年。

其五

彤史年來不絕書，三朝德化婦承姑；宮中侍女減珠翠，雪裏貧民得袴襦。

其六

邊庭無事羽書稀，閑遣詞臣進小詩；共助至尊歌喜事，今年春日得春衣。

皇太妃閣五首

其一（五言）

葦排猶在戶，椒柏已稱觴；歲美風先應，朝回日漸長。

其二

甲觀開千柱，飛樓擢九層；雪殘烏鵲喜，翔舞下觚稜。

其三（七言）

孝心日奉東朝養，儉德應師大練風；太史新年瞻瑞氣，四星明潤紫宮中。

其四

九門挂月未催班，清禁風和玉漏閑；崇慶早朝銀燭下，佩環聲在五雲間。

其五

東風弱柳萬絲垂，的皪殘梅尚一枝；重館乍欣蠶浴後，棣壇猶記燕來時。

夫人閣四首

其一（五言）

綵勝樓新語，酥釀滴小詩；昇平多樂事，應許外庭知。

其二

細雨曉風柔，春聲入御溝；已漂新荇沒，猶帶斷冰流。

其二（七言）

扶桑初日映簾昇，已覺銅螭暖不冰；七種共挑人日菜，千枝先剪上元燈。

其四

雪消鴛瓦已流澌，風暖犀盤尚鎮帷；縹渺紫簫明月下，壁門桂影夜參差。

皇帝回大遼，皇帝賀興龍節書（元祐二年）

誕日載臨隣，懽歲講封疆，雖遠晷刻不踰，惟信睦之交修，識情文之兩至，益深雅好，良極欣悰！

皇帝遣太皇太后回大遼，皇帝問候書（元祐二年）

嘉平紀月，震風惟時，屬茲慶使之來，重以慈闈之問，尋因省侍，悉致誠言，欣感之深，敷陳罔究！

賜宰相呂公著生日詔（元祐二年十月十八日）

敕公著，卿三世將相，四朝耆老，賽我良弼，實惟茲辰，茂膺維嶽之靈，永錫如陵之壽，就頒寵數，以示眷懷。

賜宰相呂公著生日禮物口宣（元祐二年十月十八日）

有敕：卿仁以庇民，忠以衛上，誕彌之日，慶慰良深，往錫寵章，以介眉壽。

冬季撫問諸路公邊臣寮口宣（元祐二年十月十八日）

有敕：卿等分憂久外，並塞早寒，眷此勤勞，形於軫念，往加勞問，式示眷存。

賜于闐國進奉人進發前一日御筵口宣（元祐二年十月二十九日）

有敕：汝等奉琛來覲，已事言歸，式嘉慕義之誠，宜有勞還之澤，往頒燕衍，祇服恩私。

賜外任臣寮歷日敕詔書（元祐二年十一月四日）

敕韓縉、朕肇修人紀，祇畏天明，欽若舊章，式頒新曆，凡我承流之寄，共成平秩之功。



班荆館賜大遼賀正旦人使到闕御筵口宣（元祐二年十月四日）  
有敕卿等夙抗使旌少休郊館乃眷川途之邈載惟駉馭之勞特賜燕私以旌懃瘁

班荆館賜大遼賀興龍節人使酒果口宣（元祐二年十一月九日）  
有敕卿等遠乘使傳方造都門屬此寒凝久於衝涉宜加就賜之禮以示勞來之恩

班荆館賜大遼賀興龍節人使御筵口宣（元祐二年十一月十一日）  
有敕卿等違犯苦寒來修舊好載喜使華之近特申郊勞之儀服我恩私少留燕衍

賜五臺山十寺僧正省奇等進奉興隆節功德疏等獎諭敕書（元祐二年十

一月一日）

敕省奇等清涼之域僊聖所游爰因彌月之辰來獻後天之祝永言懃至良極歎咨！

相州賜大遼賀正旦人使御筵口宣（元祐二年十一月十六日）

有敕卿等篤修舊好少憩近邦屬冰雪之嚴凝念車徒之勤勩往加燕勞式示眷懷

賜諸路臣寮春季銀鞋兼撫問口宣（元祐二年十一月八日）

有敕卿等各竭乃心久勞于外屬此寒凝之候永惟綏馭之勲式示眷存往加勞問

撫問知大名府馮京口宣

有敕卿以元老臥護北門寬我顧憂想勞綏御屬茲寒沍益務保頤！

賜大遼賀興龍節使副鈔羅等口宣（元祐二年十二月十八日）

有敕卿等解駉授館方講於隣歡遣使勞來宜敦於主禮往加優錫以示眷懷

賜大遼賀興龍節人使雄州回程御筵口宣（元祐二年十一月二十八日）

有敕：卿等聘事既成，歸途尚遠，屬此冰霜之候，眷言來往之勤，宜錫燕私，少紓行役。

賜外任臣寮進奉興龍節馬敕書（元祐二年十一月二十四日）

敕劉永年：汝職在蕃宣，義均休戚，旅庭稱慶，因物見誠，乃眷忠勤，不忘嘉歎！

賜知樞密院事安燾已下罷散興龍節道場香酒果口宣（元祐二年十二月

一日）

有敕：彌月之祥，敷天同慶，眷股肱之畢力，延釋梵以祈年，申以寵頒，助其愷樂！

賜步軍副都指揮使苗授已下罷散興龍節道場香酒果口宣（元祐二年十

二月一日）

有敕：卿等志在愛君，忠於衛上，屬誕彌之紀慶，修淨供以祈年，宜有寵頒，以旌勤意。

賜太師文彥博已下罷散興龍節酒果口宣（元祐二年十二月二日）

有敕：卿等以弼亮之重，散勞王家，因誕慶之辰，修崇法會，宜頒芳旨，以示眷存。

賜大遼賀興龍節前一日內中酒果口宣（元祐二年十二月二日）

有敕：卿等抗旌就館，已觀車騎之華，奉幣造朝，復歎威儀之美，就加寵錫，以示眷歎。

賜大遼賀興龍節十日內中酒果口宣（元祐二年十二月二日）

有敕：卿等奉幣諱歡，造廷稱壽，嘉禮儀之閑習，宜寵錫之便蕃，受此珍甘，以旌眷遇。

賜大遼賀興龍節朝辭訖歸驛御筵口宣（元祐二年十二月二日）

有敕：卿等使事既終，陸辭而後，少休賓館，將整歸驂，特示至懷，更頒嘉燕。

賜大遼賀興龍節臨洲回程御筵口宣（元祐二年十二月二日）

有敕：卿等已修舊好，復改北轅，雖候館之少休，眷歸途之尙邈，往頒燕俎，以示至懷。

賜新除寶文閣直學士李之純辭恩命不允詔（元祐二年十二月四日）

救之純祖宗之文章，與典謨訓誥，並寶於世，典領其事，非有德君子，雖積勞久次，不以輕授，蜀遠而入，窮困抑塞，至無所訴，朕專欲以德安之，故內閣之命，非獨以寵卿，抑將使蜀人知朕用卿，蓋以德選也，其深識此意，勿復固辭！

賜大遼賀興龍節人使朝辭歸驛酒果口宣（元祐二年十二月八日）

有敕：卿等已事言旋，指期風駕，歲寒遠道，良用軫懷，宜有寵頒，以旌勤瘁。

賜皇伯祖宗暉已下罷散興龍節道場香酒果口宣（元祐二年十二月五日）

有敕：卿等以義重宗藩，志存忠愛，先期誕月，歸命佛乘，迨茲法會之成，宜有分頒之寵。

賜大遼賀興龍節人使射弓例物口宣（元祐二年十二月六日）

有敕：卿等懷四方之志，挾五善之能，終日射侯，於是觀禮，宜申寵錫，以佐賓歡。

## 卷六

賜大遼賀興龍節人使班荆館却回酒果口宣（元祐二年十二月十日）

有敕：卿等聘事已成，征驂言邁，往餞於館，以華其歸，仍有寵頒，式昭厚眷。

永定院修蓋舍屋奏告諸帝后祝文

具嚴淨宇，祇奉寢園，眷惟焚燎之餘，少緩增修之役，仰祈昭鑒，永底燕寧！

永定院修蓋舍屋祭告土地祝文（元祐二年十二月十日）

伏以向因遺燼，延及淨祠，爰擇良辰，以興衆役；宜茲遣使，昭示有神。

賜于闐國黑汗王進奉登位敕書（元祐二年十二月十一日）  
敕：卿守藩西域，慕義中華，聞踐祚之新來，致梯山之貢，眷言忠恪，良用歎咨。

賜于闐國黑汗王進奉示諭敕書（元祐二年十二月十一日）  
敕：卿遠馳信使，來效貢琛，載詳重譯之言，深亮勤王之意，益隆褒賜，以答忠誠。

賜諸路臣寮中冬衣襖口宣（元祐二年十月十八日）  
有敕：霜露著至，衣褐未周，念我遠臣，何以卒歲？往均安煖之賜，尚體眷懷之深！

賜外任臣寮進賀太皇太后受冊馬詔敕（元祐二年十二月十六日）  
敕：曾布禮以正名國之舊典，載閱充庭之寶，式將戴后之心，朕眷忠勤，良深嘉歎！

賜外任臣寮進奉賀皇太后皇太妃受冊馬詔敕（元祐二年十二月二十六日）  
日）

敕：曾布典冊，告成宮闈之慶，事君盡禮，因物見誠，乃眷忠勤，不忘嘉歎！  
賜保寧軍節度使知大名府馮京進奉賀端午節馬詔（元祐二年十二月二

十六日）  
敕：馮京受鐵將壇，剖符畿甸，效充庭之駿足，慶冲火之良辰，乃眷勤誠，不忘嘉歎！

賜資政殿學士知鄧州韓維進奉謝恩馬詔（元祐二年十二月二十六日）  
敕：韓維廟堂均逸，遠不忘君，駟駿在庭，儀名於物，載惟忠盡，良極歎咨。

賜檢校司空左武衛上將軍郭進進奉謝恩馬詔（元祐二年十二月二十六

日)  
敕郭遠惟卿耆老，漸就退閑；不忘戴主之誠，遠效充庭之職；載嘉忠盡，良極歎咨。

賜溪洞彭儒武等進奉興龍節，綵布敕書（元祐二年十二月二十八日）  
敕彭儒武汝世能保境，志在觀光，遠修任土之宜，來備充庭之實；載惟忠恪，良極歎嘉。

接伴大遼賀興龍節人使送伴回程與大遼賀正旦人使相逢撫問口宣（元祐二年十月十七日）

有敕：卿等並駕使輶，遠敦隣好，屬風霜之凝冽，歷川陸之阻脩；宜示眷懷，特申問勞。

趙州賜大遼賀太皇太后正旦大使茶藥詔（元祐二年十月十七日）  
敕：卿久勤輶傳，遠犯風埃，眷言行邁之勞，良極軫懷之意；往頒珍劑，以輔至和。

趙州賜大遼賀太皇太后正旦副使茶藥詔（元祐二年十月十七日）  
敕：卿遠乘使傳，來講隣懽，屬此沍寒，尙勤行役；往加問勞，式示眷懷。

趙州賜大遼賀皇帝正旦大使茶藥詔（元祐二年十月十七日）  
敕：卿遠慶春朝，篤修隣好，永惟使事之重，遂忘行役之勞；既極歎嘉，宜申問勞。

趙州賜大遼賀皇帝正旦副使茶藥詔（元祐二年十月十七日）  
敕：徂歲向晚，脩途苦寒，方趨造於會朝，未即安於舍館；往如恩錫，增重使華。

趙州賜大遼賀太皇太后正旦使副茶藥口宣（元祐二年十月十七日）  
有敕：卿等遠馳使傳，方次州封，念此寒凝，艱於涉履；特申寵錫，以示眷存。

趙州賜大遼賀皇帝正旦副使茶藥口宣（元祐二年十月十七日）

有敕：卿等遠修聘事，來會歲元，眷言風駕之勲，宜有中途之賜，受茲珍品，喻我至懷。

相州賜大遼賀興龍節使副御筵口宣（元祐二年十二月一日）

有敕：卿等犯寒遠道，弭節近邦，少休風駕之勞，式示加餐之惠，服我寵數，以增使華。

相州賜大遼賀興龍節使副却回御筵口宣（元祐二年十二月四日）

有敕：卿等聘事告成，還車言邁，改轅北道，弭節近邦，眷言行役之勞，宜有燕私之寵。

賜皇伯祖高密郡王宗晟已下罷散興龍節道場香酒果口宣（元祐二年十一月一日）

二月一日

有敕：卿等以義重宗藩，駙馬改爲戚藩，志存忠愛，先期誕月，歸命佛乘，逮茲法會之成，宜有分頒之寵。

賜知樞密院事安燾已下罷散興龍節道場酒果口宣（元祐二年十二月一日）

日

有敕：誕彌之慶，綿宇所同，矧我臣工，方茲燕喜，宜有柔嘉之賜，以成豈弟之驩。

賜濟陽郡王曹佺罷散興龍節道場酒果口宣（元祐二年十二月一日）

有敕：卿位重戚藩，望隆耆德，歸誠覺苑，增祝壽山，宜有寵頒，以昭厚眷。

賜殿前都指揮使燕達已下罷散興龍節道場香酒果口宣（元祐二年十二月一日）

月一日

有敕：卿等志在愛君，忠於衛上，屬誕彌之紀慶，脩淨供以祈年，宜有寵頒，以旌勤意。

內中御侍以下賀皇帝冬至詞語（元祐二年十月二十日）

伏以月臨天統，首冠於三正，氣應黃宮，復來於七日，君道寢長，陽德光亨，恭惟皇帝陛下，清明在躬，仁孝遍

物垂衣南面，天何言而四時成，問學西清，日將旦而羣陰伏，裔夷奔走，年穀順成，豈惟四海之歡心，自識三靈之陰贊，如川方至，受命無疆，妾等待罪掖庭，備員婦職，共慶一陽之節，敢陳萬歲之觴。

內中御侍以下賀太皇太后冬至詞語

伏以消長有時，候微陽之來復，賢愚同慶，知君子之彙征，德化所加，神人並應，恭惟太皇太后陛下，睿明天縱，慈儉身先，振河嶽以不傾，地無私載，順陰陽而自化，天且不違，成功已陋於漢唐，論德蓋高於任姒，大有上吉，方獲助於三靈，既醉太平，當純備於五福，妾等職參長御，心奉慈闈，慶陽德之朋來，願天壽之平格。

內中御侍以下賀皇太后冬至詞語

伏以曠叟奏功，驗人和於緹室，日官占物，效歲美於黃雲，慶自宮庭，澤均海宇，恭惟皇太后殿下，輔佐內治，儀刑王家，推美國風，夙茂周南之化，考祥義易，共成坤厚之功，方迎日於三微，敢稱觴於萬壽，豈獨宮闈之願，實同中外之驩，妾等猥以微軀，被蒙慈渥，仰獻岡陵之祝，庶殫草木之誠。

就驛賜大遼賀興龍節人使宴口宣（元祐二年十二月十一日）

有敕：佳辰紀慶，聘事告成，申勅臣隣，往就舍館，同茲行樂，服我惠慈。

就驛賜大遼賀興龍節人使宴花酒果口宣（元祐二年十二月十一日）

有敕：卿等遠勤使傳，來慶誕辰，臨遣重臣，往頌燕俎，仍加寵錫，以示至懷。

賜大遼賀正旦使副銀鈔鑼等口宣（元祐二年十二月二十日）

有敕：卿等通兩國之權，不遠千里，驅一乘之傳，來慶三朝，宜有寵頒，以昭異眷。

相州賜大遼賀正旦人使却回御筵口宣（元祐二年十二月十四日）

有敕：卿等復理歸鞍，少休輔郡，念北轅之首路，犯西陸之餘寒，往致恩勤，曾留燕衍。

賜大遼賀正旦人使却回雄州御筵口宣（元祐二年十二月二十四日）  
有敕：卿等遠勤郵傳，冒涉冰霜，眷言往復之勞，已次封圻之上，宜頒嘉燕，以示至懷。

賜大遼正旦人使生餼口宣（元祐二年十二月二十四日）  
有敕：卿等郵傳遠勤，舍館既定，宜敦主禮，以犒馭徒，往賜餼牽，少紓勞瘁。

賜太師文彥博乞致仕不許詔（元祐二年十二月二十五日）  
敕：彥博，卿自去歲以來，數苦小疾，尙能勉留，以輔不逮，近者神明所相，體力自康，視聽不衰，步趨加健，乃欲求去耶？今御戎之策，未有定議，京東西河朔蕃饑，公私枵然，方與二三臣圖之，卿未可以卽安也。

賜文彥博乞致仕不允詔（元祐二年十二月二十五日）  
敕：彥博，卿歷相三宗，名聞四夷，位極一品，書考四十，自載籍以來，未之聞也。固當以國爲家，以天下爲身，以安社稷爲悅，而不當以居丘園爲樂也。朕方待卿而爲政，請老之言，所未欲聞。

送伴正旦使副沿路與賀北朝生辰并正旦使副相逢傳宣撫問口宣（元祐二年十二月二十五日）

有敕：卿等御命出使，徂冬涉春，適寒苦之倍常，知勤勞之加舊，勉驅郵傳，來造會朝。

賜大遼賀正旦入賀畢使副就驛酒果口宣（元祐二年十二月二十六日）  
有敕：卿等既闕闕庭，少安館舍，宜行慶賜，以樂春朝，往致甘芳，式華觴豆。

賜大遼賀正旦入賀畢使副就驛御筵口宣（元祐二年十二月二十六日）  
有敕：卿等遠抗使旂，來陳慶幣，眷東風之協應，嘉上日之同歡，宜就驛亭，往頒燕豆。

賜大遼賀正旦使副前一日內中酒果口宣（元祐二年十二月二十七日）



有敕：方興嗣歲，既饒餘寒，嘉隣好之篤修，念使華之少駐，式頒珍異，以示眷懷。

賜大遼賀正旦却回班荆館御筵口宣（元祐二年十二月二十七日）  
有敕：卿等聘事既成，歸途方啓，言念改轅之始，少留悵飲之歡，往推恩勲，下及徒取。

賜大遼賀正旦朝辭訖歸驛御筵口宣（元祐二年十二月二十七日）  
有敕：卿等寓館久勤，趨庭告去，不假壺觴之樂，曷爲徒馭之華，服我恩私，少留宴術。

賜大遼賀正旦朝辭訖歸驛御筵酒果口宣（元祐二年十二月二十八日）  
有敕：卿等聘事告成，歸車夙駕，屬此寒凝之末，眷言往返之勤，錫此珍芳，以將寵遇。

賜大遼賀正旦使副春幡勝口宣（元祐二年二月二十九日）  
有敕：剪刻之工，風俗惟舊，眷皇華之在館，屬春陽之肇新，宜有分頒，以增賁飾。

賜大遼賀正旦使副射弓例物口宣（元祐二年十二月二十九日）  
有敕：卿等出游禁籞，觀藝射侯，弓矢既均，禮儀卒度，宜加寵賜，以侑燕歡。

皇帝回大遼皇帝賀正旦書（元祐二年）  
獻歲發春，方祝永年之慶，睦鄰敦好，益修奕世之歡，信幣精華，書詞溫緝，再維雅契，良極欣悰！

皇帝達太皇太后迴大遼皇帝賀正旦書（元祐二年）  
正歲履端，遠勤於華，使慈闈申慶，重領於珍函，省侍之餘，誠言已達，永惟欣感，莫究言宣！

永安永昌永熙永裕陵忌辰奏告宣祖太祖太宗神宗皇帝表本（元祐二年十二月二十七日）

伏以卜年之永，恩洽於華夷，諱日之臨，感深於臣子，恭惟謚號皇帝，文武經世，威靈在天，每更不樂之辰，尚

有遺弓之慕！山陵永望，雨露增懷！

永安永昌永熙陵忌辰奏告昭憲孝惠孝明孝章淑德懿德明德元德章懷章穆章懿章惠章獻明肅皇后表本（元祐二年十二月二十七日）

伏以周南之化，刑恭儉於多方；渭北之游，極望思於原廟。恭惟諡號皇后，道應圖史，德參聖神。顧明發之永懷，仰徽音之如在。載瞻園寢，想見衣冠。

皇太后殿內人爲神宗皇帝忌辰朝永裕陵表本（元祐二年十二月二十七日）

伏以百年之畏，化被於無疆；終身之憂，感深於不樂。恭惟諡號皇帝，德齊堯禹，功陋漢唐，道蓋始於正家，謀方賡於燕翼，追攀罔極，慨慕徒深！

西京奉安神宗皇帝御容禮畢西京德音（元祐二年十月十四日）

門下朕以寡昧，仰繼聖神，顧瞻山陵，未忘弓劍之慕。益廣宗廟，以奉衣冠之游。祇遣輔臣，往嚴像設。敝風臺之仙宇，祭龜洛之仁祠。醉表一臨，陪京增重。山川改色，方賁祥而效珍。父老縱觀，或太息而流涕。宜施雷雨之澤，以答神人之心。於戲好生育物，既推文母之慈。崇德措刑，終成神考之志。賁爾有衆，宜體朕懷！

賜中大夫守尚書右丞王存生日詔（元祐二年正月四日）

敕王存卿以宏才與聞大政，誕日之慶，豈惟闔庭寵錫之隆，庶延壽嘏。

瀛洲賜大遼賀正旦人使回程御筵口宣（元祐二年正月五日）

有敕：卿等來修舊好，遠冒祁寒，涉歷冬春，服勤郵傳，式頌嘉燕，以答久勞。

賜試戶部侍郎趙瞻陳乞便郡不允詔（元祐三年正月十三日）

救趙瞻朕憂顯者舊取其宿望養育後又待其成材庶前後相繼朝不乏人則堂陛自隆國有所恃方今在廷之士孰非華髮之良而卿以康強之年爲遠引之計於義未可蓋難曲從

賜保州團練使鄧州總管王寶進奉戀闕并到任馬救書（元祐三年正月七日）

救王寶汝以選掄出分憂寄來效充庭之駿以將衛上之誠再省忠勤良深嘉歎

賜保寧軍節度使知大名府馮京進奉興龍節并冬至正旦馬詔（元祐三年

二月二十五日）

救馮京震夙之祥旅庭稱慶歲時之會因物效誠乃眷元臣實勤典禮多儀克舉屢數不忘

賜外任臣寮進奉謝恩馬詔救（元祐三年二月二十六日）

救御恩思報因物致誠效茲乘服之良示有驅馳之志永言忠盡良極歎咨

賜外任臣寮進奉興龍節功德疏詔救（元祐三年二月二十六日）

救誕彌之慶中外所同畢輸衛上之誠來獻後天之祝永言忠盡良極歎嘉

賜宰相呂公著上第一表乞致仕不允批答（元祐三年二月二十八日）

省表具之古者世臣譬之喬木身自拱把至于棟梁傑然羣材之中夫豈一日之力卿擢自仁祖迨茲四朝光輔朕躬允有一德不獨卿無心而事自定抑亦民旣信而功易成方今布在朝廷豈無豪傑之士猶當養以歲月待其德望之隆卿雖欲歸勢未可去宜安厥位以副朕心

賜宰相呂公著上第一表乞致仕不許批答

覽表具之卿三世將相一時耆龜不求備以取人則房喬之比其經遠而無競有謝安之風用能寧輯我家

靖共爾位；政在元老，人無異詞。胡為厭事而求歸，不復為國之長慮？方今官冗財匱，歲艱民貧，天步難安，國是未定。若方勤於樸斲，而遽易於工師，人其謂何？勢必不可，告老之請，吾未欲聞！

賜宰相呂公著上第一表乞致仕不允批答口宣（元祐三年三月二十九日）  
有敕：朕以冲眇，垂拱仰成，卿以耆老，圖任共政，無故而去，於義未安。

賜宰相呂公著上第一表乞致仕不許斷來章批答（元祐三年三月二十九日）

覽表具之，難進易退，固君子之常節；久勞思逸，亦老者之至情。然心存社稷，則常節為輕；身繫安危，則至情可奪。惟卿體國，豈待多言？苟大義之未安，雖百請而何益？宜安厥位，勿復此心！

賜宰相呂公著上第一表乞致仕不允斷來章批答（元祐三年三月二十九日）

覽表具之，宰相不自用，人主不自為，予欲識人物之忠邪，故以卿為水鏡；予欲知利害之輕重，故以卿為權衡。苟明此心，雖老猶壯；與其輕去軒冕，獨善其身，孰若優游廟堂，兼享其樂？益敦此義，勿復有云！

賜宰相呂公著乞致仕不允斷來章批答口宣（元祐三年四月一日）  
有敕：卿望重搢紳，義均休戚，如左右手，可須臾離。雖屢形於懇詞，必難移於朕意。

除呂公著特授守司空同平章軍國事加食邑實封餘如故制（元祐三年四月四日）

門下仁莫大於求舊，智莫良於用衆；既得天下之大老，彼將安歸？以至國人皆曰「賢」，夫然後用。今朕一舉，仁智在焉，宜告治朝，以孚大號。金紫光祿大夫，守尚書右僕射，兼中書侍郎，上柱國，東平郡開國公，食邑七千

一百戶，食實封二千三百戶。呂公著于謨經遠，精識造微，非堯舜不談，皆聞其語，以社稷爲悅。今見其心，三年有成，百揆時敘，維乃烈考，相于昭陵，蓋清淨以寧民，亦勞謙而得士。凡我儀刑之者，多其賓客之餘。在武丁時，雖莫望於前烈，作召公考，固無易於象賢，而乃屢貢封章，力求退避，朕重失此三益之友，而閔勞以萬幾之煩，是用選平工之司，釋文昌之任，毋廢議論，時遊廟堂於戲。大事雖咨於房喬，非如晦莫能果斷，重德無逾於郭令，而裴度亦寄安危，罔俾斯人，專美唐世，可特授司空同平章軍國事，加食邑七百戶，食實封三百戶，餘如故。仍一月三赴經筵，二日一入朝，因至都堂議軍國事。

除呂大防特授太中大夫守尚書左僕射兼門下侍郎加上柱國食邑實封餘如故制（元祐三年四月四日）

門下：朕聞天子有道，其德不可得而名，輔相有德，其才不可得而見。故漢之文景，紀無可書之事；唐之房杜，傳無可載之勳。當時安榮，後世稱頌，予欲清心而省事，不求智名與勇功，天維顯思，將啓承平之運，民亦勞止，願聞休息之期。眷子元臣，咸有一德，咨爾百辟，明聽朕言。中大夫守中書侍郎、柱國、汲郡開國公、食邑二千二百戶、食實封三百戶、賜紫金魚袋呂大防，造道淳深，受才宏毅，果藝以達，有孔門三子之風，直大而方，得坤爻六二之動，久踐右闈，蔚爲名臣，宜升左輔之崇，兼綜東臺之務，加賦進秩，寵數益隆，得位興時，憂責彌重。於戲！若古有訓，無競維人。崔公建中之風，以除吏八百而致裴增元之和之政，以薦士三十而能惟公乃心，何遠之有。可特授太中大夫，守尚書左僕射，兼門下侍郎，加上柱國，食邑七百戶，食實封三百戶。

除范純仁特授太中大夫守尚書右僕射兼中書侍郎進封高平郡開國侯加食邑實封餘如故制（元祐三年四月四日）

門下：朕惟朝廷之盛衰，常以輔相爲輕重，若根本疆固，則精神折衝，故薦呂臣奉已而不在民，則晉文無復

憂色；及長孺直諫而守死節，則淮南爲之寢謀；臣思得其人，付之以政，使天下聞風而心服，則人主無爲而日尊；咨爾在廷，咸聽朕命。中大夫同知樞密院事上柱國高平縣開國伯食邑九百戶食實封二百戶賜紫金魚袋范純仁器遠任重才周識明進如孟子之敬王退若蕭生之憂國朕覽觀仁祖之遺迹永懷慶曆之元臣強諫不忘喜臧孫之有後我心是似命召虎以來宣雖兵政之與聞疑遠猷之未究坐論西省進貳文昌增秩益封兼隆異數於戲時難得而易失民難安而易危予欲守在四夷以汝爲偃兵之姚宋予欲藏於百姓以汝爲息民之蕭曹勉思古人以稱朕意可特授太中大夫守尙書右僕射兼中書侍郎進封高平郡開國公加食邑七百戶實封三百戶勳如故。

卷七

賜新除守司空同平章軍國事呂公著辭免恩命不允詔（元祐二年四月六日）

救公著委重元老朕之本心歸安丘園卿之素志今於二者酌處其中使卿獲居勞逸之間而朕不失仰成之託於義兩得夫復何辭？

賜新除太中大夫守尙書左僕射兼門下侍郎呂大防辭免恩命不允詔（元祐二年四月六日）

救大防揆黃門之任虛之久矣以卿德望兼重才術有餘故授之不疑；渙號已行僉言惟允務稱朕命何以詞爲？

賜新除太中大夫守尙書右僕射兼中書侍郎范純仁辭免恩命不允詔（元祐二年四月六日）

祐三年四月六日

敕純仁國之安危寄於宰輔朕豈苟然而輕授也哉試之以事而不移斷之於心而不貳成命已出豈容復同往修厥官以稱朕意

賜知乾寧軍內殿承制張赴獎諭敕書（元祐三年四月十八日）

敕張赴橫流之災所在蒙害惟吏得其人則公私賴之使者列上有司不以時聞歲月既遠予猶汝嘉故茲獎諭想宜知悉

宜詔許內輸入院口宜（元祐三年四月十九日）

有敕卿拔自循良老於文學禁林之命儒者所榮往祇厥司以究所蘊

賜觀文殿大學士光祿大夫知永興軍韓縝三上表乞致仕不許斷來章詔（元祐三年四月七日）

壯猷，賜觀文殿大學士光祿大夫知永興軍韓縝三上表陳乞致仕不允斷來章詔  
有敕韓縝夫任天下之責者無自營之私蒙國士之知者有非常之報矧卿德望兼重體力猶強方資禦侮之壯猷焉用引年之常禮宜安厥位毋復言歸

（元祐三年四月七日）

歸之意。今中外無事民物小康願恐安車之榮未逾坐嘯之樂朕命不易卿其少安

賜新除太中大夫守尚書右僕射兼中書侍郎范純仁再上劄子辭免恩命不

允詔（元祐三年四月七日）

救純仁卿奉事先帝，義深愛君，與政西樞，論不阿世，昔聞汲黯之不奪，今見徐公之有常，參以衆言，蔽自朕志，右宰之任，非卿而誰？屢執謙詞，殊非所望！

賜新除依前中大夫守中書侍郎劉摯辭免恩命不允詔（元祐二年四月七日）

（日）

救劉摯朝廷設三省建丞弼，雖所治不同，至於因時立政，昭德塞違，其實一也。卿既任其事矣，今以次遷，無足詞者！

賜新除依前中大夫守尚書左丞王存辭免恩命不允詔（元祐二年四月七日）

（日）

救王存卿學足以經邦，才足以應物，更練愈久，開益居多，以積日而稍遷，顧僉言之咸允，國之常典，何以詞爲？

賜新除中大夫守尚書右丞胡宗愈辭免恩命不允詔（元祐二年四月七日）

救宗愈卿昔在諫垣，首開正論，出入熾久，操守不同，雅望在人，既非一日之積，歷試而用，亦自羣公之言，往祇厥官，毋替朕命！

賜新除依前中散大夫充樞密直學士簽書樞密院事趙瞻辭免恩命不允詔

（元祐二年四月七日）

救趙瞻朕惟本兵之地，司命吾民，矧羌戎叛服之無常，實邊鄙安危之未決，豈以此柄，輕授其人，以卿望重，搢紳學兼文武，歷試而用，衆言允諧，往踐厥官，勿違朕命！

賜新除門下侍郎孫固辭恩命不允詔（元祐二年四月八日）



敦孫固：朕惟三朝老臣，義同休戚；先帝舊學，存者幾人？意其風采之聳聞，可使朝廷之增重；矧卿德望素著，寄任已隆；昔冠西樞，今貳東省，衆以爲允，義無足辭！

荀子

臣今月八日，准內批安燾辭免轉右光祿大夫劄子，降詔不許。臣竊謂人主之馭羣臣，專以禮義廉恥；若使受無名之寵，則爲待臣子之輕。今朝廷豈以執政六人，五人進用，故加遷秩以慰其心？燾位冠西樞，委寄至重，豈肯見人擢用，即以介懷？旣無授受之名，僅以姑息之政，縱有先朝故事，亦是一時誤恩。今燾力詞正爲知義，臣欲奉命草詔，不知所以爲詞，伏望聖慈，從其所請。若除受別有緣故，卽乞明降指揮，苟於義稍安，敢不撰進。取進止。御寶批可。且用一意，度作不許辭免詔書進入。

賜新除右光祿大夫依前知樞密院事安燾辭恩命不允詔（元祐二年四月八日）

敕安燾：卿謀國之重，歷年于茲，紀綱修明，中外寧輯。夫圖任共政，所憂者大；則久勞遷秩，亦理之常。雖固執於撝謙，恐難回於成命，往服休寵，以彰眷懷。

賜新除中大夫守尚書右丞胡宗愈辭免恩命不允詔（元祐二年四月十日）  
敕宗愈：卿更涉夷險，踐敷中外，出奉使指，而民宜之；入治天官，而吏畏之。非獨能言者也。書不云乎：「敷奏以言，明試以功。」朕得之矣，卿其勿辭！

賜新除依前中散大夫充樞密直學士簽書樞密院事趙瞻辭免恩命不允詔（元祐二年四月十日）

敕趙瞻：朕之進人，可謂難矣。自非耆老久次，悃幅無華，則樞機之任，不以輕授；卿之自視，何愧於斯？祇服厥

官，思所以稱而已！

賜正議大夫知樞密院事安燾辭免遷官恩命允詔（元祐三年四月十五日）  
敕安燾卿國之雋輔，位冠樞庭，以時褒陞，豈待功闕而能力詞寵命，欲以身率羣臣，使廉恥相先，名器益重，勉從來請，以篤此風！

賜新除中大夫守尙書右丞胡宗愈辭免恩命不允詔（元祐三年四月十五日）

敕宗愈：朕之用卿，蓋聽其言，考其行事，參之公議，而斷自朕心，可謂審矣！而卿固辭不已，朕甚惑之！夫小人以位爲寵，求之而不可得，君子以寵爲憂，推之而莫能去，自古以然，卿何疑哉？

內中御侍以下賀太皇太后年節詞語（元祐二年十二月一日）

伏以太蔟旋宮，旣贊揚而出滯，句芒司歷，方布德以緩刑，恭惟太皇太后陛下，化始六宮，風行九有，捐財振廩，救民溝壑之中，求賢審官，拔士莠莠之下，方履端之資始，膺景福於無疆，妾等幸侍禁嚴，粗供婦職，願獻岡陵之壽，少輸草木之誠！

內中御侍以下賀皇帝年節詞語（元祐二年二月一日）

伏以齊七政於璇衡，天人並應，受三朝之圖籍，海宇來同，恭惟皇帝陛下，至仁無私，神武不殺，祖述堯舜，歷象以授民時，儀刑文王，正家而齊天下，方肇新於歲律，宜勸用於神休，妾等幸侍禁嚴，仰陶化育，願上萬年之壽，永膺百順之祥！

內中御侍已下賀皇太后年節詞語（元祐二年二月一日）

伏以三元資始，礎積以錢餘寒，萬寶更新，燔烈以興嗣歲，恭惟皇太后，道光瀉，德配周南，輔導兩朝，孝慈

格於上下；儀彤九御，恭儉聞於邇遐；順履三陽，誕膺百祿。妾等幸班禁掖，久被餘光；莫報生成之恩，但祝靈長之算！

班荆館賜大遠賀興龍節人使回程御筵口宣（元祐二年十二月六日）  
有敕：卿等已事言旋，改轅茲始，冒寒遠涉，軫念良深。少憩近郊，復陳燕豆。

班荆館賜大遠賀正旦人使到闕酒果口宣（元祐二年十二月十日）  
有敕：卿等遠修隣好，來會歲元。久涉冰塗，少休郊館。宜頒芳旨，以勞駉駉。

賜新除守尙書右僕射兼中書侍郎范純仁上第一表辭免恩命不允批答（元祐二年四月十二日）

覽表具之，夫有烏獲之力，然後可以付千鈞；有和扁之功，然後可以寄死生。故宰相之任，非所以寵人臣也。無其德而當之，爲不智；有其材而辭之，爲不仁。若卿之才德，亦可謂稱矣！往思其憂，以稱天下之望！

賜范純仁上第一表辭免恩命不許批答（元祐二年四月十二日）

覽表具之，吾聞之乃烈考曰：「君子先天下之憂而憂，後天下之樂而樂。」雖聖人復起，不易斯言。卿將書之紳，銘之盤盂，以爲一言而可以終身行之者歟？則今茲爰立之命，乃所以委重投艱而已，又何辭乎？

賜新除尙書左僕射呂大防尙書右僕射范純仁辭免恩命不允批答口宣（元祐二年四月十一日）

有敕：卿望重搢紳，才兼文武，弼亮之選，中外同然。毋或固辭，以稱朕意！

賜新除司空同平章軍國事呂公著上第二表辭免恩命不許斷來章批答（元祐三年四月十二日）

省表具之；夫國以得人爲彊，如猛獸之衛藜藿，以積賢爲寶，如珠玉之茂山川，湛然無爲，物自蒙利，故崔公爲議，則淄青慙服，知朝廷之有人，蜀使抗詞，則孫權同顧，歎張昭之不在，得失之效，豈可同日而語哉？朕之用卿，意實在此，國計之重，可無復詞！

賜新除司空同平章軍國事呂公著上第二表辭免恩命不允斷來章批答（

元祐二年四月十二日）

省表具之，周之詩曰：「無曰予小子，召公是似。」唐之雅曰：「惟西平有子，惟我有臣。」夫父子君臣之間，光明盛大如此，載之簡策，被之金石，豈獨閭門之寵，足爲邦國之華，再省來章，具陳先烈，雖朕寡昧，不敢庶幾於仁祖，而卿忠孝，當念服勤於世官，祇率厥常，毋違朕命！

賜呂公著辭恩命上第一表不允斷來章批答口宣（元祐二年四月十二日）  
有敕：卿以全德，式符具瞻，宜與師臣共爲民表，欽承明命，佇聽嘉謨！

賜新除守尚書左僕射兼門下侍郎呂大防上第二表辭免恩命不許斷來章  
批答（元祐二年四月十二日）

省表具之，卿有美狄盜賊之虞，倉廩禮樂之歎，陰陽風雨之憂，此三者，誠當今之大計，朕之所以中夜不寐，輟食太息者，正爲此也。孟子曰：「責難於君，謂之恭。」夫旣以責其君，而不以身任之者，非仁人也。願卿慨然當古人之重，略世俗之謙，務踐斯言，憂此二者！

賜呂大防上第二表辭免恩命不允斷來章批答（元祐二年四月十二日）

省表具之，夫任賢使能，天下之公義，而辭大就小，君子之自守也。惟名器爵祿，朕所不敢授以私，則勞謙退避，卿豈得必行其意，所謂唐虞三代信任之至，以致稷契伊呂德業之隆，若卿之言，朕敢不勉，請事斯語，求觀厥

成！

賜新除守尚書右僕射兼中書侍郎范純仁上第二表辭免恩命不許斷來章  
批答（元祐二年四月十一日）

省表具之，卿以明哲自託，不能非獨以見君子勞謙之光，亦因以知前世用人之弊，功烈無取，誠如卿言。夫次公減於治郡，子元不如為將，非獨文獻不足，蓋其才德有偏。如卿昔在朝廷，首談孟軻之仁義，旋為帥守，專行羊祜之威信，慨有大志，似其先人，苟推此心，施于有政，則太平可望，而小節可略矣！

賜范純仁上第二表辭免恩命不允斷來章批答（元祐二年四月十三日）

省表具之，自昔先帝之世，屢歎才難，及朕嗣位以來，專用德選，雖爵祿名器出於獨斷，而長育成就，實在羣公！長短不遺，輔相之責，苟無為國養人之意，必有臨事乏使之憂，朕用慨然，當食不御，思得英雋之老，共收文武之用，惟卿篤於憂國，明於知人，灼見朕心，宜在此位，往往任天下之重，毋事匹夫之廉！

賜范純仁呂大防辭恩命上第一表不允斷來章批答口宣（元祐三年四月

十三日）

有敕：卿以宏材，久聞大政，擢升宰輔，實慰具瞻，宜速拜嘉，毋煩謙避！

賜新除依前正議大夫守門下侍郎孫固辭免恩命不許斷來章批答（元祐三年四月十三日）

省表具之，卿奉事先帝，有勤學之舊，與聞機政，有已試之功，固非躡等之選，獨恨用卿之晚，勉徇大義，毋事小廉！

賜孫固辭免恩命不允斷來章批答（元祐三年四月十三日）

省表具之；卿向自西樞，出殿藩服，頃由近輔，入侍燕間，昔有未識之思，今乃日聞其語，既見君子，無踰老臣，當益勵於初心，尚何詞於新命？

賜新除門下侍郎孫固辭免恩命不允斷來章批答口宣（元祐三年四月十四日）

有敕：卿金華雋老，西樞舊臣，與政東臺，實慰輿議，祇膺成命，毋復固詞！

賜新除依前中大夫守中書侍郎劉摯辭免恩命不許斷來章批答（元祐三年四月十二日）

省表具之；卿蹈道深遠，守節淳固，雖不留於儻來之物，而有志於行可之仕，樂告以善，勇於取爲，進不求當世之名，退不叛平生之學，未嘗爲枉尺直尋之事，夫豈有見得忘義之嫌哉！毋復過詞，往踐乃事！

賜劉摯辭免恩命不允斷來章批答（元祐三年四月十一日）

省表具之；朕纘服之初，卿言責是任，歷陳治道之要，以立太平之基，朕欲行其言，遂授以政，歲月未幾，紀綱略陳，欲究觀心術之微，宜擢居政本之地，苟無愧於允蹈，豈不賢於力辭，往服官箴，勿違朕命！

賜劉摯辭免恩命不允斷來章批答口宣（元祐三年四月十四日）

有敕：稽參衆言，蔽自朕志，西省之貳，無以逾卿，亟踐厥官，毋煩固避。

賜新除依前中大夫守尚書左丞王存辭免恩命不許斷來章批答（元祐三年四月十二日）

省表具之；夫志大有遠略，器博無近用，以卿忠義開濟，何施不宜，今以次遷，何足辭也，益堅無倦之意，以觀可久之業！

賜王存辭免恩命不允斷來章批答（元祐二年四月十二日）

省表具之夫陸廉之增所以隆堂奧位次有敘所以尊朝廷朕既樂得於英才復以時而選用庶幾華國非以寵卿祇率厥常毋廢朕命

賜王存辭免恩命不允斷來章批答口宣（元祐二年四月十四日）  
有敕卿純忠許國雅望在入官以次升義無足避其承休寵以副眷懷

賜新除中大夫守尚書右丞胡宗愈辭免恩命不許斷來章批答（元祐二年

四月十四日）

省表具之卿自天官擢領風憲下有庇民之意上有愛君之忠度其不以利回是故可以大受丞轄之任非卿孰宜毋復固辭以就遠業

賜胡宗愈辭免恩命不允斷來章批答（元祐三年四月十四日）

省表具之人才之難古今所病忠厚者多乏於用強濟者或涼於德有德適用如卿幾入方觀卿謀國之良以成朕知入之美深體此意往祇厥官

賜胡宗愈辭免恩命不允斷來章批答口宣（元祐三年四月十四日）  
有敕卿雅望在入純忠許國既以彙進胡為力詞宜體至懷即膺成命

賜新除依前中散大夫充樞密直學士簽書樞密院事趙瞻辭免恩命不允斷  
來章批答（元祐二年四月十四日）

省表具之君子之仕也喜於知而樂於用如卿之言結髮從仕而白首遇合則君子之用舍進退蓋亦有時矣勉行其道無失斯時苟能遇事而必為則亦立功之未晚古人之事將見於卿

賜趙瞻辭免恩命不允斷來章批答（元祐三年四月十三日）

省表具之，卿挺然孤忠，白首一節，逝將力求於退避，夫豈有意於進取哉？特以雅望既隆，公議所在，方將度才而授任，固難越卿以用人，往踐厥官，毋違朕志！

賜趙瞻辭免恩命不允斷來章批答口宣（元祐三年四月十四日）

有敕：朝廷用人，議論先定，不次之舉，非卿孰宜。亟服休恩，毋煩固避！

閤門賜新除守司空同平章軍國事呂公著告口宣（元祐三年四月七日）

有敕：卿正位三公，具瞻多士，方資坐論，以副仰成。體朕眷懷，服此明命！

閤門賜新除宰相呂大防范純仁告口宣（元祐三年四月七日）

有敕：朕稽參衆庶，登用俊良，並建宰司，同陞揆路，祇承明命，仰副眷懷！

賜新除司空同平章軍國事呂公著辭免冊禮許諾（元祐三年四月十五日）

嘉歎！  
敕：公著多儀以隆輔弼，國之彝典，自損以信君父，卿之美志，再閱誠言之請，益彰謙德之光，勉徇所陳，不忘

賜新除司空同平章軍國事呂公著辭免冊禮允詔（元祐三年四月十五日）

以約；勉從所乞，以成其美！  
敕：公著冊祝於廟，惟周之典，臨朝親拜，亦漢之舊事，大則禮重，禮重則樂備，古之道也。今卿遜避不居，自虞

賜新除試御史中丞孫覺辭免恩命不允詔（元祐二年四月八日）

朕開納不諱，固無觀望難言之病，豈有喪失名節之憂哉？載聞來章，甚非所望！  
敕：孫覺，卿三居諫省，皆以直聞，蓋嘗遇事以建言，志在行義，以達道，擢爲執法，實允僉言，以卿直諫多聞，而



賜新除翰林學士朝議大夫知制誥許將赴闕詔（元祐二年四月十二日）  
敕許將卿敏而好學，達於從政，出殿方國，則脩儒術，以飾吏事，入備顧問，則酌民言，以廣上聽，待命化門，號稱內相，雖於卿爲舊物，實當今之高選，亟踐厥職，佇聞嘉猷！

賜許將辭免恩命不允詔（元祐二年四月十八日）

敕許將進以經術，嘗詔我以安危，來自西南，固知民之利病，渴聞讜論，少副虛懷，而乃退托無能，力辭舊物，既非所望，其可曲從！

賜河北西路諸軍秋季銀鞋兼傳宣撫問臣寮將校口宣（元祐二年四月十八日）

有敕汝等愛寄之深，疆事靡盬，眷言勞勩，各想平寧，體我至懷，受茲時賜。

白溝驛賜大遼賀坤成節人使御筵兼傳宣撫問口宣（元祐二年四月二十一日）

有敕卿等遠涉暑途，來陳慶幣，眷言徒御，久犯風埃，往錫燕娛，少休行役。

## 卷八

元祐三年端午帖子詞

皇帝閣六首

其一（五言）

盛德初融後，潛陰未始時，侍臣占易象，明兩作重离。

蘇東坡內制集 卷七

蘇東坡內制集 卷七

其一

採秀擷羣芳，爭儲百藥良。太醫初薦艾，庶草驗蕃昌。

其二

微涼生殿閣，習習滿皇都。試問吾民愠，南風爲解無？

其四（七言）

西檻新來玉宇風，侍臣茗盃得雍容。庭槐似識天顏喜，舞破清陰作雨龍。

其五

講徐交翟轉回廊，始覺深宮夏日長。揚子江心空百鍊，只將無逸鑑興亡。

其六

一扇清風灑面寒，應緣飛白在冰紈。坐知四海蒙膏澤，沐浴君王德似蘭。

太皇太后閣六首

其一（五言）

漸臺通翠浪，暑殿轉清風。簾捲東朝散，金烏未遽中。

其二

日永蠶收簇，風高麥上場。朝來籍田令，菽黍獻時芳。

其三

舞羽諸羌伏，銷兵萬彙蘇。只應黃紙詔，便是赤靈符。

其四（七言）

令節陳詩歲歲新，從臣何以壽吾君？願儲醫國三年艾，不作沉湘九辨文。

其五

忠臣諒節今千歲，孝女孤風滿四方；不復巫陽占野夢，空餘仲御扣河章。

其六

長養恩深動植均，只憂貪吏尚殘民；外廷已拜臯羹賜，應助吾君去不仁。

皇太后閣六首

其一（五言）

露篔琴書冷，瑤檠饗餌新；深官猶畏日，應念暑耘人。

其二

萬壽萑蒲酒，千金琥珀盃；年年行樂處，新月掛池臺。

其三

聖簡初窺棟，瓊黍復纏菰；水殿開冰鑑，瓊漿凍玉壺。

其四（七言）

秘殿扶疎夏木深，雨餘初有一蟬吟；應將羸女乘鸞扇，更助南風長棘心。

其五

上林珍木暗池臺，蜀產吳包萬里來；不獨槃中見盧橘，時於樓裏得楊梅。

其六

閱楚遺風萬古情，湘沅舊俗到金明；翠輿黃鑿何時幸，畫鷁飛鳧盡日橫。

蘇東坡內制集卷八

八二

皇太妃閣五首

其一（五言）

午景簾櫳靜，薰風草木酣；誰知恭儉德，綵縷出親蠶。

其二

雨細方梅夏，風高已麥秋；應憐百花盡，綠葉暗紅榴。

其三（七言）

辟兵已佩靈符小，續命仍縈綵縷長；不爲祈禳得天助，要隨風俗樂時康。

其四

玉盆沉李灑清泉，金鴨噓空裊細煙；自有梧桐郭長日，仍欣麥黍報豐年。

其五

夏辰樂事古難同，繡繭朱絲奉兩宮；仁孝自應獲百珍，艾人挑印本無功。

夫人閣四首

其一（五言）

蕭肅槐庭午，沉沉玉漏稀；皇恩樂佳節，鬪草得珠璣。

其二

節物荆吳舊，嬉游禁掖閑；仙風隨畫筵，拜賜落人間。

其三（七言）

五綵繁縷稻香，千門結艾鬢髻張；旋開寶典尋風物，要及靈辰共袞襦。

欲曉銅餅下井欄，鏗鏗金殿發清寒；似聞人世南風熱，日上牆東問幾年？

賜大遼賀坤成節，人使生饋口宣（元祐二年五月十日）  
有敕卿等肅將鄰好，來慶誕辰，徒馭久勞，館宇初定，宜頒委積，以示寵章。

賜新除依前朝散大夫守尚書吏部侍郎充龍圖閣待制傅堯俞辭免恩命不允詔（元祐二年五月二十二日）

救堯俞，夙望所在，舊疾既平，及茲言還，慰我虛佇，徒得君重，雖暫屈於淮陽，雅意本朝，寧久安於馮翊，復求自便，殊異所期，往修厥官，務稱朕命。

故皇叔祖昭信軍節度使檢校司空開府儀同三司漢東郡王宗瑗祭文（堂祭）

惟王之生，令德孝恭，云何不淑，罹此閔凶，無復會朝，載側予衷，往奠其寢，維以飾終。

故皇叔祖昭信軍節度使檢校司空開府儀同三司漢東郡王宗瑗祭文（下事）

嗚呼！死生之變，賢愚莫逃，日月有時，義當卽造，哀榮之極，禮以告終，來舉奠觴，往安窆窆！

賜守尚書右丞胡宗愈乞除閑慢差遣不允詔（元祐三年五月二十七日）

救宗愈，朕開獎言路，通來下情，雖許風聞，猶當核實，豈以無根之語，輕搖輔政之臣，朕方馭衆以寬，退人以禮，加之美職，付以大邦，朕既無負於聽言，卿亦何嫌而避位，祇服乃事，毋自爲疑。

賜正議大夫知樞密院事安燾乞退不允批答（元祐三年五月二十八日）

省表具之；宥密之司，安危所寄，雖荒首款塞，少休烽燧之虞，而夏童跳邊，猶煩箠策之馭，翻然求去，義有未安。夫以朕大烹優賢之資，豈不能助卿養志之具，足以毋廢子職，而能兼爲國謀，豈不休哉？

賜正議大夫知樞密院事安燾乞退不許批答（元祐三年五月二十八日）  
省表具之，乃眷西樞，實參大柄，吾欲兵民兼利，戎夏兩安，非宿業更變之臣，懼有傷財玩寇之患，卿當念先朝委重之久，未可以親庭歸養爲詞，勉安厥官，以副吾意！

賜安燾乞退不允斷來章批答口宣（元祐三年六月一日）  
有敕：卿以舊德，首冠西樞，雅望旣隆，仰成彌重，宜安厥位，以卒輔予！

後苑瑤律亭開啓祈雨道場齋文（元祐二年六月一日）

六月徂夏，方金火之爭，三農望秋，乏雷雨之施，嗟人何罪，逢歲之艱，自非妙覺之等慈，孰拯疲民於重困？有嚴禁苑，祇建淨筵，念我憂勞，錫之膏澤，非獨起焦枯於田野，抑將掃疾疫於里閭，嘉與舍生，永均介福！

後苑瑤律亭開啓謝雨道場齋文（元祐二年六月五日）

伏以祇畏之心，格人天於影響，覺慈之力，返水旱於屈伸，周澤載濡，農田告足，旣解蘊隆之患，庶無流潦之虞，仰冀能仁，曲垂昭鑒！

永裕陵正月旦表本

伏以賓出日於賜谷，堯歷方頌，朝計吏於原陵，漢儀具舉，恭惟諡號皇帝，功恢禹迹，德邁湯仁，雖歲月之屢遷，想威神而如在，載瞻園寢，空極葦思！

永裕陵二月旦表本

伏以時方啓塾，禮及獻羔，感清衍之協風，懷思於濡露，恭惟諡號皇帝，文武輝世，聖靈在天，岱嶽泥金，未

講升中之禮，荆山鑄鼎，遷成脫屣之游，永望寢園，徒增感慕！

永裕陵四月旦表本

伏以日躔昂畢，卦直乾離，物蒙長養之仁，世載文明之化。恭惟諡號皇帝，功成不宰，德範無窮；執炎帝之衡，莫追往躅；秩南郊之政，空守成規；祇望寢園，惟增感慕！

永裕陵十月旦表本

伏以戒寒謹戶，倏及於秦正；前晦行陵，祇循於漢禮。恭惟諡號皇帝，懿文緯世，厚德載時；休老勞農，追述養民之政，厲兵講武，敢忘經國之謀。永望寢園，益增感慕！

永裕陵十一月旦表本

伏以商正紀歷，大呂旋宮；論時令以待來歲之宜，獻民力以共宗廟之祀。恭惟諡號皇帝，至仁無外，全德難名；文物聲明，但覩乘時之迹；昆蟲草木，孰知成歲之功。急景易遷，永懷何極！

賜尚書右僕射兼中書侍郎范純仁生日詔（元祐二年六月九日）

敕純仁，卿河嶽之靈，神明所相，載更誕日。永介壽祺，體我眷懷，受茲寵錫。

賜北京恩冀等州脩河官吏及都運運使運判監丞等銀合茶藥并兵級等夏

藥特支兼傳宣撫問口宣（元祐二年六月十四日）

有敕，卿等夙夜河壩，暴露野次，屬茲暑雨，深軫予懷。往示寵頒，少慰勞苦。

撫問保寧軍節度使知大名府馮京兼賜銀合茶藥口宣（元祐二年六月十

四日）

有敕，河役方與，吏士在野，暑雨之除，綏御爲勞。膺此寵頒，尙加慎護！

賜河西軍節度使西蕃邈川首領阿里骨進奉回詔（元祐三年四月廿二日）  
敕阿里骨惟爾祖先世篤忠孝本與夏賊日尋干戈亦惟恃我朝廷爵秩之隆用能保爾子孫黎民之衆肆朕命爾嗣長乃師而承襲以來強首外擅爾弗能禁恣其所爲遂據洮城以犯王略陰連夏賊約日盜邊朕愍屬羌之無辜出偏師而問罪元惡俘獲餘黨散亡山後底平河南綏服朕惟率首豪而捍疆場乃爾世功叛君父而從仇讎豈其本意庶能改過未忍加兵果因物以貢誠願洗心而效順爾旣知悔朕復何求已指揮熙河路更不出兵及除已招納到部族外住罷招納依舊許般文往來買賣及上京進奉爾宜約束種類共保邊陲期寵祿於有終知大恩之難再勿使來款復爲虛言

賜太中大夫守尙書左僕射兼門下侍郎呂大防生日禮物口宣（元祐三年六月二十二日）

有敕：乃眷良辰，篤生元輔，豈獨摺紳之望，允爲河華之英！今遣爾甥，往致朕命，受茲休寵，永介壽祺！

賜皇弟山南東道節度使開府儀同三司大寧郡王佖生日禮物口宣（元祐三年六月二十一日）

有敕：乃眷賢王，篤生茲日，本枝之慶，華萼相承，宜分廡庫之良，以致喬松之壽。

賜正議大夫守門下侍郎孫固生日詔（元祐三年六月二十三日）  
敕孫固，卿圖任之舊，縉紳所推，難老之祥，神人攸相，載更良日，益永壽祺，申以寵章，式隆眷遇。

賜正議大夫知樞密院事安燾生日詔（元祐三年六月二十三日）  
敕安燾，柔弧告慶，降哲輔於茲辰，綵服拜嘉，冠榮名於當代，祇服朕命，益壽乃親！

賜五臺山十寺僧正省奇已下獎諭敕書（元祐三年六月十八日）



敕：清涼之峰，仙聖所宅，爰修淨供，以慶誕辰；再省恭勤，不忘嘉歎！

玉律園賜大遼賀坤成節人使射弓例物口宣（元祐三年七月九日）  
有敕：卿等旣陳慶幣，復展射侯，豈獨娛賓，亦將觀德，宜有珍良之錫，以旌審固之能。

賜殿前司罷散坤成節道場香酒果口宣（元祐三年七月九日）  
有敕：卿忠存衛上，義切戴君，爰祝壽山，克成梵供，宜加寵錫，以示眷懷。

賜宗室開府儀同三司以下罷散坤成節道場香酒果口宣（元祐三年七月

九日）

有敕：卿以令律懿親，共輸誠悃，名藍法供，虔祝壽祺，旣徹淨筵，宜加寵錫。

就驛賜大遼國賀坤成節人使宴口宣（元祐三年七月十六日）

有敕：卿等遠馳使傳，來會誕辰，言念勤勞，宜加旌寵，特頒燕喜，以示眷懷。

就驛賜大遼賀坤成節人使花酒果口宣（元祐三年七月十六日）

有敕：卿等肅將慶幣，來舉壽觴，臨遣輔臣，往頒燕豆，仍加寵賚，以示眷懷。

賀大遼人使賀坤成節入見訖歸驛御筵口宣（元祐三年七月八日）

有敕：卿等初柅使車，已陳慶幣，退安館舍，往錫燕簋，式示眷懷，且旌勞勩。

賜大遼人使賀坤成節入見訖歸驛酒果口宣（元祐三年七月八日）

有敕：卿等趨庭致命，就館卽安，少休行役之勞，宜示眷懷之異，式昭寵數，往錫甘芳。

班荆館賜大遼賀坤成節人使回程御筵口宣（元祐三年七月八日）

有敕：卿等使事畢陳，還車載啓，改年而北，弭節少留，就錫燕嘉，式昭禮遇。

太皇太后賜門下手詔（元祐二年七月八日）

敕門下皇帝嗣位，于茲四年，華夷來同，天地並應，而皇太妃以恭儉之德，鞠育之恩，雖典冊以時奉行，而情文疑有未稱，皇帝以祖考之奉，尊無二上，而吾惟春秋之義，母以子貴，其推天下之養，以慰人子之心，宜下禮部太常寺討尋，如於典故有褒崇未盡事件，令子細開具聞奏。

賜馬步軍司罷散坤成節道場香酒果口宣（元祐二年七月十二日）

有敕：卿等共罄臣衷，力祈慈壽，爰修法會，亦既告成，宜有寵頒，以旌誠懇。

賜知樞密院事安燾已下罷散坤成節道場香酒果口宣（元祐二年七月十一日）

有敕：卿等忠存廟社，義篤君親，嘉法會之有成，祝聖齡於無極，宜加寵賚，以示眷懷。

賜皇伯祖嗣濮王宗暉已下罷散坤成節道場香酒果口宣（元祐二年七月十二日）

有敕：卿等爲國懿親，助我孝治，祝慈闈之永壽，成法會於茲辰，宜有寵頒，以旌忠悃。

賜皇叔楊王醴泉觀罷散坤成節道場香酒果口宣（元祐二年三月十一日）

有敕：卿等以周邵之親，躬任姒之養，力祈壽嘏，祇扣佛乘，旣徹淨筵，宜膺寵賚。

除苗授特授武泰軍節度使殿前副都指揮使勳封食實封如故制（元祐三年七月十二日）

門下出摠元戎，作先聲於士氣，入爲環尹，寓軍政於國容，將神闔外之威，以迪師中之吉，咨于爾衆，朕得其人，侍衛親軍步軍副都指揮使，威武軍節度觀察留後，持節福州諸軍事，福州刺史，上柱國，濟南郡開國公，食邑

二千八百戶，食實封三百戶。苗授，早以異材，見稱武略，被服忠義，有列大夫之風。砥礪廉隅，得士君子之概，荐揚邊圉，益著勞能。拔自衆人，旣蒙先帝之遇，遂拜大將，無復一軍之驚。祇扈殿嚴，肅將齋鉞。子欲少長有禮，而兵可用，沒其夙夜在公，而令必行於戲。愛克厥威，罔功茲爲深戒。師衆以順，爲武古有成言。惟懋乃衷，毋忘朕訓！

賜太師文彥博已下罷散坤成節道場香酒果口宣（元祐三年七月十二日）

有敕：元老在廷，百官承式，啓法筵於梵宇，祝壽嘏於慈闈，宜有寵頒，以助燕喜。

相州賜大遼賀坤成節人使却回御筵口宣（元祐三年七月十三日）

有敕：卿等遠飭征驂，少休近郡，載惟勤勤，良極軫懷，往錫宴觴，以華歸騎。

瀛洲賜大遼賀坤成節人使回程御筵口宣（元祐二年七月十三日）

有敕：卿等遠聘通歡，言歸復命，改轅北道，弭節邊城，宜錫燕觴，少休行役。

賜護國軍節度使濟陽郡王曹佺罷散坤成節道場香酒果口宣（元祐三年七月十二日）

有敕：卿以耆德，首冠威藩，虔祝壽祺，告成法會，宜加寵賚，以助燕私。

班荆館賜大遼賀坤成節人使回程酒果口宣（元祐三年七月十三日）

有敕：卿等致命言還，改轅伊始，暑雨方作，徒馭寶勞，宜有寵頒，以昭眷遇。

西嶽廟開啓祈雨道場青詞（元祐三年七月十三日）

伏以二華之尊，作鎮於西極，北人所急，望歲於秋成，穀旣日滋，雨不時霑，敢以病告，于我有神，閱茲將槁之苗，賜以崇朝之澤，惟神之德，非我敢忘！

奉宸庫翻修聖宇等庫了畢安慰土地道場齋文

伏以貨幣所藏，有壞必葺；聰直之鑒，既成乃安；爰仗佛慈，以綏神守；庶期昭格，永底純熙！

賜新除殿前副都指揮使武泰軍節度使苗授上第一表辭免恩命不許斷來章批答（元祐二年七月十九日）

省表具之，試材已舊，謀帥尤艱，故以久次用人，欲其深練於事，而卿辭以錮疾，豈所望哉？速即乃官，毋復退

賜新除殿前副都指揮使武泰軍節度使苗授上第二表辭免恩命不允斷來章批答（元祐三年七月十九日）

覽表具之，環衛之嚴，節制之重，誕告多士，以長萬夫，朕輕用其人哉？確然固辭，未喻厥指，往祇朕命，毋曠乃

官！

避！

賜新除殿前副都指揮使武泰軍節度使苗授辭免恩命第三表不允批答口宣（元祐二年七月二十日）

有敕：卿早練武經，晚著邊効，進持帥節，實允僉言，矧以次遷，無煩懇避！

賜于闐國黑汗王進奉示諭敕書（元祐二年五月一日）

敕：卿恪居蕃守，申遣使車，來款塞垣，恭脩壤貢，忠誠達遠，褒歎良深！

賜于闐國黑汗王進奉敕書

敕：卿守土西極，馳誠中華，璧馬充庭，尙識漢儀之舊；織皮在筐，聊觀禹貢之餘；載省忠勤，不忘嘉歎！

賜于闐國黑汗王男被今帝英進奉敕書

敕：汝世敦忠厚，志慕聲明，遠附奏函，亦馳貢篚，載惟恭順，良極歎咨！

賜皇叔新除徐王上第二表辭免恩命不允斷來章批答口宣（元祐二年八月十五日）

有敕朕始升徐方以昨叔父庶幾大彭之壽罔愧元王之賢毋復屢辭亟膺成命

示諭武泰軍官吏軍人僧道百姓等敕書（元祐二年八月十八日）  
敕朕以苗授賦材勇嚴馭衆整暇擢爲宿衛之長寵以節施之榮惟爾邦人當諭朕意

中太一宮真室殿開啓天皇九曜消災集福道場青詞

臣以冲眇嗣承列聖之休濟于艱難實賴文母之德臨蒞四載勤勞百爲畏天之威未嘗終日而豫怠視民如子惟恐一夫之困窮伏願上帝降祥衆真垂佑消穰災疹永底壽康恭陳寶錄之科仰扣神游之館敢祈昭鑒下察孝心

### 卷九

中太一宮真室殿爲太皇太后消災集福罷散天皇九曜道場朱表

福；  
臣言仁者必壽信惟天地之心孝無不通宜從臣子之欲虔遵道範仰扣真廷庶同海宇之誠上集慈闈之福天威咫尺永聰明於我民聖壽萬年定子孫于下地更推博施普及函生

顯聖寺壽聖禪院開啓太皇太后消災集福粉壇道場齋文

伏以躬儉節用本嚴房闈之風遺大投艱猥當廟社之寄常恐德之弗類以召災于厥身敢卽仁祠肆陳淨供恭延梵釋普施人天俾壽而康非獨輔安於寡昧與民同利固將燕及於華夷仰冀能仁曲垂照鑒

後苑瑤律亭開啓祈雨道場齋文

伏以常暘之珍，歷月于茲；近自都畿，遠及關輔；豈獨西成之害，將爲宿麥之憂；仰止覺慈，必垂善救；普集山川之守，來登梵釋之筵，罔吝膏濡，以興焦槁！

闕門賜新除徐王告口宣（元祐二年八月十二日）  
有敕：卿望隆尊，屬德冠宗，藩改殿大邦，寶諧羣議，往服朕命，以爲國華！

皇叔故魏王啓殯祭文

惟靈：曩累朝之餘慶，兼天下之達尊；祖送之儀，哀榮斯極！永惟宅兆之下，未逢歲月之良；參酌時宜，遷神郊館；啓殯之始，寓哀斯文！

皇叔故魏王外殯前一夕夜祭文

惟王之生，孝友仁慈，旣沒元身，舉國懷思；矧子冲眇，義兼父師；天不我遺，日月如馳；出次近郊，寓此仁祠；親奠莫及，寧知我悲！

皇叔故魏王下事祭文

惟靈：出就外邸，二年于茲；一日不見，企予望思；矧此告終，月逝日遠；雖云近郊，寧復旋返；築室祠宮，旣固旣完；雖非永歸，亦可少安；嗚呼哀哉！

賜皇叔改封徐王顯上表辭免冊禮允詔（元祐二年八月二十日）

敕：卿大雅不羣，自得詩書之富，爲善最樂，不知軒冕之榮；援殿文拜，宜膺盛禮；而抑捐之志，逡巡不居；雖莫稱朕，所以極褒崇之心；而將使卿，庶幾獲謙冲之福；勉從其意，嘉歎不忘！

賜皇叔改封徐王顯上表辭免冊禮許詔

敕：穎錫山土田，以昭令德；備物典冊，蓋有常儀；而卿深懼滿盈，過形仰畏；一謙四益，常克永年；三命滋恭，固

將有後；曲成美志，以勸事君。宜依所乞！

賜太師平章軍國重事文彥博上第一表乞致仕不許批答（元祐三年九月

二日）

覽表具之昔師尚父，九十秉旄杖鉞，猶未告老；此諸葛元遜所以屈張昭也。而衛武公百年，猶箴儆于國曰：「無以我老耄而捨我！」此左史倚相所以誨申公也。今卿壽考康寧，而退托衰病，自引求去，獨不念天下之士，有如彼二子者，議其後乎？姑安厥官，以答公論！

賜太師文彥博上第一表乞致仕不允批答（元祐三年九月二日）

覽表具之，朕聞之，咸王之政，周公在前，召公在後，畢公在左，史佚在右，四子挾而維之，目見正色，耳聞正言，一日卽位，天下曠然，未聞四子者以老而求退，亦未聞咸王以老而聽其去也。朕雖不德，猶庶幾咸王之治，卿雖老矣，獨不能以四子之心爲心乎？勉卒輔朕，無愧前人！

賜太師文彥博乞致仕不允斷來章批答口宣（元祐三年九月五日）

有救者老在位，華夷聳觀，若聽公歸，恐失民望，朕命不生，公其少留！

賜龍圖閣學士河東路經略使兼知太原府曾布乞除一閑慢州郡不允詔（

元祐三年七月二十一日）

敕曾布將不久任，難以責成，謀不素定，難以應猝，卿屢試而用，所臨有聲，而况二年于茲，諸將所服，事旣卽敘，人誰易卿？夫擣虛攻瑕，兵家常勢，知難避整，夷狄亦然，卿若有以待之，彼將望而去矣。勉卒乃事，毋忘朕言！

故尚宮吳氏墳所祭文

惟爾之生，服勤乃事，逢日之吉，歸全于郊，式榮其終，往致斯奠。

西路闕雨於濟瀆河瀆淮瀆廟祈雨祝文

伏以水旱之事山川所司農服穡以有秋天密雲而不雨愧我不德瀆于有神願為三日之霖大慰一方之望國有常報我其敢忘

撫問秦鳳路臣寮口宣（元祐三年七月二十四日）

有敕：卿等久以選掄出分憂寄疆場之重綏御為勞宜示眷懷往宣指諭

除皇伯祖宗晟特起復制（元祐二年十一月一日）

門下曾閱之哀喪不貳事漢唐之舊禮有奪精矧子藩屏之親實兼臣子之重雖門內以恩掩義而公侯以國為家伯臣司宗職不可曠要經服事古有成言非予爾私其聽朕命皇伯祖彰化軍節度涇州管內觀察處置等使檢校司空開府儀同三司持節涇州諸軍事涇州刺史判大宗正事上柱國高密郡王食邑七千八百戶食實封二千四百戶宗晟天資純茂德履方嚴懿餘慶於祖宗蹈格言於師保典司屬籍克有令名郵客卒業於浮丘辟彊受知於先帝允釐厥位無愧昔人屬此閔凶纍然毀瘠嗟日月之逾邁重職業之久虛宜復寵名式從權制於戲出居官次非王事不談退適倚廡讀喪祭之禮則忠孝兩得人無間言功名益隆親有顯譽勉服朕訓光昭前聞

賜皇伯祖宗晟辭免起復恩命不允批答口宣（元祐三年十一月十日）

有敕：官不可曠禮有從權苟愛君如愛親則王事為家事勉運舊服少屈私誠

賜皇伯祖宗晟辭免起復恩命不允斷來章批答口宣（元祐三年十一月十日）

八日

有敕：卿哀慕未衰懇辭彌力既寒暑之一變宜思孝之兩全勉從朕言起服乃事



相州賜大遼賀興龍節使副御筵口宣（元祐三年十一月六日）

有敕：卿等將命鄰邦，服勤郵傳，久薄風霧，少休車徒，宜體眷懷，式同燕衍。

賜知涇州劉昌祚進奉興龍節銀詔（元祐三年十一月六日）

敕昌祚：卿禦侮邊庭，馳神魏闕，會嘉辰之獻壽，納貢篚以效珍，載省忠勤，不忘褒歎。

相州賜大遼賀興龍節人使回程御筵口宣（元祐三年十二月九日）

有敕：卿等夙駕歸軒，少休勞郡，眷言勞勩，良極顧懷，往錫燕嘉，以旌恩眷。

撫問知大名府馮京口宣（元祐二年閏十一月八日）

有敕：卿等夙分重寄，言念久勞，歲聿云周，王事靡盬，益加輔養，以副眷懷。

冬季傳宣撫問河北東路沿邊臣寮口宣（元祐三年閏十一月八日）

有敕：疆場之守，職思其憂，霜露既凝，歲聿云暮，宜加厚愛，以副眷懷。

賜知涇州劉昌祚進奉謝恩并賜月俸公使及賀端午節馬詔（元祐三年十

二月二十四日）

敕昌祚：卿執德宏毅，秉心恪恭，拜新渥於公朝，謹舊儀於令節，抗章來上，因物見誠，再省忠勤，良深嘉歎！

內中御侍已下賀皇帝冬至詞語（元祐三年十月二十日）

伏以日合天統，時推建子之正律，中黃鍾，氣驗微陽之應德，施自上，惠均於民，伏惟皇帝陛下，道配皇王，化行夷夏，觀其來復，見乎天地之心，靜以無為，待此陰陽之定，雲物告瑞，宮聲協和，豈惟至治之祥，自得上天之祐，一人有慶，萬壽無疆，妾等蒙被天光，叨塵婦職，敢獻如山之祝，庶同率土之歡。

內中御侍已下賀太皇太后冬至詞語

伏以書奏清臺，驗歷象之選密；日移黃道，迎化國之舒長；寰宇和平，宮闈歡豫。恭惟太皇太后陛下，教隆陰禮，位正坤儀。嗣大任之徽音，道光千古；衣明德之大練，儉化六宮。體柔靜以臨朝，配清明而燭物。慶雲可望，共占至治之祥；彤史何知，莫贊無爲之德。妾等猥參女職，仰奉慈顏。因來復之一陽，祝無疆之萬壽。

內中御侍已下賀皇太后冬至詞語

伏以候氣葭灰，喜律筒之已應；課功綵線，知官日之初長；品物向榮，掖廷胥悅。恭惟皇太后殿下，母臨四海，婦應東朝，求賢審官，但有愛勤之志；躬儉節用，豈忘澣濯之衣。宜福祿之日康，樂宮闈之無事。妾等濫塵女職，獲奉慈顏，願先柏酒以稱觴，更指椿年而獻壽。

賜樞密安燾已下罷散興龍節道場香酒果口宣（元祐三年十二月二日）

有敕：樞機之臣，社稷是衛。夙設入天之供，共祈箕翼之祥。宜膺寵頌，式助燕喜。

賜駙馬都尉李璋已下罷散興龍節道場香酒果口宣（元祐三年十一月二十日）

有敕：震夙紀辰，邇遐同祝。乃眷戒藩之重，預修淨供之嚴。亦既告成，宜膺寵錫。

賜殿前副都指揮使苗授已下罷散興龍節道場香酒果口宣（元祐三年十一月二十日）

有敕：卿等以衛上之忠，屬誕彌之慶。預嚴淨會，以薦壽祺。及此告成，宜加寵賚。

賜權管勾馬軍司公事姚麟已下罷散興龍節道場香酒果口宣（元祐三年十一月二十日）

有敕：卿等卒職周廬，歸誠梵宇。共致延鴻之祝，出於忠愛之深。宜錫珍芳，以助燕衍。

賜皇伯祖宗晟辭免起復恩命不允詔（元祐三年十二月五日）  
救宗晟夫要經服事出於孔門墨衰從政見於魯史永惟徇國忘家之義非有食稻衣錦之嫌若使卿居之而安則吾豈敢強所不欲勉從前詔往服厥宜

賜皇伯祖宗晟辭免起復恩命不允詔（元祐三年十二月五日）  
救宗晟卿德爵與齒皆天下達尊服屬之隆爲宗室祭酒任獨高於三世報宜異於常人故奪情非以私卿而服事所以徇國義無所愧何以辭爲

賜正議大夫知鄧州蔡確乞量移弟頤允詔（元祐三年十二月九日）  
救蔡確以義責備春秋有失教之譏以情內恕詩人有將母之念顧之得罪事在有司難以責近之親而廢朝廷之典及觀來請有槩予心重建兄弟急難之詞以傷人子奉養之意

興龍節尙書省賜宰相以下酒果口宣（元祐三年十二月二日）  
有救誕彌之慶中外所同眷我臣鄰共茲燕喜宜加寵賚以示眷懷

就驛賜大遼賀興龍節使副鈔羅等口宣（元祐三年十一月二十二日）  
有救卿等肅將鄰好遠涉寒途眷言授館之初宜有勞來之禮往加寵錫以示眷懷

七月賜大遼賀興龍節人使內中酒果口宣（元祐三年十一月五日）  
有救卿等提車就館布幣造廷旣欣鄰好之修復歎使華之美就加寵賚式示眷存

玉津園賜大遼賀興龍節人使射弓御筵口宣  
有救卿等使節有華鄰歡載講旣娛賓於靈囿將觀德於射侯宜有寵頒以旌命中

相州賜大遼賀正旦人使御筵口宣（元祐三年十一月六日）

有敕：卿等春朝畢會，鄰聘交馳，屬徂歲之沍寒，念遠勤於行李，往頒燕衍，以重使華。

趙州賜大遼賀正旦使副茶藥口宣（元祐二年十一月十日）

有敕：卿等遠修舊好，屬此沍寒，載歷山川，久蒙霜露，宜有精良之賜，式彰軫念之懷。

趙州賜大遼賀太皇太后正旦使副茶藥口宣（元祐三年十一月十日）

有敕：卿等遠馳四牡，來慶三朝，屬此歲寒，勞於行役，宜膺寵錫，以示眷存。

班荆館賜大遼賀興龍節人使到闕御筵口宣

有敕：卿等遠將鄰好，至上都門，屬霜露之凝凝，念車徒之勤瘁，宜伸燕衍，以示眷懷。

賜大遼賀興龍節人使朝辭訖就驛酒果口宣（元祐三年十一月五日）

有敕：卿等畢事告旋，指期言邁，念征途之勞瘁，迫徂歲之沍寒，體我至懷，膺茲寵錫。

賜大遼賀興龍節人使朝辭訖歸驛御筵口宣（元祐三年十二月五日）

有敕：卿等聘事告成，陛辭言邁，念歸途之云遠，復賓館之少留，體我眷懷，共茲燕喜。

賜皇伯祖宗晟辭免起復恩命不許詔（元祐三年十二月十五日）

敕宗晟：卿哀迫之至，言不及文，覽之惻然，欲從所請，而宗子之衆，才性各殊，位不期驕，祿不期侈，非卿允蹈忠信，力行禮義，以身先之，蓋未易齊也。少屈爾私，以成吾志，不亦可乎？

賜皇伯祖宗晟辭免起復恩命不允詔

敕宗晟：卿以強起就位，為未便安，而朕以徇私忠公，為未盡美。書云：「孝乎惟孝，友于兄弟，施於有政，是亦為政。」夫聖人以孝弟為從政，而卿以從政為非孝，非所聞也。勉從朕命，勿復固辭。

賜文太師已下罷散興龍節道場香酒果口宣（元祐三年十二月二日）

有敕：乃眷師臣，身先百辟；有嚴淨供，祇薦萬齡；宜有分頒，以助燕喜。

與龍節尙書省賜知樞密院事安燾已下酒果口宣（元祐三年十一月三十日）

有敕：卿等任重樞機，忠存廟社，屬誕辰之薦壽，修法會以告成，錫以珍芳，助其燕喜。

賜皇叔徐王罷散與龍節道場香酒果口宣（元祐二年十二月二日）

有敕：卿望隆周，召德邁閭，平屬誕慶之紀辰，仗佛乘而薦祉，助茲宴喜，錫以柔嘉。

賜濟陽郡王曹佾罷散與龍節道場香酒果口宣（元祐三年十二月一日）

有敕：卿寵冠威藩，望隆舊德，將祝無疆之壽，故修最上之乘，既徹淨筵，宜膺寵錫。

賜皇伯祖嗣濮王宗暉已下罷散與龍節道場香酒果口宣（元祐三年十二月一日）

月一日）

有敕：眷我宗英，乃心王室，修彼龍天之供，慶茲虹電之祥，宜有頒分，以成燕喜。

賜皇叔祖同知大宗正事宗景罷散與龍節道場香酒果口宣（元祐三年十二月一日）

二月一日）

有敕：乃眷宗英，祇我藩服，慶誕辰而薦壽，修淨會以告成，宜有分頒，以助燕喜。

十日賜大遼賀與龍節人使內中酒果口宣（元祐四年十二月七日）

有敕：卿造廷稱壽，率禮可觀，豈惟鄰好之修，亦見使華之美，宜膺寵錫，以示至恩。

賜大遼賀與龍節人使生餼口宣（元祐三年十一月一日）

有敕：卿等遠持慶幣，申講鄰歡，徒馭有華，舍館方定，宜往餼牽之錫，以旌郵傳之勤。

班荆館賜大遼賀興龍節人使回程御筵口宣（元祐三年十二月六日）  
有敕：卿等告辭中禁，改乘北轅，屬晚歲之嚴凝，念征途之悠緬，往頒嘉燕，可復少留。

班荆館賜大遼賀興龍節人使却回酒果口宣（元祐三年十二月七日）  
有敕：卿等改轅北路，供帳都門，風埃浩然，徒馭勤止，宜膺寵賜，以示恩華。

瀛州賜大遼賀興龍節人使回程御筵口宣（元祐三年十二月七日）  
有敕：卿等同車北道，拜節邊亭，使事已終，歸驂少憩，往頒燕衍，益厚眷存。

故渭州防禦使宗孺出殯一夕祭文  
惟靈：飭躬寡過，秉德不同，莫克永年，遂卽長夜，哀榮之典，國有故常，死喪之戚，予惟惻愴！

故渭州防禦使宗孺下事祭文  
嗚呼！宗枝之秀，罹此降災，日月有時，禮當卽遠，奄臨窀穸，肆設几筵，往致予哀，來歆此奠！

賜皇弟普寧郡王似生日禮物口宣（元祐二年十一月七日）  
有敕：朕之介弟，生以茲辰，眷棣萼之相輝，祝椿齡之難老，宜同慶喜，往致寵頒。

雄州撫問大遼賀正旦人使口宣（元祐二年）  
有敕：卿等肅將慶幣，來會春朝，遠犯風埃，實勞徒馭，欣聞入境，良尉眷懷。

賜河西軍節度使西蕃邈川首領阿里骨進奉回程詔（元祐三年八月三日）  
敕阿里骨：卿屢款塞垣，願終臣節，爰因貢篚，益著誠心，再省忠勤，良深嘉歎！

皇帝回大遼皇帝賀興龍節書

世睦寶鄰，申以無窮之好，歲馳華使，及茲載風之辰，閱詞幣之兼隆，識情文之備至，願言欣感，難悉究陳！

皇帝達太皇太后回大遼皇帝問候書

遣使爲壽，旣欣鄰好之修，因書見誠，兼致慈闈之問。侍言有次，來意畢陳，感懌之深，敷陳罔旣。

劄子

臣今日準中書省批，送到宗晟辭免起復恩命劄子，奉聖旨送學士院降詔不允。謹按宗晟，飭行有素，持喪中禮，所辭恩命，已四不允，而宗晟確然固守，其詞愈哀。且曰：「念臣執喪報親之日短，致命徇國之日長。」出於至誠，可謂純孝。臣謂宗晟未經祥練之變，且無金革之虞，孝治之朝，宜聽所守，因以風厲宗室，庶皆守禮篤親，顧不美哉？若以宗正之任，恐難其人，亦當差官權攝，須其從吉，復以命之。臣忝備禁從，不敢不言，所有不允詔書，臣未敢撰取進止。

賜皇伯祖宗晟辭免起復恩命不許詔（元祐三年）

敕宗晟卿致孝罔極，守禮不回，以魯衛之親，而行曾閔之事，吾深欲成人之美，遂卿之私，願以宗臣治親，有國先務，教以道藝，時其冠昏，獎察其賢能，而訓誡其驕惰，非吾宗室之老，孰當父兄之任？其深明吾意，往服厥官。

賜皇伯祖宗晟辭免起復恩命不允詔（元祐三年十二月二十二日）

敕宗晟君子之於禮，雖先王未之有，可以義起，而况漢唐之舊，故事具存，如翟方進房喬之流，皆以儒術致身，不免於釋哀而謀國，近歲夏竦晁宗愨亦以近臣奪喪，君子不以爲過。今宗正之事，止於治親，譬猶父兄訓教子弟，豈以衰麻之故而廢閭門之政乎？卿其勿疑，亟服乃事。

### 卷十

賜朝散大夫守尚書吏部侍郎充龍圖閣待制傅堯俞乞外郡不允詔（元祐

二年閏十二月十四日

敕堯俞卿望重本朝，進由公議，方卿大夫有爲之際，亦士君子難得之時，而卿出領郡章，入佐治典，席未暖而輒去，政何時而報成？小疾行瘳，姑安厥位。

太皇太后賜門下手詔（元祐三年閏十一月十四日）

敕門下官冗之患，所從來尚矣。流弊之極，實萃于今，以闕計員，至相倍蓰，上有久閒失職之吏，則下有受害無告之民。故命大臣，考求其本，苟非裁損入流之數，無以澄清取士之源。吾今自以眇身率先天下，永惟臨御之始，嘗敕有司，蔭補私親，舊無定限，自惟薄德，敢配前人，已詔家庭之恩，止從母后之比，今當又損，以示必行。夫以先帝願託之深，天下責望之重，苟有利於社稷，吾無愛於髮膚，矧此恩私，實同毫末，忠義之士，當識此誠，各忘內顧之心，共成節約之制。今後每遇聖節，大禮生辰，合得親屬恩澤，並四分減一。皇太后皇太妃準此。

賜皇伯祖宗晟辭免起復恩命許終喪制誥（元祐二年閏十二月二日）

敕宗晟夫衰麻之哀，達於上下，損益之變，權以重輕，雖事君均於事親，而奪志難於奪帥，俛聽終喪之守，以成致孝之全，言篤誠，實增屢歎！

賜端明殿學士銀青光祿大夫致仕范鎮獎諭詔（元祐三年閏十二月二日）

敕范鎮朕惟春秋之後，禮樂先亡，秦漢以來，韶武僅在，散樂工於河海之上，往而不還，聘先生於齊魯之間，有莫能致魏晉以下，曹鄴無譏，豈徒鄭衛之音已雜，華戎之器間有作者，猶存典刑，然銖黍之一差，或宮商之易位，惟我四朝之老，獨知五降之非，審聲知音，以律生尺，覽詩書之來上，閱篋虞之在廷，君臣同觀，父老太息，方詔學士大夫論其法，工師有司考其聲，上追先帝，移風易俗之心，下慰老臣愛君愛國之志，究觀於作，嘉歎不忘！

賜保軍節度使知大名府馮京進奉賀興龍節馬一疋并冬節馬一疋詔



(元祐三年閏十一月十八日)

敕馮京卿坐鎮全魏，隱若長城，遠馳頌禱之心，來效駟騅之貢，眷言忠蓋，良極歎嘉。

賜泰寧軍節度觀察留後知相州李琦進奉賀冬馬一疋，詔(元祐三年閏十

二月十八日)

敕李琦卿宣化近邦，馳神北闕，屬茲陽月之吉，遠效王閑之良，言念忠勤，不忘嘉歎。

賜殿前都虞候寧州團練使知熙州劉舜卿進奉賀冬馬敕書(元祐三年閏

十二月十八日)

敕劉舜卿職在分憂，忠存衛上，屬此秦正之旦，遠輸冀產之良，再省忠勤，不忘嘉歎。

賜大遼賀正旦人使正月一日就驛御筵口宣(元祐三年閏十二月二十五

日)

有敕：使華遠至，春律肇新，卽卿舍館之安，昭我惠慈之眷，往陳燕豆，以樂佳辰。

賜大遼賀正旦人使內中酒果口宣(元祐三年閏十二月二十五日)

有敕：卿等瑞飾華軒，來修舊好，芳醪珍寶，以薦新春，膺此寵頒，體予異眷。

班荆館賜大遼賀正旦使臣回程御筵口宣(元祐三年閏十二月二十五日)

有敕：卿等使事告成，旋車言邁，方改轅於北道，暫弭節於都門，昭示眷懷，少留宴衍。

賜于闐國進奉人正旦就驛御筵口宣(元祐三年閏十二月九日)

有敕：重譯遠來，觀光戾止，屬人正之改律，樂天敘之發春，宜示寵休，式同燕喜。

賜外任臣寮進奉興龍節馬詔敕書(元祐三年閏十二月十八日)

救劉舜卿汝忠於衛上，遠不忘君；爰因彌月之晨，來效充庭之禮；眷言勤篤，良極歎嘉！

雄州賜大遼國賀正旦人使回程御筵兼傳宣撫問口宣（元祐三年閏十二月二十五日）

有敕卿等已事告歸，柅居少憩；眷言長道，遠犯餘寒；宜錫燕嘉，以旌勞勩。

賜大遼賀正旦人使銀鈔羅唾手孟子錦被等口宣（元祐三年閏十二月十八日）

有敕卿等遠將鄰好，來慶春朝；眷言跋履之勤，宜有珍華之錫；受茲異寵，體我至懷！

皇太妃宮閣慶落成開啓道場青詞

伏以夏辰襲吉，華構一新；仰荷褒崇之私，得伸鞠育之報；落成告備，法會有嚴；請命上穹，馳神真聖；庶精誠之必達，錫壽祉於無窮；無任懇禱之至！

玉津園賜大遼賀正旦人使射弓例物口宣（元祐三年閏十二月三日）

有敕射以娛賓，抑將觀德；發而命中，曾不出正；宜旌審固之能，膺受珍良之賜。

瀛州賜大遼賀正旦人使迴程御筵口宣（元祐三年閏十二月二十九日）

有敕卿等已聘言還，犯寒遠邁；方脂車於道北，復弭節於邊城；宜錫宴嘉，以旌勞勩。

班荆館賜大遼賀正旦人使却回酒果口宣（元祐四年正月一日）

有敕卿等還璋言邁，弭節少留；念鞭轡之方勤，涉冰霜之餘凜；宜陳燕俎，以寵歸軒。

正月六日朝辭訖就驛賜大遼賀正旦人使御筵口宣（元祐四年正月一日）  
有敕卿等使事告成，陞辭言邁；命近臣之往勞，庶遠道之少留；體我眷懷，共茲宴衍。

賜中大夫守尚書左丞王存生日詔（元祐四年正月四日）  
救王存在易之泰，與物皆春於時良臣，生我王國，宜膺寵賚，以介壽祺。

賜龍圖閣直學士正議大夫權知開封府呂公孺上表陳乞致仕不允詔（元祐四年正月五日）

救公孺：朕雞鳴而起，志於求助，駘背之老，未敢即安，矧卿體力不衰，髮齒猶壯，遽有引年之請，殊乖圖舊之心，宜安厥官，以稱朕意。

賜呂公孺上表陳乞致仕不允詔

救呂公孺：卿將相三世，凜乎正始之風，出入四朝，蔚然難老之狀，浩穰之治，談笑而成，方觀報政之能，遽有歸休之請，公議未可，卿其少安。

撫問卿延路臣寮口宣（元祐四年正月八日）

有救卿等分寄邊陲，輯寧吏士，眷言勤勤，良極軫懷，往致朕言，各宜尚慎。

賜光祿大夫守吏部尚書兼侍讀蘇頌上表乞致仕不許詔（元祐四年正月

十三日）

救蘇頌：吾聞有志之士，以身御道而遺名，有道之君，使人樂用而忘老，今卿不安其位，豈吾有愧於古哉？夫難進之士，年僅及而輒退，則已試之才，吾莫得而盡用矣，激揚多士，方資崔毛之德，講誦舊聞，未卒楮馬之業，事非小補，卿其少安。

賜蘇頌上表陳乞致仕不允詔

救蘇頌：卿歷事四朝，允有一德，徒論徐公之奢儉，莫見子文之慍喜，朕既寤寐哲士，體貌元臣，方貴德齒之

達尊，豈求筋力之常禮？矧卿方膺難老之錫，宜勵益壯之心，惜日有爲，古人所重；引年求去，公議未安；勉爲朕留，以慰人望！

賜濟陽郡王曹佺在朝假將百日，特與寬假將理詔（元祐四年正月十二日）  
敕曹佺卿賢戚莫二，德齒並隆，眷言朝請之勤，思見儀刑之老，謝病既久，軫念良深，推子賜告之恩，期於勿藥之喜，宜特與寬假將理。

賜西南蕃莫世忍等進奉勅書（元祐四年正月二十一日）

敕莫世忍汝守土遐陬，歸誠北闕，梯山修貢，款塞觀光，言念忠勤，至於嘉歎。

景靈宮宣光殿開啓神宗皇帝忌辰道場齋文（元祐四年正月二十四日）

伏以至德難名，已立配天之極，孝思永慕，蓋有終身之憂，惟是佛乘，庶資冥福，屬弓劍上賓之日，就衣冠出  
辨之庭，虔設淨筵，俾嚴勝果，庶超真覺，永庇含生。

賜光祿大夫守吏部尚書兼侍讀蘇頌上第二表陳乞致仕不允詔（元祐四年二月二日）

敕蘇頌夫天以多士寧王國，而祖宗以成德遺後人，方使壽考康彊，以究其用，而朕乃以引年，而聽其去可乎？矧卿銓綜之精，談笑而辦，勉思職事，以稱朕心。

賜蘇頌上第二表陳乞致仕不許詔

敕蘇頌天官之任，老成所宜，坐執銓衡，有山公晚年之故事，薄言煩雜，獨蕭條一時之偏詞，卿其撓攬綱條，闕略苛細，委蛇退食，以慰士心。

東太一宮翻修殿宇奏告十神太一真君祝文（元祐四年正月七日）

於穆祠宮，有嚴春祀；吏以時而按視，工揆日以修完；庶就絜新，永綏靈御；仰祈昭鑒，大庇台生！

故尙服劉氏瑱所祭文（六月八日下院）

惟靈：選備禁廷，服勤內職；逮茲淪謝，良用愍傷；饋奠之儀，哀榮兼至。

故尙服劉氏瑱所祭文（六月八日下院）

惟靈：服勤有年，罹命不淑；窀穸之事，日月有時；念爾永歸，敬予一奠。

撫問鄧延路臣寮口宣（六月十一日下院）

有敕：卿等各膺器使，祇服邊陲；眷茲靖安，時乃忠力；特加勞問，以示顧懷。

新除權禮部尙書梁燾辭免恩命不允詔（六月十二日下院）

敕：梁燾卿出處以義，進退以禮；昔請補外，朕不得已而聽其去；今茲選用，衆以為宜；而恨其晚，而卿又固辭，

登朕所望，成命不易，其速造朝！

賜宣徽南院使充太一宮使馮京乞依職任官例祇赴六參不允詔（六月十

四日下院）

敕：馮京朕以卿耆老厚德，重煩以庶事；而卿篤恭盡禮，自同於有司；既朝朔望，尙復勲請；雖抑抑自警，知卿

有衛武之風，而僕僕亟拜，非朕侍子思之意，宜遵前命，以副眷懷。

賜右正議大夫守尙書左僕射呂大防生日詔（六月十五日下院）

敕：大防股肱之良，與國為重；家庭之慶，亦朕所同；適斯千獻夢之辰，均既醉太平之福；膺子寵錫，介爾壽祺！

賜右正議大夫守尙書左僕射呂大防生日禮物口宣（六月二十一日下院）

有敕：惟茲穀旦，生我元臣；爰分服食之良，往助闔門之喜；式為爾壽，宜識朕心！

賜皇叔徐王觀生日禮物口宣（六月二十一日下院）  
有敕：乃眷賢王，實爲社稷之衛，載臨誕日，永集邦家之休。臨遣使車，往致眉壽。

就驛賜大遼賀坤成節人使銀鑼等口宣（六月二十三日下院）  
有敕：卿等遠勤使節，展慶誕辰，畏暑長途，方即安於舍館。精金良幣，宜往致於恩私。

賜翰林學士中大夫兼侍讀趙彥若辭免國史脩撰不允詔（六月二十三日下院）

敕彥若卿學世其家，宜居載筆之地，宜宿其業，已奏殺青之書，自託不能，殊非所望。祇膺戍命，毋復固辭。

賜皇弟大寧郡王似生日禮物口宣（六月二十五日下院）  
有敕：桑蓬示喜，復臨載育之辰，金幣展親，往致友于之愛。膺子寵賚，俾爾壽昌。

賜五臺山十寺僧正省奇等獎諭敕書（六月二十五日下院）  
敕：異景靈光，久聞示化，寶祠淨供，爰膺誕彌，念此恭勤，至於嘉歎。

賜河東節度使太師開府儀同三司太原尹致仕文彥博溫溪心馬詔（七月二日下院）

敕彥博惟我宗臣，名震夷落，狼心鳩舌，知獻厥誠。朕以張奐拒羌之獻，不如旅葵昭德之致，已敕邊吏，答賜所直，其馬今以賜卿，至可領也。

班荆館賜大遼賀坤成節國信使副到闕酒果口宣（七月四日下院）  
有敕：卿等抗旆遠道，解鞅近郊，念館舍之未安，宜驂駢之少憩，式頒芳旨，以示眷懷。

賜馬步軍大尉姚麟已下罷散坤成節道場香酒果口宣（七月四日下院）

有敕：卿等誕辰祇慶，法會告成，嘉與函生，同躋壽域，往頌芳旨，以勞忠勤。

賜大遼賀坤成節使副生餼口宣（七月七日下午院）

有敕：卿等抗旌暑路，洱節驛亭，眷惟行李之勤，往致珍鮮之餽，膺茲寵數，服我眷懷！

雄州白備驛賜大遼賀坤成節人使節回御筵兼傳宣撫問口宣（七月七日

下院）

有敕：卿等飛蓋西風，改轅北道，喜山川之漸近，忘徒御之久勞，往致眷懷，少留燕衍。

玉津園賜大遼賀坤成節人使射弓例物口宣（七月八日下午院）

有敕：卿等圭璋致命，既已譁歡，弓矢娛賓，亦將觀德，宜有珍華之賜，以旌審固之能。

賜平海軍節度使駙馬都尉李璋已下罷散坤成節道場香酒果口宣（七月

九日下午院）

有敕：卿等義重戒藩，志同忠報，屬誕辰之均慶，嘉法會之告成，宜示褒優，特加寵賚。

賜殿門都指揮使以下罷散坤成節道場香酒果口宣（七月九日下午院）

有敕：誕彌之慶，海宇攸同，嘉將帥之協恭，設入天之妙果，宜均寵錫，以示褒優。

賜皇伯祖高密郡王宗晟已下罷散坤成節道場香酒果口宣（七月九日下午

院）

有敕：着我宗英，志存忠報，修等慈之妙供，祝難老之昌期，嘉此精誠，均其慶賜。

賜同知樞密院事韓忠彥已下罷散坤成節道場香酒果口宣（七月九日下午

院）

有敕：嘉我樞臣，義均一體；修茲淨供，慶續千齡；不有寵頒，曷旌忠報？

相州賜大遼賀坤成節人使却回御筵口宣（七月九日下院）

有敕：鄰好旣成，使華有耀；眷邦畿之漸遠，念郵傳之方勤；服我思私，少留燕喜。

賜大遼國賀坤成節使副時花酒果口宣（七月十日下院）

有敕：鄰歡旣展，賓館歸休；宜分醴罍之醇，復致瓜華之侑；少將至意，其服茂恩。

坤成節尙書省賜宰臣已下御筵酒果口宣（七月十一日下院）

有敕：忠存柱石，誠貫人天；共欣誕日之臨，旣畢祗園之會；宜頒芳旨，以助燕私。

皇帝達太皇太后迴大遼皇帝賀坤成節書

星火西流，慶慈闈之誕日；皇華北至，講鄰國之誠言；旣達來音，俾修報禮；感銘之素，敷述難周！

皇帝迴大遼皇帝問候書

輶車重幣，已修交慶之儀；尺素好音，復講久要之信；屬臨素節，允迪純禧；益冀保頤，式符企詠！

坤成節賜同知樞密院事韓忠彥已下尙書省御筵酒果口宣（七月十二日下院）

下院）

有敕：修佛勝因，祈天永命；旣肅成於梵供，益表見於忠誠；宜有寵頒，想同燕喜。

賜徐王罷散坤成節道場香酒果口宣（七月十二日下院）

有敕：卿親賢莫二，忠孝實兼；饌蒲塞於祗園，薦椿齡於崇慶；喜成法會，宜有寵頒。

賜大遼賀坤成節人使朝辭訖歸驛御筵口宣（七月十二日下院）

有敕：卿等已聘告歸，少休就館；卽頒燕俎，臨遣輔臣；式示異恩，以榮回馭。



班荆館賜大遼賀坤成節人使回程御筵口宣（七月十二日下院）  
有敕卿等方事回轅，聊茲弭蓋，念征途之尙永，加利暑之未衰，往錫燕嘉，少休徒暇。

賜宰相呂大防已下罷散坤成節道場香酒果口宣（七月十二日下院）  
有敕卿等竭誠衛上，體國均休，恪修西竺之儀，仰獻南山之祝，宜膺寵錫，以示褒優。

賜大遼賀坤成節使副內中酒果口宣（七月十二日下院）  
有敕卿等來陳慶幣，克講鄰歡，載嘉遠聘之勤，宜示寵綏之意，頒茲芳旨，服我恩私。

賜大遼賀坤成節人使朝辭訖歸驛酒果口宣（七月十二日下院）  
有敕卿等遠敦使事，率禮無違，既上謁辭，言還有日，宜加頒錫，益示寵榮。

坤成節就驛賜阿里骨進奉人使御筵口宣（七月十四日下院）  
有敕汝等來修貢篚，適逢誕辰，宜均慶賜之恩，共樂亨嘉之會，往頒燕俎，咸極歡心。

隴州賜大遼賀坤成節人使廻程御筵口宣（七月十四日下院）  
有敕鞭轡之勞，封疆漸邇，雖勤歸念，少憩暑途，服我恩私，式同燕喜。

坤成節就驛賜于闐國進奉人使御筵口宣（七月十四日下院）  
有敕汝等奉琛遠至，授館少留，適逢誕辰，宜均慶澤，欽承恩渥，共樂燕私。

班荆館賜大遼賀坤成節人使回程酒果口宣（七月十七日下院）  
有敕卿等奉璋來聘，弭節言還，眷此暑途，少留歸馭，往頒燕俎，式示恩私。

賜夏國主進奉賀坤成節回詔（七月二十一日下院）  
敕節紀誕彌，慶均臨照，眷守邦之雖遠，亦執贄以來，同嘉與朝臣，咸稱壽辟，載惟忠恪，宜有寵頒。

樂語(附)

坤成節集英殿宴教坊詞(元祐二年七月十五日)

教坊致語

臣聞視履考祥，既占衷月之夢；對時育物，必有繼天之功。方大火之西流，屬陰靈之既望。帝於是日，誕降仁人，意使斯民，咸歸壽域。共慶千年之遇，得生二聖之朝。式宴示慈，與民同樂。恭惟皇帝陛下，文思天縱，睿哲生知。力行禹湯之仁，常恐一夫之不獲；躬蹈曾閔之孝，故得萬國之歡心。恭惟太皇太后陛下，道契天人，德超載籍。知入則者，蓋帝堯之所難修；已安民，雖虞舜其猶病風雲。從而萬物覩日月，照而四時行。自然動植之咸安，莫知天地之何力。三宮交慶，羣后駸奔。寶鄰通四牡之歡，航海致重譯之贖。洞庭九奏，始識咸池之音；靈嶽三呼，共獻後天之祝。臣等叨居法部，輒採民言，上瀆宸聽，敢陳口號。

口號

三朝遺老九門前，又見承平大有年。文母憂勤初化俗，曾孫仁孝已通天。史書元祐三千牘，樂奏坤成第一篇。欲採蟠桃歸獻壽，蓬萊清淺半桑田。

勾合曲

秋風協應，生殿閣之微涼；廣樂具陳，韻金絲而間作。欲觀鳥獸之率舞，願聞笙磬之同音。上奉宸顏，教坊合曲。

勾小兒隊

朱干玉戚，本以象功；白叟黃童，皆知頌聖。盍命髡髦之侶，來陳舞勺之儀。上侑呈歡，教坊小兒入隊。

隊名

願同千歲樂，長奏太平謠。樂隊。

問小兒隊

鑄京廣燕方雲集於播紳；沂水游童，忽鳧趨於庭廡；雖云小技，必有可觀；咫尺天顏，悉言汝志！

小兒致語

臣聞功存社稷，慶鍾高密之門；澤及本枝，天胙太任之德；候西風之入律，藹瑞氣之盈庭；嘉與四方，同稱萬壽。恭惟皇帝陛下，文思稽古，濬哲在躬；日奉東朝之歡，率用家人之禮；以謂慈儉之化，無德而能名；保佑之功，如天之難報；惟流傳於歌舞，庶髣髴其儀刑。臣等雖在弱齡，久陶孝治，敢率垂暑之侶，共陳振萬之儀；未敢自專，伏取進止！

勾雜劇

鸞旗日轉，雉扇雲開；覽同綴兆之文，少進俳諧之技；來陳善戲，以佐歡聲；上樂天顏，雜劇來敷！

放小兒隊

青衿放進，雖未技而畢陳；黃屋天臨，知下情之無壅；既成文於綴兆，爰整袂以徘徊；再拜天階，相將好去。

勾女童隊

彤壺漏箭，隨雞唱以漸移；絳節綵毫，聞鳳簫而自舉；宜召散花之侶，來陳回雪之姿；上奉宸歡，兩軍女童入

隊。

隊名

金風回翠袖，玉瑄倚清歌。樂隊。

蘇東坡內制集 樂語

問女童隊

鳳歌諧律，方資燕俎之歡；鸞羽分庭，忽集壽山之下；低翼有待，振袂欲前；密邇天階，悉陳來意！

女童致語

妾聞塗山啓夏，來玉帛於萬邦；擊仲興周，胙本枝於百世；嘉辰共樂，壯觀一新。恭惟皇帝陛下，舜孝自天，堯仁浹物，膺昊穹之成命，席累聖之詒謀；惟地勢坤承，載無疆之德；以天下養躬，持胥樂之觴；六樂在庭，百工奏技。妾等親逢盛旦，獲望嚴宸；藝雖愧於鸞鴻，心已先於儀鳳；願陳舞綴，上奉天顏；未敢自專，伏取進止！

勾雜劇

風清羽蓋，日轉槐庭；欲資載笑之歡，必有應諧之妙；暫同舞綴，少進詼辭；上悅天顏，雜劇來興！

放隊

八音間作，既成嗽繹之文；萬舞畢陳，曲盡同翔之態；望形闕而却立，斂翠袂以言歸；再拜天墀，相將好去。

集英殿秋宴教坊詞

教坊致語

臣聞天無言而四時成，聖有作而萬物親；清淨自化，雖仰則於帝心；愷悌不回，亦俛同於衆樂。屬此九秋之候，粲然萬寶之成；吾王不游，何以勞農而休老？君子如喜，則必大亨；以養賢，恭惟皇帝陛下，孝通神明，仁及草木；行堯禹之大道，守成康之小心；華夷來同，天地並應；以謂福莫大於無事，瑞曷加於有年；南極呈祥，候秋分而老人見；西夷慕義，涉流沙而天馬來；嘉與臣工，肅陳燕俎；禮元侯於三夏，諧庶尹於九成；宣示御觴，聳近臣之榮觀；臚傳天語，溢兩廡之歡聲；臣等幸觀昌辰，叨塵法部，採謠言於擊壤，助矇眊之陳詩；仰奉威顏，敢進口號。

口號

霜霏碧瓦尚生烟，日泛彤庭已集仙。萬萬四門多吉士，熙熙萬國屢豐年。高秋爽氣明宮殿，元祐和聲入管絃。菊有芳兮蘭有秀，從臣誰和白雲篇？

勾合曲

西風入律，聞歌秋報之詩；南籥在庭，備舉德音之器。絃匏一唱，鐘鼓畢陳；上奉宸嚴，教坊合曲。

勾小兒隊

皇慈下逮，罄百執以均歡；衆技畢陳，示四方之同樂。宜進垂暑之侶，來脩秉翟之儀；上奉威顏，教坊小兒入隊！

隊名

登歌依頌磬，下管舞成童。樂隊。

問小兒隊

大君有命，肆陳管磬之音；童子何知，入筵工師之末。欲詳來意，宜悉奏陳！

小兒致語

臣聞天行有信，正得秋而萬寶成；君德無私，日將旦而羣陰伏。清風應律，廣樂在庭；占歲事於金穰，望天顏之玉粹。沐浴膏澤，詠歌升平。恭惟皇帝陛下，天縱聰明，日躋聖知，無一物之失，所得萬國之權心。雖擊壤之民，固何知於帝力；而後天之祝，亦各抒於下情。臣等幸以韶黿之年，得居仁壽之域，詠舞雩於沂水，久樂聖時，唱銅鞮於漢濱，空慙俚曲。願陳舞綴，少奉宸歡，未敢自尊，伏候進止！

勾雜劇

朱絃玉瑄，屢進清音；華翟文竿，少停逸綴。宜進詼諧之技，少資色笑之歡；上悅天顏，雜劇來歟！

放小兒隊

同翔丹陛，已陳就日之誠；合散廣庭，曲盡流風之妙；歌鐘告闋，羽籥言旋；再拜天階，相將好去。

勾女童隊

錦薦雲舒，來九成之丹鳳；霞衣鱗集，隱三疊之靈囂；上奉宸嚴，教坊女童入隊！

隊名

香雲浮繡屐，花浪舞彤庭；樂隊。

問女童隊

清禁深嚴，方摺紳之雲集；仙音彈緩，忽簪珥之星陳；徐步香茵，悉陳來意！

女童致語

妾聞鈞天廣樂，空傳帝所之游；闔闔清風，理絕庶人之共；夫何僊聖，靡隔塵凡；仰瞻八采之威，自慶千齡之運。恭惟皇帝陛下，乾健而粹，高明而文；規摹六聖之心，人將自化；儀刑文母之德，天且不違；樂茲大有之年，申以示慈之會；虞韶既畢，夏籥將興；妾等分綴以須，審音而作；願俟工歌之闋，少同率舞之歡；未敢自專，伏取進止！

勾雜劇

絃匏迭奏，干羽畢陳；洽聞舜樂之和，稍進齊諧之技；金絲徐韻，雜劇來軌！

放隊

羽觴湛湛，方陳既醉之詩；鼙鼓淵淵，復奏言歸之曲；峨鬢佇立，斂袂却行；再拜天階，相將好去。

興龍節集英殿宴教坊詞（元祐二年）

教坊致語

臣聞帝武造周，已兆與王之迹；日符胙漢，實開受命之祥；非天私我有邦，惟聖乃作神主；仰止誕彌之慶，集于建丑之正；瑞玉旅庭，爰講比鄰之好；虎臣在序，復通西域之琛；式燕示慈，與人均福；恭惟皇帝陛下，睿思冠古，濬哲自天，煥乎有文；日講六經之訓，述而不作，思齊累聖之仁；夷夏宅心，神入協德；卜年七百，方過曆以承天；有臣三千，咸一心而戴后；彤庭振萬玉座，傳觴誦干戈載戰之詩；作君臣相悅之樂，斯民何幸！白首太平，臣猥以微生，親逢盛旦，始慶猗蘭之會，願賡擊壤之音，下採民言，上陳口號。

口號

凜凜重瞳日月新，四方驚喜識天人；共知若木初升旦，且種蟠桃莫計春；請吏黑山歸屬國，給扶黃髮拜嚴宸；宸皇應在紅雲裏，試問清都侍從臣。

勾合曲

祝堯之壽，既罄於歡謠；象舜之功，願觀於備樂；羽旄在列，管磬同音；上奉宸嚴，教坊合曲！

勾小兒隊

魚龍奏技，畢陳詭異之觀；韶齔成童，各效回旋之妙；嘉其尙幼，有此良心；仰奉宸慈，教坊小兒入隊！

隊名

兩階陳羽，蒼萬國走梯航；樂隊。

問小兒隊

工師在列，各懷自獻之能；振子盈庭，必有可觀之技；未知來意，宜悉奏陳！

小兒致語

臣聞生民以來，未有祖宗之仁厚；上帝所眷，錫以聖神之子孫；孚佑下民，篤生我后；瞻舜瞳之日月，望堯額

之山河若帝之初，達四聰於無外，如川方至，傾萬宇以來同。恭惟皇帝陛下，齊聖廣淵，剛健篤實，識文武之大者，體仁孝於自然，歌詩思齊，見文王之所以聖，誦書無逸，法中宗之不敢康，誕日載臨，輿情共祝，神筭授萬年之算，洛書開五福之祥，臣等嬉遊天街，沐浴皇化，欲陳舞蹈之意，不知手足之隨，未敢自專，伏取進止！

勾雜劇

金奏鏗純，既度九韶之曲，霓衣合散，又陳八佾之儀，舞綴暫停，伶優間作，再調絲竹，雜劇來歎！

放小兒隊

游童率舞，逐物性之熙怡，小技畢陳，識天慈之廣大，清歌既闋，疊鼓屢催，再拜天增，相將好去。

勾女童隊

垂鬢在列，斂袂稍前，豈知北里之微，敢獻南山之壽，霓旌坐集，金奏方諧，上奉威顏，兩軍女童入隊！

隊名

君臣千載遇，歌舞八方同。 樂隊

問女童隊

搯搗屢作，旌夏前臨，願游女之何能，造形庭而獻技，欲知來意，宜悉奏陳！

女童致語

妾聞瑞已來翔，共紀生商之兆，羣龍下集，適同浴佛之辰，佳氣充庭，和聲載路，輦出房而雷動，扇交翟以雲開，喜動人天，春還草木，恭惟皇帝陛下，凝神昭曠，受命穆清，三后在天，宜興王之世，有四人迪哲，知享國之無窮，乃眷良辰，欲均景福，庭設九賓之禮，樂歌四牡之章，妾等幸觀昌期，獲瞻文陛，雖乏流風之妙，願輸率舞之誠，未敢自專，伏候進止。



勾雜劇

清淨自化，雖莫測於宸心；詼笑雜陳，示儆同於衆樂。金絲再舉，雜劇來歟！

放女童隊

分庭久立，漸移愛日之陰；振袂再成，曲盡回風之態。龍樓却望，鼙鼓屢催；再拜天階，相將好去。

紫宸殿正旦教坊詞（元祐四年）

教坊致語

臣聞行夏之時，正莫加於人統；採周之舊王，方在於鑄京。惟吉月之布和，休庶工而未作；使華遠集，鄰好交修。萃簪芴於九門，來車書於萬里；將興嗣歲，以樂太平。恭惟皇帝陛下，躬履至仁，誕膺眷命。法天地四時之運，民日用而不知；傳祖宗六聖之心，我無爲而自化。九德咸事，三年有成；始御八音之和，以臨元日之會。人神相慶，夷夏來同。臣等忝與賤工，得親壯觀，知輿情之願頌，願盛德之難形。不度荒蕪，敢進口號。

口號

九霄清蹕一聲雷，萬物欣榮意已開。曉日自隨天仗出，春風不待斗杓回。行看菖葉催耕籍，共喜椒花映壽杯。欲識太平全盛事，師師鸚鵡滿雲臺。

勾合曲

東風應律，南簷在庭；餞臘迎春，方慶三朝之會；登歌下管，願聞九奏之和。上悅天顏，教坊合曲！

勾小兒隊

工師奏技，咸踴躍以在庭；穉孺聞音，亦同翔而赴節。方資共樂，豈間微情？上奉宸歡，教坊小兒入隊！

隊名

蘇東坡內制集 樂語

仙山來絳節，雲海戲羣鴻。樂隊

問小兒隊

六樂充庭，九賓在列，何彼垂髫之侶，欲陳振袂之能，必有來誠，少前敷奏！

小兒致語

臣聞正月上日，萬彙所以更新；羣臣嘉賓，四方於是觀禮；雪方占於上瑞，風已告於先春；及此良辰，設爲高會，恭惟皇帝陛下，子來九有，天覆兆民，煥乎其有文章，昭然若揭日月，安西都護，來輸入國之琛，南極老人，出效萬年之壽，遣主璋於鄰使，受圖籍於春朝，擊石縱金，奏鈞天之廣樂，跳九舞索，戲平樂之都場，臣等沐浴太平，詠歌新歲，鼓舞咸韶之韻，踴揚鳥獸之間，未敢自專，伏候進止！

勾雜劇

以雅以南，旣畢陳於衆技；載色載笑，期有悅於威顏；舞綴暫停，優詞間作；金絲徐韻，雜劇來歟！

放小兒隊

酒闌金殿，旣均湛露之恩；漏減銅壺，曲盡流風之妙；望彤墀而申祝，整翠袖以言歸；再拜天階，相將好去。

興龍節集英殿宴教坊詞

教坊致語

臣聞天所眷命，生而神靈，惟三代受命之符，萃于茲日；實萬世無疆之福，延及我民；候南極之祥輝，交北鄰之瑞節；同趨鑄燕，爭頌堯封；恭惟皇帝陛下，稽古溫文，乘乾剛粹；體生知而猶學，藏妙用於何言；故得六聖承休，三靈眷佑；德隆星晷，齊六符而泰階平；河行地中，錫九疇而彝倫正；屬誕彌之令旦，履長發之嘉祥；風設九賓於廷，遍舞六代之樂；日無私於臨照，葵藿自傾；天有信於發生，勾萌必達；臣等歷廳法部，獲造彤墀；下採民言，得三

萬里之謠頌；登歌壽母，以八千歲爲春秋，不度無音，敢進口號。

口號

風卷雲舒合兩班，瞳瞳瑞日映天顏；觀書已獲千秋鏡，積德長爲萬歲山；臘雪未消三務起，壬人不用五兵閑；相逢父老爭相賀，却笑華胥是夢間。

勾合曲

笙磬同音，考中聲於神鼓；爲獸率舞，浹和氣於敷天；上奉宸歡，教坊小兒入隊！

勾小兒隊

衆技旋庭，振歡聲於無外；游童頌聖，陶至化於自然；上奉皇威，教坊小兒入隊！

隊名

壤歌皆白髮，象舞及青衿。樂隊。

問小兒隊

跳踉廣陌，初疑竹馬之遊；合散形墀，忽變驚鴻之狀；欲知來意，宜悉敷陳！

小兒致語

臣聞流虹啓聖，非人力所致之符；湛露均恩，與天下共享其樂；勞行海宇，外薄戎夷；咸欣載風之辰，共獻無疆之祝。恭惟皇帝陛下，神武不殺，將聖多能；天生德於予，旣稟洵齊之質；人樂告以善，輔成經緯之文；法慈儉於東朝，紬詩書於西學；載臨誕日，俛答輿情；非爲靡曼之觀，庶備太平之福；臣等樂生韶亂，學樂父師；就列紛紜，雖無殊於鳥獸；赴音俛仰，亦少效於涓塵；未敢自專，伏候進止！

勾雜劇

樂且有儀，方君臣之相悅，張而不弛，豈文武之常行？欲佐歡聲，宜陳善謔，金絲徐韻，雜劇來歎！

放小兒隊

末技畢，陳下情無壅，既成文於綴兆，猶斂袂以回翔，再拜天階，相將好去。

勾女童隊

飛步壽山，起香塵於羅襪，散化御路，泛回雪於錦茵，上奉宸顏，兩軍女童入隊！

隊名

生商來瑞氣，浴佛降羣龍。樂隊。

問女童隊

玉座天臨，雖仙凡之有隔；翠鬘雲合，豈草木之無知？密邇天階，悉陳來意！

女童致語

妾聞千里一曲，變澄瀾於濁河；萬歲三稱，隱歡聲於靈岳。天人並應，夷夏來同，雖云北里之微，敢獻華封之祝！恭惟皇帝陛下，睿文冠古，神智無方，同堯舜之性仁，而能濟衆；陋成康之刑措，猶待積年，共欣建丑之正，再覩興龍之會。桑田東海，傾壽學而未乾；汗竹南山，書頌聲而無極。妾等幸緣賤藝，獲望載顏，願振萬于庭，欲赴千旆之節，間歌以雅，庶諧笙磬之音，未敢自專，伏候進止！

勾雜劇

舞綴暫停，歌鐘少闕，必有應諧之妙，以資載笑之歡，上悅天顏，雜劇來歎！

放女童隊

擬袂再成，曲盡回風之妙；分庭久立，漸移愛日之陰，再拜天階，相將好去。